



Ulloq: 10. december 2025
Allaffik: Nordatlantkontoret
Suli.sul: Ditte Refsgaard
Suliap normua: 2025-04791
Takussutissiaq: 3650110

MISSINGIUT

Uunga

Kalaallit Nunaanni eqqartuussisarnermik inatsisip allanngortinneqarnera
pillugu inatsit

(Pinngitsaaliilluni akuliunnerit pillugit eqqartuussinerni
najuutinngikkaluarluni atortut elektroniskiusut atorlugit peqataaneq,
oqarasuaatikkut oqaluussisumik naalaarneq aamma oqarasuaatit sorliit
piffissami aalajangersimasumi oqarasuaammut aalajangersimasumut
atassuteqarsimasutut pillugit aalajangiinermik pissarsiniarnermut
suleriaaseq piuminarsagaq, nutarterinerit allat il.il.)

§ 1

Inatsimmik allanngorneri ilanngullugit nalunaarutiginninneq nr. 1007, 27.
juni 2025-imeersoq malillugu, kingusinnerpaamik Kalaallit Nunaanni
eqqartuussisarnermik inatsisip aamma Kalaallit Nunaanni
pinerluttulerineri inatsisip allanngortinneqarneri pillugit inatsisimmi
(Kalaallit Nunaanni eqqartuussisarnermik inatsisip nutarterneqarnera il.il.)
[X-imi, X-imeersumi § 1-ikkut allanngortinneqartumi, Kalaallit Nunaanni
eqqartuussisarnermik inatsimmi tulliuttut suliarineqassapput:

1. § 250-ip kingorna ilanngunneqassaaq:

»§ 250 a. Akuusumut ukiukitsumut angajoqqaatut akisussaataasup
suliamut saqqummiussaminut imaluunniit eqqartuussisunut annerusunut
ingerlateqqitassanngortitsinerminut, tamakkiisumik imaluunniit
ilaannakortumik suliamut aningaasartuutit, akuusup ukiukitsup

akilissallugit pisussaaffigisaraluanik, akiliissasoq, eqqartuussiviup aalajangersinnaavaa.«

2. § 343-imi imm. 3-tut ilanngunneqassaaq:

»Imm. 3. § 392 malillugu, kapitalini 36 aamma 37 malillugit, pinngitsaaliissummik akuliunneq pillugu aalajangiinerit pineqartillugit, politiit aamma suliami illersuisup ivertinneqartup najuutinngikkaluarlutik elektroniskiusumik atortut atorneqarnerisigut eqqartuussinermi peqataasinnaasut, eqqartuussiviup aalajangersinnaavaa.«

3. § 391, imm. 1-imi oqaaseqatigiinni siullerni »akuliunnermut tunngasut« kingorna ilanngunneqassaaq: », taamaattoq imm. 2 takuuk«.

4. § 391-imi imm. 1-ip kingorna immikkoortutut nutaatut ilanngunneqassaaq:

»Imm. 2. Pinerluttulerinermi inatsimmi kapitali 7-imiit 8 ilanngullugu malittarisassanik imaluunniit § 65, imm. 1-imik, § 66-imi oqaaseqatigiinnik siullernik, § 68, imm. 1-imik aamma 2-imik, § 69-imik, § 83-imik, § 86-imik, § 90, imm. 2-mik, § 88-imi oqaaseqatigiit siulliit malillugit ingasattumik nakuusernermik, § 92, imm. 1 malillugu kiffaangissusiiaanermik, § 93-imik, § 98, imm. 2-mik, § 102-mi oqaaseqatigiit siulliit malillugit ingasattumik tillinniarnermik, § 111 a malillugu ingasattumik aningaasatigut peqquserluutinik malunnarunnaarsaanermik, § 112-imik imaluunniit ikiaroornartut pillugit inatsimmik imaluunniit sakkut pillugit inatsimmik piaaraluni ingasattumik unioqquitsinermik pinerluttoqarsimaneranik paasiniaaneq tunngassuteqarpat, § 385, imm. 1, imaluunniit § 386, imm. 1 malillugu, eqqartuussiviup aalajangiinerani oqarasuaatip normui aalajangersimasut saniatigut, inuk, akuliunnermut tunngassuteqartoq (pasisaq) taaneqassaaq. Taamaattoqarpat piffissap taassuma, akuliunnerup suliarineqarfissaata naanerata kingorna piaarnerpaamik, politiit oqarasuaatip normui, akuliunnermut sammitinneqartut aamma aalajangiinnermi taaneqarsimanngitsut, pillugit eqqartuussivik nalunaaruteqarfigissavaat. Pissutsit assigiinngitsut tamanna pissutissaqartippassuk, oqaaseqatigiit aappaat malillugit kingusinnerpaamik akuliunnerup aallartinneranit nalunaaquttat akunneri 24-it qaangiunneranni, nalunaarutiginninneq pissaaq. Oqaaseqatigiit aappaat aamma pingajuat malillugit nalunaarutiginninneq, oqarasuaatip normuinit taakkunannga pasineqartumut imaluunniit pasineqartumit nalunaarutininik tunniussisoqartarneranik, pissutaasut aalajangersimasut ilimagineqarnerisa

taaneqarnerannik imaqassaaq. § 392, imm. 1 malillugu, illersuisoq ivertinneqarsimasoq eqqartuussiviup nalunaarfigissavaa, taassumalu tamatuma kingorna akuliunnerup inatsisinut naapertuunnera pillugu apeqqut eqqartuussivimmut saqqummiussinnaavaa. Eqqartuussiviup isumaa malillugu akuliunneq suliarineqartussaasimanngikkaluarpat, tamanna pillugu eqqartuussivik Rigsadvokatimut nalunaaruteqassaaq. Akuliunnerit, eqqartuussiviup isumaa malillugu Politiit Immikkut Paasiniaasartuinit suliarineqarsimasussaanngikkaluit, Inatsiseqarnermut ministereqarfimmut nalunaarutigineqassapput.«

Tamatuma kingorna imm. 2-miit 3 ilanngullugu imm. 3-miit 4-nngussapput.

5. § 422 imm. 9-p kingorna immikkoortutut nutaatut ilanngunneqassaaq:

»Imm. 10. Pinerluttoqarsimanerannik paasiniaasoqarneranut pasineqartoq imaluunniit allat tamanna pillugu ilisimasaqartinnagit, arsaarinnittoqarnissaa aalajangiisumik pingaaruteqarpat, aamma § 423, imm. 1-imi oqaaseqatigiit aappaat aamma pingajuat avaqqunneqarsinnaaneratt pillugit, eqqartuussivik aalajangiisinnaavoq. § 391, imm. 2-mi aamma 3-mi, § 392-imi aamma § 396-imi malittarisassat taamatuttaaq atuutissapput.«

6. § 448-p kingorna ilanngunneqassaaq:

»§ 448 a. Unnerluussisussaattitaasut allakkamik unnerluussummik tunniussinissaat sioqqullugu, tamanna naleqquttutut isigineqarpat, noqqaassuteqarnerup kingorna eqqartuussiviup suliami pingaarnertut isumaqatigiissitsiniarneq sioqqutsisumik piffissalersinnaavaa.«

7. § 449, imm. 1-imi, »Eqqartuussisut« sioqqullugit ilanngunneqassaaq:

»Suliaq § 449 d malillugu eqqartuussinertaqanngitsumik suliarineqanngippat,«.

8. § 449 c-p kingorna ilanngunneqassaaq:

»§ 449 d. Eqqartuussivik eqqartuussinertaqanngitsunik sulianik suliarinnissinnaavoq, taakkunani unioqqutitsineq pillugu suliami, eqqartuussivikkoorteqqaarnagu akiliisitsissummik akiliinikkut suliap naammassineqarnissaanik neqeroorut atulersinneqarsimalluni aamma taamaaliortoqassappat aqqusinertigut angallannermut inatsit malillugu arsaarinninneq imaluunniit piiiaffiginninneq atulersinneqarluni, tulluuttut pippata

1) § 449 c, imm. 2 malillugu akileeqqussut akuerineqanngippat, imaluunniit akuersissut utertinneqarpat, pineqartup piffissaliussap

akileeqqussummi aalajangerneqartup iluani suliap eqqartuussinikkut suliarineqarnissaa noqqaassutigisimanngippagu, pineqartoq ilimasaareqqeqqaarani pissutsinut akileeqqusissummut tunngassuteqartunut eqqartuunneqarsinnaasoq, akileeqqussummi taaneqassasoq, aamma

2) nr. 1-imi piffissaq eqqorlugu noqqaassummik pineqartoq saqqummiussisimanngippat.«

9. § 452, imm. 2-mi, »imaluunniit unnerluutigineqartoq nassuiaateqarumanngippat« ima allanngortinneqassaaq: »unnerluunneqartoq nassuiaateqarumanngippat imaluunniit § 449 d malillugu eqqartuussinissaq pillugu noqqaassuteqarnissani ilaginnarsimappagu«.

10. § 474, imm. 3-mi, oqaaseqatigiit aappaat sioqqullugu oqaaseqatigiittut nutaatut ilanngunneqassaaq:

»Suliaq § 449 d malillugu suliarineqarsimappat, eqqartuussinermik ingerlateqqaarani eqqartuussut aammattaaq eqqartuussutigineqarsinnaavoq.«

11. I § 517 b-mi imm. 1-ip kingorna immikkoortutut nutaatut ilanngunneqassaaq:

»Imm. 2. § 261, imm. 2 malillugu akissarsiat pillugit Nunatsinni Eqqartuussiviup aalajangiinerit aalajangersimasai, annerpaamik 50.000 kr.-inut aalajangersarneqarsimasut, aalajangeqqitassanngortinneqarsinnaanngillat. Pissutsit immikkut ittut tamanna pissutissaqartippassuk, Ingerlatitseqqinnissamik aalajangiisartut taamaattoq aalajangeqqitassanngortitsinissamik akuersissuteqarsinnaapput.«

Tamatuma kingorna imm. 2 imm. 3-nngussaaq.

12. § 583-p kingorna ilanngunneqassaaq:

»§ 583 a. Rigsadvokatip imaluunniit eqqartuunneqarsimasup piumasagaateqarneratigut, Inuit Pisinnaatitaaffii pillugit Europami Eqqartuussivimmit inaarutaasumik eqqartuussut, Danmarkip akuuffigisaa, eqqartuussutigineqarsimasoq malinniarlugu, Kalaallit Nunaanni suliaq aalajangerneqarsimasoq tamakkiisumik imaluunniit ilaannakortumik suliareqqitassanngortinneqarnera pisinnaavoq.

Imm. 2. § 535, imm. 1, taamatuttaaq atuutissaaq. Eqqartuunneqartoq toqusimappat, inunnit, § 535, imm. 2-mi oqaaseqatigiinni siullerni

taaneqartunit, suliareqqitassanngortitsineq pillugu piumasaqaat saqqummiunneqarsinnaavoq.«

13. § 585, *imm. 4-imi*, »§ 583, *imm. 2*,«-p kingorna ilanngunneqassaaq: »aamma § 583 a, *imm. 2*,«.

14. § 586-*imi* oqaaseqatigiit pingajuattut ilanngunneqassaaq:

»Pissutsit immikkorluinnaq ittut atuutinngippata, pisuni § 583 a-imi pineqartuni, eqqartuunneqarsimasumit suliareqqitassanngortitsineq, Inuit Pisinnaatitaaffii pillugit Europami Eqqartuussivimmit inaarutaasumik eqqartuussutip pineqartup inaarutaasunngortinneqarnerata kingorna ukiup 1-p kingorna piumasaqaat saqqummiunneqassaaq.«

15. § 587-*imi* oqaaseqatigiinni *siullerni*, »eqqartuussutip« ima allanngortinneqassaaq: »aalajangiinerup«.

16. § 587-*imi* oqaaseqatigiit *pingajuanni* »§ 583«-p kingorna ilanngunneqassaaq: »imaluunniit § 583 a«.

17. § 590, *imm. 2*, »eqqartuussuteqassaaq« ima allanngortinneqassaaq: »aalajangiinermik aalajangiissaaq«.

18. § 590, *imm. 2*, »eqqartuussummik pineqartumik« ima allanngortinneqassaaq: »aalajangiinermik pineqartumik«.

19. § 592, *imm. 1-imi* oqaaseqatigiinni *siullerni*, »eqqartuussuteqarsimasumi« ima allanngortinneqassaaq: »aalajangiinermik aalajangiisimasumi«.

20. § 592, *imm. 3-imi* oqaaseqatigiinni *siullerni* »eqqartuussut« ima allanngortinneqassaaq: »aalajangiineq«.

21. § 592, *imm. 3-mi* »§ 583«-ip kingorna ilanngunneqassaaq: »imaluunniit § 583 a«.

22. § 601-*imi* *imm. 4-p* kingorna immikkoortutut nutaatut ilanngunneqassaaq:

»*Imm. 5.* Eqqartuussivikkoortinnagu allakkatigut isumaqatigiissuteqarnermi aamma akiitsut allagartaanni, digitaliusumik

atsiorneqartuni, takussutissiap allakkatigut assilillugu sanaqqinneqarnera akiliisitsisarnermut eqqartuussivimmut tunniunneqassaaq.«

Tamatuma kingorna imm. 5 imm. 6-inngussaaq.

§ 2

Imm. 1. Inatsit ulloq [ulloq] atuutilissaaq.

Imm. 2. Inatsisip atuutilinnginnerani Inuit Pisinnaatitaaffii pillugit Europami Eqqartuussiviup eqqartuussutigisimasaasa malitsigisaannik suliareqqitassanngortitsinissaaq pillugu noqqaassutitut § 1, nr. 12 aamma 14 atuutinngillat.

Inatsisissatut siunnersuummut oqaaseqaatit

Oqaaseqaatit nalinginnaasut

§ 1.....	1
§ 2.....	6
<i>Inatsisissatut siunnersuummut oqaaseqaatit.....</i>	<i>7</i>
1. Aallaqqaasiut.....	9
2. Inatsisissatut siunnersuummi immikkoortut pingaarnertit	11
2.1 Suliami aningaasartuutitut angajoqqaatut akisussaataasut akiliisarnissaat	11
2.1.1. Inatsisit atuuttut.....	11
2.1.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	14
2.2. Aalajangiinnerit pinngitsaaliilluni akuliunnernut tunngassuteqartut pillugit najuutinngikkaluarluni atortut elektroniskiusut atorlugit peqataaneq.....	18
2.2.1. Inatsisit atuuttut.....	18
2.2.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	19
2.3. Oqarasuaatikkut oqaluussisumik naalaarneq aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut pillugit aalajangiinnermik pissarsiniarnermut suleriaaseq piuminarsagaq	23
2.3.1. Inatsisit atuuttut.....	23
2.3.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	27
2.4. Isertuussaasumik uppersaatinik ujaasinermit atatillugu isertuussaasumik arsaarinninneq	37
2.4.1. Inatsisit atuuttut.....	37
Pinerluttulerinnermik suliap ataani pinerluttoqarsimaneramik paasi- niaanerup nalaani, politiit piumasaqaatit ilaasa ataanni pinngitsaa- liilluni akuliunnerit arlallit suliarisinnaavaat, matumani ilaatigut taakku pillugit eqqartuussisarnermik inatsimmi malittarisassat ma- lillugit uppersaatinik ujaasineq, tunniussisussaataaneq aamma arsaarinninneq.....	37

2.4.1.1. Uppernarsaatissanik ujaasineq	37
2.4.1.2. Arsaarinninneq tunniussisussaataitanerlu	42
2.4.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	44
2.5. Sioqqutsisumik piffissamik aalajangersaasinnaaneq	46
2.5.1. Inatsisit atuuttut	46
2.5.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	47
2.6. Akiliisitsissutinik suliat ingerlanneqartarnerinik piuminarsaaneq	48
2.6.1. Inatsisit atuuttut	48
2.6.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	50
2.7. Akissarsiat pillugit suliani aalajangeqqitassanngortitsisarnerup killilerneqarnera	55
2.7.1. Inatsisit atuuttut	55
2.7.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	56
2.8. Inuit Pisinnaatitaaffii pillugit Europami Eqqartuussivimmit inaarutaasumik eqqartuussutit eqqartuussutigineqarsimasut malinniarlugit pinerluttulerinermik sulianik suliareqqitassanngortitsisinnaaneq	57
2.8.1. Inatsisit atuuttut	57
2.8.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	66
2.9. Digitaliusumik atsiornermi allaganngorlugu takussutissiap allakkatigut assilillugu sanaqqinneqarnera	72
2.9.1. Inatsisit atuuttut	72
2.9.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq	72
3. Pisortanut aningaasaqarnikkut kingunissai aamma atortuulersitsinermi kingunissaa	74
4. Inuussutissarsiornermut il.il. aningaasaqarnikkut allaffissornikkullu kingunissaa	74

5. Innuttaasunut allaffissornikkut kingunissaa	74
6. Silaannaap pissusaanut kingunissaa	74
7. Avatangiisinut- pinngortitamullu kingunissaa	74
8. EU-mi inatsisitigut tunngassuteqartut	74
9. Oqartussaasut suleqatigiiffiillu il.il. tusarniaavigineqartut	75
10. Immersugaq eqikkaaffiusoq	75
§ 1	111

1. Aallaqqaasiut

Naalakkersuisooqatigiilernissamut tunngavimmi *Ansvar for Danmarkimi* takuneqarsinnaasutut, Naalakkersuisut peqatigalugit Kalaallit Nunaanni qallunaat akisussaaffeqarfigalugit suliaasaqarfiisa ineriartortinneqarnissaat naalakkersuisut kissaatigaat. Qallunaat akisussaaffigalugit suliaasaqarfiini Danmarkimi tamanut atugassiat, Danmarkip Kalaallit Nunaatalu akornanni pissutsit immikkut ittut aamma assigiinngissutit, ataqqillugit, malinneqarnissaat, naalakkersuisut Kalaallit Nunaat peqatigalugu sulissutiginiarpaat. Aamma qallunaat akisussaaffigalugit suliaasaqarfiini inatsisiliornerit nutarterneqarnissaat, naalakkersuisut ingerlaavartumik pingaartillugit suliarissavaat. Taamaalilluni oqartussaasut alliunerusut ilannguttarnerisigut aamma Naalakkersuisut oqaloqatigisarnerisigut, Kalaallit Nunaanni eqqartuussisarnermik inatsisip nutarterneqarnissaanik aamma allakkut allanngortinneqarnissaanik pisariaqartitsisoqarnerisigut, Inatsiseqarnermut ministereqarfiup ingerlaavartumik nalilersortassavaa.

Inatsisikkut nr. [Kalaallit Nunaanni eqqartuussisarnermik inatsisip aamma Kalaallit Nunaanni pinerluttulerinermi inatsisip allanngortinneqarneri pillugit inatsisikkut X-ikkut, X-imeersukkut (Kalaallit Nunaanni eqqartuussisarnermik inatsisip nutarterneqarnera il.il.)] allanngortitsinerit arlallit naammassineqarput. Nutarterinerit sulii allat, naleqquttutut nalilerneqartut, qallunaat eqqartuussisarnermik inatsisaanni piffissami 1. juni 2023-imiit 31. december 2024 ilanngullugu suliarineqarsimasut, naammassineqarnissaat, inatsisissatut siunnersuutip matuma siunertaraa. Inatsisip ullutsinnut naleqquttuunissaata aamma oqartussaasut pisariaqartitaannut naleqqussarneqarnissaata qulakkeerneqarnissaa siunertaralugu, Inatsiseqarnermut ministereqarfiup suliaasaqarfiani

oqartussaasut kissaateqarnerat malillugit, allannguutissat siunnersuutit allat arlallit siunnersuutigineqarput.

Tamanna tunngavigalugu malittarisassamik nutaamik eqqussisoqarnissaa inatsisissatut siunnersuutikkut siullertut siunnersuutigineqarpoq, tamatumalu kingorna inuup, ukiukitsumik angajoqqaatut akisussaataasup suliamik saqqummiussimasup imaluunniit eqqartuussummik suliassanngortitseqqissimasup, tamakkiisumik imaluunniit ilaannakortumik suliame aningaasartuutit, ukiukitsup akuusup akilissallugit pisussaaffigisaralui, akilissagai, eqqartuussiviup aalajangersinnaasussanngussavaa.

Malittarisassat ullutsinnut naleqquttuunissaasa aamma sunnuteqarluartuunissaasa qulakkeerneqarnissaat siunertaralugu, eqqartuussivinni pinerluttulerinermik sulianut atatillugu politiit pinerluttoqarsimaneranik paasiniaanermi sakkuutaannut aamma ingerlatsinernut tunngatillugu, aammattaaq allanngortitsinerit arlallit eqqunneqarnissaat siunnersuutigineqarpoq. Pinerluttoqarsimaneranik paasiniaanerup nalaani eqqartuussinerni, pinngitsaaliilluni akuliunnerit pillugit aalajangiinernut tunngassuteqartuni, najuutinngikkaluarluni atortut elektroniskiusut atorlugit peqataasinnaanermut periarfissap eqqunneqarnissaa, oqarasuaatikkut oqaluussisumik naalaarneq imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut pillugit eqqartuussiviup aalajangiinera, inummut akuliunnermut tunngasumut tunngassuseqarsinnaasoq, aamma isertuussaasumik uppersaatinik ujaasinermut atatillugu isertuussaasumik arsaarinninnermik suliaqarsinnaanermut aalajangersakkamik erseqqissumik ilanngussisoqarnissaa, tassunga atatillugu siunnersuutigineqarpoq. Ingerlatsinermut tunngatillugu, pinerluttulerinermik suliat siuarsarneqarnissaat siunertaralugu, pingaarnertut isumaqatigiinniarnernup siuningaani piffissalernerneqarnissaanut periarfissaliissut eqqunneqassasoq, aamma akiliussisitsinermik suliat ingerlanneqartarnerat piuminarsagaq Kalaallit Nunaanni eqqunneqassasoq, tamatumalu suliami, eqqartuussivikkoorteqqaarnagu akiliisitsissummik akiliinikkut suliap naammassineqarnissaanik neqeroorummi piffissaliussap erseqqinnerusumik aalajangersarneqarsimasup iluani, pineqartoq suliap eqqartuussivimmi suliarineqarnissaanik noqqaassuteqarsimanngippat, eqqartuussivik piumasaqaatit erseqqinnerusut ataanni sulianik suliarinnissinnaassaaq, taakkunani eqqartuussinertaqanngitsumik suliami,

eqqartuussivikkoorteqqaarnagu akiliisitsissummik akiliinikkut suliap naammassineqarnissaanik neqeroorut atulersinneqarsimalluni.

Inuit Pisinnaatitaaffii pillugit Europami Eqqartuussivinnut inaarutaasumik eqqartuussut, Danmarkip akuuffigisaa, eqqartuussutigineqarsimasoq malinniarlugu, suliareqqitassanngortitsisinnaaneq pillugu aalajangersakkamik nutaamik ilanngussisoqarnissaa, aammattaaq siunnersuutigineqarpoq.

Eqqartuussivikkoortinnagu allakkatigut isumaqatigiissuteqarnermi aamma akiitsut allagartaanni, digitaliusumik atsiorneqartuni, pisinermi isumaqatigiissutip digitaliusumik atsiorneqartup akiliisitsisarnermut eqqartuussivimmi atuutsinneqarnissaat siunertarlugu, takussutissiap allakkatigut assilillugu sanaqqinneqarnera akiliisitsisarnermut eqqartuussivimmut tunniunneqassasoq, tamatuma saniatigut ilanngunneqassasoq siunnersuutigineqarpoq.

Allatut allassimasoqanngippat, inatsisissatut siunnersuummut oqaaseqaatini »eqqartuussisarnermik inatsit« innersuussutigineqaraangat, Kalaallit Nunaanni eqqartuussisarnermik inatsit innersuussutigineqarmat, maluginiarneqassaaq.

2. Inatsisissatut siunnersuummi immikkoortut pingaarnerit

2.1 Suliami aningaasartuutitut angajoqqaatut akisussaatitaasut akiliisarnissaat

2.1.1. Inatsisit atuuttut

Eqqartuussivimmi saqitsaannermik suliani takkunnissamut aammalu eqqartuussisutigoortitsinermi inatsisilerinermut tunngasunik allakkianik tunniussisinnaassagaanni akuusoq nammineersinnaassusilik, eqqartuussisarnermik inatsimmi § 193, imm. 1-p malitsigaa. Imm. 2 malillugu akuusoq nammineersinnaatitaanngitsoq sinnerlugu angajoqqaatut akisussaatitaasoq tassaavoq sassartussaq.

Kalaallit Nunaannut namminersorsinnaanermik inatsit atuuppoq, taannalu peqqussutikkut nr. 306-ikkut, 14. maj 1993-imeersukkut, Kalaallit Nunaannut atuutilersinneqarpoq, inatsisikkullu nr. 103-ikkut, 3. februar 2016-imeersukkut allanngortinneqarluni. Angajoqqaatut akisussaatitaasup namminersorsinnaatitaanngitsup soqutigisai peqqissaartumik aamma pisinnaasani tamaat malillugu isumagissagai, namminersorsinnaanermik inatsimmi § 53-ip malitsigaa. Namminersorsinnaatitaanngitsumit

imaluunniit pisortani oqartussaasunit akuersissummik pissarseqqaarani, angajoqqaatut akisussaatitaq aallaaviatigut eqqartuussivimmi suliasamik saqqummiussisinnaavoq aamma suliap nalaani aalajangigassanik aalajangiisinnaalluni. Kisianni eqqartuussisarnermik inatsimmi § 193, imm. 3 malillugu nammineersinnaatitaanngitsumit akuersissummik pissarseqqaarani suliat suussusaasa ilaat saqqummiunneqarsinnaanngillat. Taamaalilluni pisuussutinut, pineqartup atorsinnaasaanut, pisinnaatitaataaffinnut, imaluunniit isumaqatigiissutinut, pineqartup nammineerluni atuuttuusumik isumaqatigiissutigisimasaanut, tunngassuteqartunik angajoqqaatut akisussaatitaasoq nammineersinnaatitaanngitsaq akuersissuteqarteqqaarnagu eqqartuussivimmi suliasamik saqqummiussisinnaanngilaq. Nammineersinnaassusiigaaneq tarnikkut nappaateqarnermik imaluunniit sianilluanngissuseqarnermik pissuteqanngippat, nammineersinnaatitaanngitsumut angajoqqaatut akisussaatitaasoq, eqqartuussivimmi suliasamik, timimik innarliisimanermik imaluunniit inuup inuunerminik atugaasa allanit susassarineqanngitsut illersorneqarnerannik innarliinermik tunngassuteqartumik, nammineersinnaatitaanngitsaq akuersissuteqarteqqaarnagu saqqummiussisinnaanngilaq. Nammineersinnaatitaanngitsaq sinnerlugu angajoqqaatut akisussaatitaasoq eqqartuussivimmi suliasamik saqqummiussippat, nammineersinnaatitaanngitsaq nammineerluni suliami akuusutut inissisimassaaq.

Suliami nammineersinnaatitaanngitsaq isumaqatigineqarpat, nammineersinnaatitaanngitsaq tassaassaaq assersuutigalugu illuatungerisamit aningaasat amerlassusaannik aalajangersimasunik pissussatut aalajangiinermi aningaasanik pisussaq imaluunniit pisinnaatitaaffimmik aalajangersimasumik akuersissuteqarfigineqarpat, pisinnaatitaaffimmik pisussaq. Taamatuttaaq suliap ingerlanneqarneranut attuumassuteqartumik aningaasartuutunik taarsiivigitinnissamik nammineersinnaatitaanngitsaq tassaassaaq pisussaq. Akerlianik pissutsit taakku pissutigalugit piumasaqaatip saqqummiunneqarneranut atatillugu suliaq ajorsarfigineqarpat, itigartitsissutigineqarpat, imaluunniit taamaatinneqarpat, suliamut aningaasartuuteqassappat, suliamut aningaasartuutunik nammineersinnaatitaanngitsaq tassaassaaq illuatungerisamut akiliisussatut eqqartuunneqartussaq.

Suliamut aningaasartuutit agguarneqartarnerat aamma akilerneqartarnerat pillugit malittarisassat eqqartuussisarnermik inatsimmi kapitali 20-imi

aalajangersarneqarput. Eqqartuussisarnermik inatsimmi § 247, imm. 1 malillugu, aallaaviup taassuma avaqqunneqarnissaanut immikkut ittumik pissutissaqartoq, eqqartuussiviup aalajanginngippagu, illuatungerisap suliaq ingerlanneqarnerani, taassuma pisariaqartinneqartumik imaluunniit naleqquttumik aningaasartuutigisimasai, taarsiivigissallugit akuusup ajorsartup taarsissallugit pisussaaffigigaa, taassuma ilaatigut malitsigaa. Suliaq taamaatinneqarpat, pissutsit assigiinngitsut malillugit akuusup aappaata tamakkiisumik ilaannakortumilluunniit illuatungerisap suliamut aningaasartuutaanik taarsiivigissagaa eqqartuussiviup naalakkiutigisinnaavaa, imaluunniit § 247, imm. 3 malillugu akuusut tamarmik immikkut namminneq aningaasartuutitik akilissagaat aalajangersinnaallugu. Suliaq itigartitsissutigineqarpat, § 247, imm. 4 malillugu suliamut aningaasartuutit eqqarsaatigalugit, taakku suliassiisumit annaaneqarsimasutut isigineqassapput. Suliamut aningaasartuutit pillugit malittarisassani innuttaasut suliffeqarfiillu taamaaliornerminnut atatillugu aningaasartuutit apeqqutaatinnagit eqqartuussivinnut suliassanik saqqummiussisinnaanerisa qulakkeerneqarnissaa ilaatigut soqutigisassat tunuliaqutigaat. Akuusooq ajugaasooq, eqqortoq malillugu suliamik saqqummiussisooq, taamaalilluni suliamut aningaasartuutiminik illuatungiliuttumit matussusiititsisinnaavoq. Tamatuma peqatigisaanik suliamut aningaasartuutininik akiliisinneqarnissamut aarlerinaat, tunngavissaqanngitsumik suliat eqqartuussivimmut saqqummiunneqannginnissaannut ikiuutaavoq. Allatut oqaatigalugu, eqqartuussisarnermik inatsimmi suliamut aningaasartuutit pillugit malittarisassat aningaasartuutit, pisuni tamani saqitsaannermik sulianut atasut naleqquttumik agguarneqarnissaasa qulakkeerneqarnissaat siunertarivaat.

Akuusup ajorsartup suliame aningaasartuutininik akiliinissaanik aallaavimmik naleqqussaasunik, eqqartuussisarnermik inatsimmi kapitali 20 aamma malittarisassanik arlalinnik imaqarpoq. Akuusooq taamaaliornikkut annertuumik ujariatsissanngippat, suliame pissutsit ajugaasumut avoqqaarliutigineqarsinnaasunik pissuteqartut pissutigalugit, aningaasartuutit pisariaqartinneqartumit annertunerulersut pillugit, eqqartuussiviup akuusooq ajugaasooq illuatungerisamut aamma pisortanut aningaasartuutininik taarsiinissaanik naalakkersinnaagaa, taamaalilluni assersuutigalugu eqqartuussisarnermik inatsimmi § 249, imm. 1-im takuneqarsinnaavoq.

Akuusunut nammineersinnaatitaanngitsunut tunngatillugu, suliami aningaasartuutit pillugit immikkut ittumik malittarisassanik atuuttoqanngilaq. Suliami akuusooq imaluunniit akuusut arlallit nammineersinnaatitaannginnerat apeqquaatinnagit, suliami aningaasartuutit pillugit kapitali 20-imi malittarisassat aallaavigalugit eqqartuussivik taamaalilluni aalajangiinermik aalajangiissaaq. - Nammineersinnaatitaanngitsoq sinnerlugu suliami, angajoqqaatut akisussaatitaasumit saqqummiunneqarsimasumi, aamma assersuutigalugu angajoqqaatut akisussaatitaasup suliap saqqummiunneqarnerani suliap iluamik inernejarnissaa periarfissaqanngitsoq ilisimareersimagaluaraa, nammineersinnaatitaanngitsoq aningaasartuutinik akiliisussatut eqqartuunneqarpat, nammineersinnaatitaanngitsoq pissutsit assigiinngitsut malillugit namminersorsinnaanermik inatsimmi § 53-imi oqaaseqatigiit aappaat malillugu angajoqqaatut akisussaatitaasumut taarsiivigineqarnissamik piunasaqaateqarsinnaavoq. Angajoqqaatut akisussaatitaasup nammineersinnaatitaanngitsumut piaaraluni imaluunniit mianersuaalliorluni ajoqusiineranut, angajoqqaatut akisussaatitaasoq ajoqusiinermut taarsiissuteqarnissamut pisussaatitaasoq, taamaalilluni aalajangersakkami tassani takuneqarsinnaavoq.

2.1.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

Qallunaat eqqartuussisarnermik inatsisaanni inatsisikkut nr. 1464-ikkut, 10. december 2024-imeersukkut aalajangersagaq nutaaq ilanngunneqarpoq, tamatumalu kingorna ukiukitsumut angajoqqaatut akisussaatitaasup, ukiukitsoq sinnerlugu eqqartuussivimmi suliaassamik saqqummiussisimasup, suliami aningaasartuutit, ukiukitsup akuusup akilissallugit pisussaaffissaralui, akilertussanngorpai.

Piareersaataasumik suliat malillugit, taamanikkut qallunaat eqqartuussisarnermik inatsisaanni suliami aningaasartuutit pillugit malittarisassat atuuttut pisuni qaqutigootuni inerniliussat annikinnerusumik naleqquttut kingunerisinnaagaat, Inatsiseqarnermut ministereqarfik isumaqarsimavoq, taakkunanilu suliami, ukiukitsoq sinnerlugu angajoqqaatut akisussaatitaasumit saqqummiunneqarsimasumi, tassani ukiukitsumut suliami aningaasartuutit angajoqqaatut akisussaatitaasup akilersinnaasimanagit imaluunniit akilissallugit kissaatigisimanagit, ukiukitsoq suliami aningaasartuutinik akiliissasoq naalakkerneqarluni. Folketingstidende 2024-25, ilanngussaq A, L 22

saqqummiunneqarsimasoq, quppernerit 22-imiit 23 ilanngullugu innersuussutigineqarput.

Qallunaat eqqartuussisarnermik inatsisaanni malittarisassat allanngortinneqarnerannut isumaliutiginninnerit tunuliaqutaasut aallaavigalugit, Kalaallit Nunaanni eqqartuussisarnermik inatsimmi allanngortitsinerit assigisaat eqqunneqartariaqannginnersut, Inatsiseqarnermut ministereqarfiup isumaliutigisimavaa.

Suliat naleqquttumik pissutissaqarani ingerlanneqartannginnissaannut ilaatigut pissutissaqarluartumik eqqarsaatigisassat, eqqartuussisarnermik inatsimmi sulianut aningaasartuutit pillugit malittarisassat isumagisarpaat. Atuuitsinnginnissaq aamma naleqqussaannissaq pillugit malittarisassat assigiinngitsunik imaqarput, taakkulu suliap inerneranut aamma allakkut pissutsinut allanut naleqqiullugu sulianut aningaasartuutit naleqquttumik agguarneqarnissaat qulakkeerinniffiqatigaat.

Massakkut malittarisassat atuuttut aqutigalugit, nammineersinnaatitaanngitsup suliame, angajoqqaatut akisussaatitaasumit nammineersinnaatitaanngitsoq sinnerlugu saqqummiunneqarsimasumi, suliameut aningaasartuutini akiliisussanngornera pisinnaasarpoq, taamaattoqarneralu Inatsiseqarnermut ministereqarfiup isumaa malillugu, naleqqutinnginnerusutut isigineqarsinnaassaaq. Suliassanngortitsineq imaluunniit aalajangiinerit, suliap ingerlanneqarnissaanut aalajangerneqarsimasut ukiukitsup sunniuteqarfigisimanngippagit, tamanna assersuutigalugu pisinnaavoq. Taamaammat pisut taamaattut ingalassimaniarlugit malittarisassat qanoq ilillutik allanngortinneqarsinnaanerat Inatsiseqarnermut ministereqarfiup isumaliutigisimavaa. Sulisaatsimi, suliame, nammineersinnaatitaanngitsoq sinnerlugu angajoqqaatut akisussaatitaasup saqqummiussaani, suliame aningaasartuutit nammineersinnaatitaanngitsumit akililerneqarnissaat qaqutigorujussuaq pisassasut ilimagineqartariaqarpoq. Kisianni angajoqqaatut akisussaatitaasup – aamma akuusup ukiukitsuunngitsup – suliame aningaasartuutit akilissagai, Inatsiseqarnermut ministereqarfiup isumaa malillugu periarfissaasariaqarpoq.

Tamanna tunngavigalugu suliame aningaasartuutit pillugit eqqartuussisarnermik inatsimmi malittarisassat allanngortinneqartariaqartut Inatsiseqarnermut ministereqarfik isumaqarpoq, taamaalilluni suliame aningaasartuutit pillugit eqqartuussiviup aalajangiinerani, pisut, taakkunani

ukiukitsoq suliassanngortitsinermut aamma suliap ingerlanneqarneranut annikitsuinnarmik sunniuteqarsinnaasimalluni imaluunniit sunniuteqarsinnaasimanani, imaluunniit meeqqap inuusuttulluunniit ukiuisa, pineqartup suliame, ukiukitsoq sinnerlugu angajoqqaatut akisussaataasumut saqqummiunneqartumi, aningaasartuutini akiliinissaa akerlilerneqarluni.

Inersimasut nammineersinnaajunnaarsinneqarsimasut pineqartillugit, suliame aningaasartuutit angajoqqaatut akisussaataasumit akilerneqarnissaasa piumasaqaatigineqarsinnaaneratt pillugit malittarisassaq, angajoqqaatut akisussaataasut ingerlatsinermi aarlerinaatip annertusinera pissutigalugu, nammineersinnaajunnaarsinneqarsimasoo sinnerlugu suliame, ingerlanneqartariaqarluartumik, ingerlatsinissartik ingalassimatitsinissaanik kinguneqaratarsinnaasoo, Inatsiseqarnermut ministereqarfiup isumaqarpoq. Inersimasut nammineersinnaassusiigaasut, ukiukinnerusunut naleqqiullutik nalinginnaasumik aningaasatigut pitsaanerusumik inissisimasutut isumaqarfigineqartariaqarnerat, tassunga aamma ilaavoq. Aammattaaq pisuni amerlanerpaani angajoqqaatut akisussaataasoo tassaasarpoq ukiukitsup angajoqqaava aamma tamanna pissutigalugu ukiukitsumut pilersuinissaminut pisussaataasoo. Inersimasut nammineersinnaajunnaarsitaasimasut eqqarsaatigalugit assinganik pisoqarneq ajorpoq. Tamanna tunngavigalugu inersimasut nammineersinnaajunnaarsitaasimasut pineqartillugit inatsiseqartitsinermi pissutit Inatsiseqarnermut ministereqarfiup isumaa malillugu allanngortittariaqanngillat.

Tamanna tunngavigalugu eqqartuussisarnermik inatsimmi malittarisassamik nutaamik eqqussisoqarnissaa siunnersuutigineqarpoq, tamatumalu kingorna inuk, ukiukitsumut akuusumut angajoqqaatut akisussaataasutut suliassanngortitsisimasoo imaluunniit suliame ingerlateqqitassanngortitsisimasoo, tamakkiisumik ilaannakortumilluunniit suliame aningaasartuutini, ukiukitsup akuusup akiligassaraluinik, akiliisussanngussasoo, eqqartuussiviup aalajangersinnaavaa. Suliame paasissutissat aamma suliap qanoq issusaa tunngavigalugit, ukiukitsup suliame aningaasartuutini akiliisinneqarnissaa naleqquttuunngitsoq eqqartuussiviup naliliinerani, malittarisassaq taamaallaat immikkut ittumik pisuni atuutsinneqassammat, maluginiarneqassaaq.

Ukiukitsup akuusup suliami aningaasartuutunik illuatungerisamut akiliinera, nammineq aningaasartuutiginagu eqqartuussisulersuussinermi imaluunniit eqqartuussisutigoortitsinermi ikiorteqarnissamut sillimmasiissummit matussuserneqanngippat, aalajangersagassatut siunnersuutigineqartoq taamaallaat naleqquttuussaaq. Aammattaaq ukiukitsoq akuusoq taamaanngippat tamakkiisumik ilaannakortumilluunniit illuatungerisamut imaluunniit naalagaaffiup karsianut suliami aningaasartuutitut akiliisussaasussaappat, malittarisassatut siunnersuutigineqartoq malillugu taamaallaat aalajangiisoqarsinnaasussaavoq. Ukiukitsoq tamakkiisumik ilaannakortumilluunniit suliami ajorsartinneqarpat, imaluunniit suliap inernera tassunga naligiissinneqartutut isigineqarsinnaappat, assersuutigalugu piumasaqaatigineqartup pineqartup taamaatiinnartinneqarneranut atatillugu suliaq taamaatitinneqarpat, ilisaqqunnartumik tamanna sulisaatsimi pissaaq.

Suliani ukiukitsoq sinnerlugu angajoqqaatut akisussaatitaasumit saqqummiunneqartuni imaluunniit ingerlateqqitassanngortinneqartuni, malittarisassaq taamaallaat atuutissaaq. Pisuni, taakkunani suliaq ukiukitsoq pillugu eqqartuussivimmut suliaassiisutigineqarluni, kisianni ukiukitsoq sinnerlugu angajoqqaatut akisussaatitaasup illuatungaanit piumasaqammik immikkut eqqartuussutigineqartussamik saqqummiussinerani, pisut matumunnga sanilliunneqassapput. Suliami aningaasartuutit angajoqqaatut akisussaatitaasumut akilerneqartariaqarnersut pillugit, suliap qanoq issusaa aamma ukiukitsup aamma angajoqqaatut akisussaatitaasup aningaasaqarnermut tunngasunik inissisimanerat, eqqartuussiviup aalajangiinermi pingaartittussaassavai. Suliaq ukiukitsup nammineerluni suliffeqarfiutaanut tunngassuteqarpat, imaluunniit ukiukitsoq aningaasaqarnermut tunngasunik inissisimanini malillugu ujariatsinani suliami aningaasartuutit akilersinnaassappagit, Inatsiseqarnermut ministereqarfiup isumaa malillugu aallaaviatigut angajoqqaatut akisussaatitaasup suliami aningaasartuutunik akiliisinneqarnissanut tamanna akerliussaaq. Tamatuma saniatigut ukiukitsup ukiui eqqartuussiviup pingaartissinnaasussaavai. Ukiukitsoq 15-it inorlugit ukioqarpat, angajoqqaatut akisussaatitaasup suliami aningaasartuutunik akiliisussatut naalakkerneqarnissaa pissutissaqartinneqassaaq.

Suliami aningaasartuutit ukiukitsumit namminermi imaluunniit taassuma angajoqqaatut akisussaatitaasuani imaluunniit akisussaatitaasuinit akilerneqassanersut, eqqartuussiviup nammineerluni imaluunniit akuusumit

kajumissaarneqarnermigut isummerfigisussaassavaa. Eqqartuussiviup aalajangiinera suliaq pillugu aamma akuusoq ukiukitsoq pillugu suliami paasisutissat, suliami takussutissianit takuneqarsinnaasut, imaluunniit allakkut eqqartuussivimmut apuussimasut, aallaavigalugit aalajangiiffigineqartussaassaaq. Ukiukitsoq eqqartuussivimmi suliap ingerlanerani nammineersinnaassuseqalerpat, siusinnerusukkut angajoqqaatut akisussaataasooq, ukiukitsoq sinnerlugu suliamik suliassanngortitsisoq, taamaattoqarpat, eqqartuussiviup missiliuina malillugu suliami aningaasartuutit ilaannik, piffissamut ukiukitsup nammineersinnaassuseqalernissaa sioqqullugu tunngassuteqartumut, akiliisussanngortillugu naalakkerneqarsinnaasussaassaaq.

Aammattaaq inatsisissatut siunnersuummi § 1, nr. 1-mut, tassungalu oqaaseqaatinut innersuussisoqarpoq.

2.2. Aalajangiinerit pinngitsaaliilluni akuliunnernut tunngassuteqartut pillugit najuutinngikkaluarluni atortut elektroniskiusut atorlugit peqataaneq

2.2.1. Inatsisit atuuttut

Akuusoq imaluunniit eqqartuussinermi nammineq sinnerluni pisinnaatitaasooq, najuutinngikkaluarluni atortut elektroniskiusut atorlugit peqataanissaa inatsit malillugu eqqartuussiviup aalajangersimappagu, pineqartoq inuttut eqqartuussivimmi peqataasut takkussimasut assigalugit peqataasutut isigineqassasooq, eqqartuussisarnermik inatsimmi § 128-imi takuneqarsinnaavoq. § 128, imm. 2 malillugu eqqartuussinermi nassuiaasooqassappat, § 163-imi aalajangersakkanut naapertuuttumik, akuusoq imaluunniit eqqartuussinermi nammineq sinnerluni pisinnaatitaasooq taamaallaat najuutinngikkaluarluni atortut elektroniskiusut assitallit atorlugit taamaallaat peqataasinnaavoq.

Pineqaatissiinissat pillugit noqqaassummik, eqqartuussiviup peqataanissaanik piumasaqaateqarfiusumik, saqqummiussisoqarpat, pinerluttoqarsimaneranik paasiniaanerup nalaani eqqartuussinerit pineqartillugit, taakku ingerlanneqassapput.

Pinerluttoqarsimaneranik paasiniaanerup nalaani eqqartuussineq aammattaaq noqqaassuteqarnikkut ingerlanneqassaaq tulluuttut pippata, 1) uppersaasat, taamaannagippat annaaneqartussatut aarlerigineqartup, imaluunniit annertuumik ajoqusiinermik imaluunniit eqqartuussivimmut eqqartuussisussamut erninnaartumik kinguartitsinermik

kinguneqartussaassappat, isumannaajarneqarnissaanut pisariaqarpat, 2) pinerluttoqarsimaneranik paasiniaanermut pingaaruteqartutut isumaqarfigineqarpat, 3) tamat soqutigisaat eqqarsaatigalugit naleqquttutut tamanna nalilerneqarpat imaluunniit 4) pissutissalimmik pasisaq immikkoortitaatillugu tigummigallarneqarpat, aamma § 343, imm. 2 malillugu uppersaammik isumannaarinninneq immikkoortillugu tigummigallagaanerup atorunnaarsinneqarnissaanut apeqqut pillugu pingaaruteqarsinnaappat.

Pissutissalimmik pasisaq ajornanngippat eqqartuussinerit tamaasa pillugit nalunaarfigineqassasoq aamma taakkunani najuunnissamik pisinnaatitaataasoq, § 344, imm. 1-p malitsigaa. Tassunga atuutitsinnginnerit arlallit atuupput, matumani kapitalit 36 aamma 37 malillugit eqqartuussiviup sioqqutsisumik pinngitsaaliilluni akuliunnissamik aalajangiinissaa anguniarlugu eqqartuussinerit ingerlanneqartut ilanngullugit.

Inuup nakkutigineqarani inummut allamut nalunaaruteqarsinnaatitaanerani akuliunnermut, nakkutiginninnermut, timikkut akuliunnermut aamma uppersaatinik ujarlernerneq kapitali 36 tunngassuteqarpoq aamma pinerluttoqarsimaneranik paasiniaanerup nalaani pinngitsaaliilluni akuliunnerit allat pillugit kapitali 37 tunngassuteqarpoq. Taakkununga ingerlatsinermi malittarisassat, taakkulu malitsigisaannik eqqartuussinerit arlallit atapput, matumani tamanna pillugu erseqqinnerusumik immikkoortut ataaniittut 2.5.1 aamma 2.6.1 malillugit akuliunnissamat aalajangiinerup eqqartuussivimmit pissarsiarineqarneranut atatillugu.

2.2.2. Inatsiseqarnermut ministereqarfiup isumaliutiginninnera aaqissuussinerlu siunnersuutigineqartoq

Peqqussutikkut nr. 1622-ikkut, 17. november 2020-imeersukkut Politiit Immikkut Paasiniaasartui (PET) pillugu inatsit nr. 604, 12. juni 2023-imeersoq kingusinnerusukkullu allannguutai, Kalaallit Nunaannut atuutilersinneqarpoq. Inatsisip Kalaallit Nunaannut atuutilersinneqarnera sioqqullugu, eqqartuussisarnermik inatsimmi politiinut piginnaatitsissut tunngavigalugu PET Kalaallit Nunaanni piginnaasaqarmat, tassunga atatillugu maluginiarneqassaaq.

Kalaallit Nunaanni eqqartuussisarnermik inatsisip allanngortinneqarnera pillugu inatsisikkut nr. 1781-ikkut, 28. december 2023-imeersukkut

Pinerlunnernut Immikkut Isigisarialinnut Nuna tamakkerlugu Immikkoortoq (NSK) aammattaaq Kalaallit Nunaanni aamma Kalaallit Nunaannut atuussinnaanngorpoq. Aningaasatigut pinerluttuliornerit, aaqqissuussaasumik pinerluttuliornerit aamma qarasaasiamik, qarasaasiakkut attaveqaatinik imaluunniit immikkoortumik attaveqaatit imminnut attaveqaqatigiinnissaannut atassusiisumik atuilluni pinerluttuliornermik suliaqarnerit pillugit suliat annertuumik pisariusut aamma ilungersunartut, NSK-p pinerluttoqarsimaneranik paasiniaaffigisarpai, aamma najukkani eqqartuussivinni, Nunatsinni Eqqartuussivimmi aamma Nunatta Eqqartuussisuuneqarfiani pinerluttulerinermik suliat isumagineqarnissaat NSK-p Kalaallit Nunaanni piginnaatitaanerani ilaatinneqarput.

PET-p aamma NSK-p Kalaallit Nunaanni amerlanertigut sulisunik inissisimatitsinnginnerannik ilaatigut sillimaffiginnittumik, aamma PET-p aamma NSK-p pinerluttoqarsimaneranik paasiniaanermi alloriarnernik arlalinnik nalinginnaasumik Kalaallit Nunaanni Politiinit atorineqarnejortunik, taamaammallu nalinginnaasumik najukkani eqqartuussivinni suliarineqarnejortunik, aamma sillimaffiginnittunik, PET-p aamma NSK-p suliasaminnik suliarinnissinnaanerit pingaaruteqarpoq.

Danmarkimi immikkoortortaqaqfiup sumiiffiinit PET-p aamma NSK-p aallaaviatigut Kalaallit Nunaanni pinerluttulerinermik suliat pinerluttoqarsimaneranik paasiniaavigisarpaat. Pisuni sumiiffik iliuuseqarfiusimasoq Kalaallit Nunaanniitillugu, Kalaallit Nunaanni eqqartuussivinnit aalajangiinernik attuumassuseqartunik pissarsinissaq pisariaqarpoq. Suliani annertuumik pisariusuni aamma ilungersunartuni pinerluttoqarsimaneranik paasiniaanerni alloriarnerit, amerlanertigut tuaviuussatut pissuseqartarput, aamma sukkasuumik eqqartuussivinnit nakkutilliisinnaanissaq alloriarnerit taakku sunniuteqarluarnissaannut pingaaruteqarsinnaavoq. Assersuutigalugu uppersarsaatit aserorterneqarnerat unitsinniarlugu imaluunniit paasissutissat nungutinneqannginneranni isumannaajarniarlugit, tamanna atuuppoq. Pisuni taamaattuni piffissaq ingerlatsinerimi atuuttoq, pingaarutilimmik atuussinnaavoq, aamma ingerlatsinerimi aalajangiinissamut ingerlatseriaatsimi kinguaattoorneq, pinerluttoqarsimaneranik paasiniaanerup iluatsilluarnissaanut ilungersunartumik kinguneqarsinnaavoq.

Taamaammat videomut linki atorlugu aalajangiinernik pissarsisinnaanissaq isumalluutini sipaarfiullunilu aamma sunniuteqarluarnerussaaq, soorlu aamma tamanna inatsisitigut isumannaatsuunissamut tunngatillugu pisariaqartutut nalilernerqartoq, tassami timitalerlugu eqqartuussinikkut eqqartuussiviup aalajangiinerata anguneqarnissaa siunertarlugu PET-p aamma NSK-p Kalaallit Nunaannut pisuni tamani timmisartornissaq utaqqisinnaasusnaanngilaat aamma taamaammat siunertaq pissutiginnarlugu annertunerusumik akuliunnernik, toqqarsimanngisassaraluaminnik aallaartitsisariaqartussaallutik. Videomut linki atorlugu aalajangiinernik pissarsisinnaanermik periarfissap, piffissamik atuiffiusumik angallanneqarnissap aamma timitalerlugu Kalaallit Nunaanni najuunnissap pinngitsoortinnissaa taamaallaat isumannaassanngilaa, kisianni aamma ingerlatsinerit allanngorarnerulersissavai aamma pinerluttulerinermik paasiniaanerni pisariaqartitanut nutaaliaasunut naleqqussarneqarneqarnissaat isumannaassallugit. Piffissaq eqqorlugu eqqartuussinerit suliarineqarnissaat videolinkip periarfississavaa, aamma nunap ilaani akuusut piffinni assigiinngitsuniippata, taamaattoqarneratalu kinguaattoornissanut aarlerinaat, suliap siumut ingerlanneqarnissaanut ajoqusiisinnaasoq, annikillisissallugu.

Aammattaq videolinkinik atuerit eqqartuussivinni digitalikkut ineriartornermut ilapittuutaassaaq aammalu suliani piffissaq pingaaruteqartillugu sukkanerusumik aalajangiinissamut periarfissiissalluni. Eqqartuusseriaatsip atuuttup eqaannerulernissaanut aamma nutaaliaanerulernissaanut tamanna ilapittuutaassaaq, tassani aaqqinnerit tekniskiusut pinerluttulerinermik suliat eqqortumik isumagineqartarnerat ikorfartussavaat.

Najuutinngikkaluarluni atortut elektroniskiusut atorlugit ataatsimeeqataasinnaanermut periarfissaliisummik eqqussisoqarnissaa NSK-p tamanna tunngavigalugu innersuussutigigaa, matumani pinerluttoqarsimaneranik paasiniaanerup nalaani aalajangiinerit pillugit apeqqutit suliarineqarneranni, matumani aamma Danmarkimiit, ingammik inuup nakkutigineqarani inummut allamut nalunaaruteqarsinnaatitaanerani akuliunnerit ilanngullugit.

Videolinkinik atorlugu aalajangiinernik pissarsiniarnissamut periarfissaliissutip eqqunneqarnerata Kalaallit Nunaanni eqqartuussivinni sulisaaseq nutaq kingunerinavianngilaa, kisiannili sulisaatsitut atuuttutut,

eqqartuussivinni atorneqareersutut, qaninnerusumik aaqqissuussineq kingunerissallugu. Taamaalilluni ullumikkut videolinki eqqartuussinert ingerlanneqarneranni aamma aalajangiinernik pissarsiniarnermi, ingammik suliani, sukkasuumik iliuuseqarnissamik piumasaaqateqarfigineqartuni, sakkuutitut sunniuteqarluartutut annertuumik atorneqartarpoq. Suleriaatsip taassuma ajornaatsuunini aamma piffissamik sipaarfiunini takutereersimavaa, aamma taamaammat suleriaatsip pilersinneqareersup taassuma inatsisinngortinneqarnissaa pissusissamisoorpoq.

Pinerluttoqarsimaneranik paasiniaanerup nalaani, kapitali 36 aamma 37 malillugit pinngitsaaliilluni akuliunnissaq pillugu aalajangiinernut tunngassuteqartuni, § 392 malillugu, eqqartuussinerni najuutinngikkaluarluni atortut elektroniskiusut atorlugit politiit aamma suliami illersuisup ivertinneqarsimasup peqataanissaannut, eqqartuussiviup akuersissuteqarsinnaanera pillugu § 343-imi periarfissaliissummik ilanngussisoqarnissaa, tamanna tunngavigalugu siunnersuutigineqarpoq.

Eqqartuussinernut, taakkunani taamaallaat akuliunnerup imaluunniit akuliunnerit sularineqarnissaannut sivitsuinerit taamaallaat isummerfigineqartussaattillugit, periarfissap taassuma pingaarnertut atorneqarnissaa naatsorsuutigineqarpoq.

Kisianni aallarnersaataasumik eqqartuussinerni, taakkunani politiit akuliunnermik sulariaarsinnaanerat pillugu eqqartuussivik isummertussaalluni, peqataasut tamaasa najuutsillugit eqqartuussineq utaqqineqarsinnaatinnagu, najuutinngikkaluarluni atortut elektroniskiusut atorlugit peqataanissamut periarfissap taamaallaat atorneqarnissaa naatsorsuutigineqarpoq.

Inatsisissatut siunnersuummi § 1, nr. 2, tassungalugu oqaaseqaatit innersuussutigineqarput.

2.3. Oqarasuaatikkut oqaluussisumik naalaarneq aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut pillugit aalajangiinernik pissarsiniarnermut suleriaaseq piuminarsagaq

2.3.1. Inatsisit atuuttut

2.3.1.1. Inuup nakkutigineqarani inummut allamut nalunaaruteqarsinnaatitaanerani akuliunneq

Inuup nakkutigineqarani inummut allamut nalunaaruteqarsinnaatitaanera pillugu akuliunneq eqqartuussisarnermik inatsimmi kapitali 36-imi aalajangersarneqarpoq.

Eqqartuussisarnermik inatsimmi politiit inuup nakkutigineqarani inummut allamut nalunaaruteqarsinnaatitaanera pillugu akuliunnerat tassaasinnaapput tulluuttuni taaneqartut 1) § 385 malillugu allakkanik, telegramminik aamma nassiussanik allanik tigummigallaaneq, ammaaneq aamma imaanik ilisimasaqalerneq imaluunniit taassuma ingerlateqqinneqarneraniq unitsitsineq (*allakkanik ammaaneq aamma allakkat unitsinneqarnerat*), 2) § 385 malillugu oqarasuaatikkut oqaloqatigiinnernik imaluunniit assigisaanik nalunaarasuartaatikkut attaveqaatinik naalaarneq (*oqarasuaatikkut oqaloqatigiinnernik naalaarneq*), 3) § 386 malillugu oqarasuaatit imaluunniit attaveqaasersuutitut sakkuutit assigisaat allat sorliit, naak taassuminnga piginnittup taamaaliortoqarnissaanik akuersisummik nalunaaruteqarsimanngikkaluartoq, oqarasuaammut aalajangersimasumut imaluunniit attaveqaasersuutitut sakkuutimut assigisaanut allamut atassuteqartoq, pillugit paasissutissanik pissarsineq (*oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut pillugit paasissutissat*), 4) § 387 malillugu oqarasuaatit imaluunniit attaveqaasersuutitut sakkuutit assigisaat allat sorliit sumiiffimmi erseqqinnerusumi oqarasuaatinut allanut atassuteqartut pillugit paasissutissanik pissarsineq (*oqarasuaatit sorliit sumiiffimmi erseqqinnerusumik taaneqartumi oqarasuaammut aalajangersimasumut atassuteqarsimasutut imaluunniit atassuteqartutut nalilerneqartut pillugit paasissutissat*) aamma 5) § 388 malillugu sakkuut ikiorsiullugu oqaloqatigiinnerit imaluunniit oqaaserisat allat naalaarneqarnerat (*inip anngiortumik naalaarneqarnera*).

Inuup nakkutigineqarani inummut allamut nalunaaruteqarsinnaatitaanerani politiit akuliunnermik suliaqarsinnaanerannut nalinginnaasumik piumasaqaatit, tamarmik

immikkut aalajangersakkani (§§ 385-miit 388 ilanngullugu) aalajangersarneqarput, aamma aatsaat tulluuttut pippata inuup nakkutigineqarani inummut allamut nalunaaruteqarsinnaatitaanerani akuliunneq taamaallaat suliarineqarsinnaasoq taakku malitsigaat, 1) periaaseq pineqartoq malillugu pasineqartumut imaluunniit pasineqartumit nalunaarutini tunniussisoqarnissaa imaluunniit nassiussisoqarnissaa pillugu *aalajangersimasunik pissutissaqartutut* isumaqarfigineqarpat, 2) pinerluttoqarsimanerani paasiniaanermi akuliunneq aalajangiisumik pingaaruteqartutut isumaqarfigineqarpat (*ilisarnaatit pillugit piumasaqaatit*) aamma 3) pinerluttoqarsimanerani paasiniaaneq akuliunnermut erseqqinnersumik immikkut ittumik inatsimmik unioqqutitsinermik immikkut ittumik ingasattumik tunngassuteqarpat (*pinerluttuliorneq pillugu piumasaqaat*).

Akuliunnerup siunertaa, suliap qanoq issusaa aamma ingasassusaa malillugit aamma inummut imaluunniit inunnut, akuliunnermik eqqugaasunut, akuliunnerup ajoqusiinera akuliunnertut naleqqutinngitsutut ituussappat, eqqartuussisarnermik inatsimmi § 389 malillugu inuup nakkutigineqarani inummut allamut nalunaaruteqarsinnaatitaanerani akuliunneq suliarineqassanngilaq.

Inuup nakkutigineqarani inummut allamut nalunaaruteqarsinnaatitaanerani akuliunneq eqqartuussiviup aalajangernerata kingorna pissaaq.

Oqarasuaatit normui, sumiiffiit, najukkat imaluunniit nassiussat taakku, akuliunnermut tunngassuteqartut, eqqartuussiviup aalajangernermini taassavai. Suliami pissutsit piviusut, taakkunani § 391 malillugu akuliunnermut piumasaqaatit naammassineqarnerat taparserneqarluni, aammattaaq taaneqassapput.

§ 391, imm. 2 malillugu, piffissaq, akuliunnerup suliarineqarsinnaaffia, aalajangiinermi aalajangersarneqassaaq. Piffissaq taanna sapinngisamik sivikinnerpaassaaq aamma sapaatit akunneri 4 qaangerneqassanngillat. Politiit noqqaassuteqarnerisa kingorna, eqqartuussiviup piffissaq sivitsorsinnaavaa, kisianni annerpaamik sapaatit akunneri 4-makkaarlugit.

Taamaalilluni inuup nakkutigineqarani inummut allamut nalunaaruteqarsinnaanerani akuliunneq politiit tamanna pillugu eqqartuussivimmit aalajangiinermik pissarseqqaarlutik taamaallaat

suliarisinnaavaat. Eqqartuussiviup aalajangiinerata utaqqineqartussaanera pissutigalugu, akuliunnerup siunertaa maangaannartinneqassappat, taamaattoq § 391, imm. 3 malillugu politiit nammineerlutik akuliunneq pillugu aalajangiisinnaapput aamma tamatuma kingorna – piaarnerpaamik aamma nalunaaquttap akunneri 24 qaangiutsinnagit – suliaq eqqartuussivimmut saqqummiutissallugu. Tamatuma kingorna akuliunneq akuerineqarsinnaanersoq, kiisalu akuliunneq attanneqarsinnaanersoq, taamaappallu piffissami sorlermi, eqqartuussiviup aalajangissavaa. Eqqartuussiviup isumaa malillugu akuliunneq suliarineqarsimasussaanngikkaluarpat, tamanna pillugu Rigsadvokati eqqartuussiviup ilisimatissavaa. Akuliunnerit, eqqartuussiviup isumaa malillugu Politiit Immikkut Paasiniaasartuinit suliarineqarsimasussaanngikkaluit, Inatsiseqarnermut ministereqarfimmut nalunaarutigineqassapput.

Inuup nakkutigineqarani inummut allamut nalunaaruteqarsinnaanerani akuliunnissaq pillugu piumasaqaateqarneq pillugu eqqartuussiviup suliamik suliarinninneranut atatillugu, eqqartuussisarnermik inatsimmi § 392, imm. 1 malillugu inummut, akuliunnermi pineqartumut, illersuisumik ivertitsisoqassaaq, aamma illersuisoq oqaaseqaateqarnissaminik periarfissinneqassaaq.

Eqqartuussisarnermik inatsimmi § 393, imm. 1 malillugu, allakkerinermik suliffeqarfiit, attaveqatigiinnermut attaveqarfiit imaluunniit nalunaarasuartaatinik sullissinermik suliaqartut, inuup nakkutigineqarani inummut allamut nalunaaruteqarsinnaanerani akuliunnissaq pillugu politiit ikiussavaat, matumani oqarasuaatikkut oqaloqatigiinnerit il.il. naalaarneqarnissaannik pilersitsinerit ilanngullugit.

Inuup nakkutigineqarani inummut allamut nalunaaruteqarsinnaanerani akuliunneq naammassippat, imm. 2 malillugu, § 396, imm. 1 malitsigisaanik pingaarnertut malittarisassatut akuliunneq pillugu, taama tulleriillutik, oqarasuaatip pineqartup piginnittuanut (oqarasuaatikkut oqaluttunik naalaarneq aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut imaluunniit atassuteqarsimasutut nalilerneqartut), inummut, sumiiffimmik imaluunniit inimik, oqaloqatigiinnerup ingerlanneqarfigisimasaani imaluunniit oqaaseqaatip saqqummiunneqarfigisimasaani (inip anngiortumik naalaarneqarnera) atuisinnaasumut, aamma nassiussamik nassiussisumut imaluunniit

tiguisumut (allakkanik ammaaneq aamma allakkanik unitsitsineq) nalunaarutiginninnermik tunniunneqassaaq. § 396, imm. 5 malillugu oqarasuaatit sorliit sumiiffinni aalajangersimasuni oqarasuaammut aalajangersimasumut atassuteqarsimanersut imaluunniit atassuteqarsimasutut nalilerneqartut pillugit nalunaarutiginninnermik tunniussisoqassanngilaq.

Eqqartuussisarnermik inatsimmi § 392 malillugu eqqartuussissuserisoq ivertinneqartoq, § 396, imm. 3-mi oqaaseqatigiit pingajuat malillugu nalunaarutiginninnerup assilillugu allaqqinneranik tigussissaaq.

§ 396, imm. 3-mi oqaaseqatigiit siulliit malillugit, eqqartuussivik akuliunneq pillugu aalajangiinnermik aalajangiisimasoq, nalunaarutiginninnermik suliaqartussaavoq. Politiit piffissap, akuliunnissap akuerisaaffiata, naanerata kingorna, kingusinnerpaamik ullut 14-t qaangiunneranni § 396, imm. 3-mi oqaaseqatigiit aappaat malillugit nalunaarutiginninnginnissamik imaluunniit nalunaarutiginninnissap kinguartinneqarnissaanik piumasaqaateqarsimanngippata, nalunaarutiginninneq sapinngisamik piaarnerpaamik tunniunneqassaaq.

Nalunaarutiginninneq pinerluttoqarsimaneranik paasiniaanermut ajoqutaassappat, imaluunniit inatsit malillugu inuup nakkutigineqarani inummut allamut nalunaarsinnaatitaaneramik akuliunnissamut tunngaviusinnaasumik, inatsimmik unioqqutitsineq pillugu suliami ingerlasumi, pinerluttoqarsimaneranik paasiniaanermi ajoqutaassappat, imaluunniit politiit pinerluttoqarsimaneranik paasiniaanermi periaasii isertugaasut illersorneqarnissaannut eqqarsaatigisassat imaluunniit pissutsit assigiinngitsut allakkut nalunaarutiginninnissaq pissutissaqartinngippassuk, § 396, imm. 4-mi oqaaseqatigiit siulliit malitsigisaannik, politiit piumasaqaateqarnerisa kingorna, nalunaarutiginninnerup pinngitsoortinneqarnissaa imaluunniit piffissami erseqqinnerusumik aalajangersakkami kinguartinneqarnissaa eqqartuussiviup aalajangersinnaavaa.

2.3.1.2. Eqqartuussiviup aalajangiinnerani oqarasuaatit normui pillugit piumasaqaat pillugu immikkut

Qulaani taaneqartutut inuup nakkutigineqarani inummut allamut nalunaarsinnaatitaaneramik akuliunnissaq pillugu aalajangiinnermi, eqqartuussisarnermik inatsimmi 391, imm. 1 malillugu, ilaatigut

oqarasuaatit normui, sumiiffiit, najugaqarfiit imaluunniit nassiussat, akuliunnermut tunngassuteqartut, taaneqassapput.

Inuit kikkut oqarasuaataat naalaarneqarsinnaanersut eqqarsaatigalugit, eqqartuussisarnermik inatsimmi § 385, imm. 1, nr. 1 malillugu »periaaseq pineqartoq atorlugu pasisamut imaluunniit pasisamit nalunaaruteqartoqartoq imaluunniit nassiussisoqartoq, aalajangersimasumik pissutissaqartoq isumaqartoqassaaq«.

Oqarasuaatinik naalaarnissaq pillugu malittarisassat ima aaqqissugaapput, oqarasuaat atorlugu pasisamut imaluunniit pasisamit oqaloqatigiinnerit ingerlanneqarnerannik isumaqartoqarpat, taakku politiit naalaarsinnaanerannut nalinginnaasumik akuersissuteqarlutik. Tassa Folketingstidende 2007-08 (katersat aappaat), ilanngussaq A, L 34 saqqummiunneqarsimasoq, qupperneq 1472 malillugu aamma inatsimmut nr. 305-imut, 30. april 2008-imeersumut oqaaseqaatit malillugit, pasineqartup oqarasuaataa imaanngilaq naalaarneqartoq.

Taamaalilluni sulisaatsimi – taakku oqarasuaataannit pasisamut imaluunniit pasisamit nalunaarutini tunniussisoqarnera aalajangersimasumik pissutissaqartut isumaqarfigineqarpat, eqqartuussiviup aalajangiinerani oqarasuaatit, inunnit pasineqartumit allaanerusunit pigineqartut – assersuutigalugu aappassiamit, suliffimmit, angajoqqaanit imaluunniit ilisarisimasanit pigineqartut, ilaatinneqarsinnaasussaapput.

Oqaloqatigiinnerit sorliit naalaarneqarsinnaassanersut eqqarsaatigalugit, inuup nakkutigineqarani inummut allamut nalunaarsinnaatitaanerani akuliunneq pillugu aalajangiinerni, oqarasuaatikkut oqaloqatigiinnerit, piffissami aalajangersimasumi oqarasuaammit, politiit immikkut ittumik pinerluttuliornermut atatillugu atorneqarumaartutut immikkut pasisaannit, ingerlanneqarnissaat, ingerlanneqartut tamarmik ilaatinneqarmata, maluginiarneqassaaq. Matumuuna akuliunnerup tassa inuit tamaasa, pinerluttuliornermut atassuteqaratik oqarasuaammut pineqartumut sianertut imaluunniit oqarasuaammit sianertut, eqqorpai.

2.3.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

Sulisaaseq pisortatigoortoq piuminarsarniarlugu aamma malittarisassat tekniskiusumik ineriartornermut naleqqussarniarlugit, pillaaasarnermik

inatsisip, eqqartuussisarnermik inatsisip aamma inatsisit allat allanngortinneqarnerat pillugit inatsisikkut nr. 542-ikkut, 8. juni 2006-imeersukkut (pinerliiniarnerup akiorneqarnissaanut suliniutit patajaallisarneqarnerat il.il.) qallunaat eqqartuussisarnermik inatsisaanni oqarasuaatip naalaarneqarnissaa imaluunniit pillaaasarnermik inatsimmi kapitali 12-imik imaluunniit 13-imik (pinerliiniarneq il.il.) unioqqutitsinermut atatillugu oqarasuaatit sorliit piffissami aalajangersimasumi oqarasuaammut aalajangersimasumut atassuteqarsinera imaluunniit atassuteqartutut nalilerneqarnersut eqqartuussiviup aalajangiinerani, oqarasuaatit aalajangersimasut taaneqarnerinut taarsiullugu, inuup akuliunnermut tunngassuteqartup taaneqarnissaa periarfissiissutigineqarpoq.

Malittarisassaq kingusinnerusukkut arlaleriarluni annertusineqarpoq, kingusinnerpaamik pillaaasarnermik inatsisip, sakkutuunut pillaaasarnermik inatsisip aamma eqqartuussisarnermik inatsisip allanngortinneqarneri aamma inuiannik toqoraanermut pillaaasarneq pillugu inatsisip aamma sakkulersorluni akerleriinnerit pisillugit kulturikkut naleqartitat illersorneqarnissaat pillugu inatsisip atorunnaarsinneqarneri pillugit inatsisikkut nr. 1674-ikkut, 30. december 2024-immersukkut, tamatumalu kingorna pinerluttoqarsimaneranik paasiniaaneq pillaaasarnermik inatsimmi kapitali 12-imiit 13 a ilanngullugit malittarisassanik imaluunniit § 276 malillugu §§ 123-imik imaluunniit 180-imik, § 183, imm. 2-imik, §§ 191-imik, 191 a-imik imaluunniit 192 a-imik, § 233, imm. 1-imik, §§ 237-imik imaluunniit 245-imik, § 245 malillugu § 246-imik, § 252, imm. 1-imik, § 261, imm. 2-imik, §§ 262 a-imik imaluunniit 262 b-imik, § 286, imm. 1-imik, § 289 a malillugu §§ 288-imik imaluunniit § 289-imik, § 289 a-imik, imaluunniit § 783, imm. 2 malillugu § 290 a, imm. 2-imik unioqqutitsinernik pinerluttoqarsimaneranik paasiniaaneq tunngassuteqarpat, attuutissallutik.

Taassuma malitsigisaanik, politiit sioqqutsisumik eqqartuussiviup aalajangiinera ataaseq pissarsiarisinnaavaat, tassami nalunaarasuartaatitigut atassuteqarnermut atortut sorliit pineqartup atussallugit toqqarnerai apeqqutaatinnagit, inuup oqarasuaatikkut naalaarneqarnissaa pillugu eqqartuussiviup aalajangiinerata, inuup pasineqartup naalaarneqarnissaa periarfissippaa. Sioqqutsisumik eqqartuussivimmit aalajangiinermik taamaattumik periarfissaliissuteqarlutik, politiit ingerlaavartumik oqarasuaatit normuinik, inummit pinerluttuliornernik aalajangersakkami

allatorneqartunik unioqqutitsisut pasineqartumit, aalajangersimasumik pissutissaqarluni isumaqarfigineqartumit, atorneqartunik tamanik naalaarneq aallartissinnaavaat. Assigisaanik inuk pillugu oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilerneqartut pillugit, oqarasuaatit sorliit oqarasuaatinut, pasineqartumut imaluunniit pasineqartumit nalunaarutininik tunniussinissamut atorneqartut aalajangersimasumik pissutissaqarluni isumaqarfigineqartut pillugit, eqqartuussiviit aalajangiinerat ingerlaavartumik paasissutissanik pissarsisinnaanermik periarfissiissapput.

Folketingstidende 2005-06, Ilanngussaq A, spalte 7187-imiit 7190 ilanngullugu aamma 7229-imiit 7230 ilanngullugu aamma kingusinnerusukkut allanngortinneqartoq, kingusinnerpaamik inatsisikkut nr. 1674-ikkut, 30. december 2024-imeersukkut allanngortinneqartoq, Folketingstidende 2024-25, ilanngussaq A saqqummiunneqarsimasoq, qupperneq 41-miit 43 ilanngullugu aamma 92 malillugit inatsisikkut nr. 542-ikkut, 8. juni 2006-imeersukkut ilanngunneqartut, aalajangersakkamut piareersaataasumik suliat innersuussutigineqarput.

Kalaallit Nunaanni eqqartuussisarnermik inatsimmi aalajangersakkap assinganik eqqussisoqarnissaanut tunngavissaqarnersoq, Inatsiseqarnermut ministereqarfiup isumaliutigisimavaa.

Eqqartuussisarneq assigiiaartoq aamma sunniuteqarluartoq qulakkeerniarlugu, pinerluttoqarsimaneranik paasiniaanermut atatillugu politiit pinerluttoqarsimaneranik paasiniaanerminni sakkunik eqqortunik aamma -periaatsinik peqarnissaat pingaaruteqarpoq.

Suliani Kalaallit Nunaanni pinerluffittaqartuni, pinerluttoqarsimaneranik paasiniaarnermi ajornartorsiutaasinnaasut pitsaaliorniarlugit imaluunniit pitsaasumik angusaqarusullutik, sakkut siuningaani qanoq iliuuseqartitsissutaasartut politiit annertuumik atorfissaqartippaat, matumani ingammik oqarasuaatinik naalaarnerit, isertuusaasumik uppersaatinik ujaasinerit aamma oqarasuaat angallattagaq ikumasoq pasineqartumit atorneqartutut isumaqarfigineqartup sumiissusia pillugu paasissutissanik pissarsiniarnermik suliaqarneq ilanngullugit. Sakkut taakku suliani, taakkunani uppersaatait aserorterneqarnissaannut aarlerinaateqarluni, imaluunniit pinerluttuliortartoqatigiit isertorlutik

pinerluttuliortarlutik, sukkasuumik aamma sunniuteqarluartumik qisuariarsinnaajumalluni pingaaruteqarput.

Eqqarsaatigisassat assingi, matumani malittarisassat tekniskiusumik ineriartornermut naleqqussarneqarnissaat ilanngullugit, qallunaat eqqartuussisarnermik inatsisaanni § 783, imm. 2-p eqqunneqarneranut pissutaasut, Kalaallit Nunaannut tunngatillugu aamma atuuttut, Inatsiseqarnermut ministereqarfik isumaqarpoq.

Suliani, taakkuni pasisaq attaveqaasersuutiniq arlalinnik atuilluni, pinerluttoqarsimaneranik paasiniaanerup naleqqussarneqarnissaa siunertaralugu, § 391-imi nutaamik *imm. 2-mik* ilanngussisoqarnissaa tamanna tunngavigalugu inatsisissatut siunnersuummi § 1, nr. 4-imi siunnersuutigineqarpoq, tamatumalu kingorna, oqarasuaatip naalaarneqarnissaa (imaappoq oqarasuaatikkut imaluunniit nalunaarasuartaatitigut atassuteqaatit allat atorlugit oqaluuttunik naalaarneq) imaluunniit pinerluttulerinermi inatsimmi kapitali 7-imiit 8 ilanngullugu malittarisassanik imaluunniit § 65, imm. 1-imi, § 66-imi oqaaseqatigiinnik siullernik, § 68, imm. 1-imi aamma 2-imi, § 69-imi, § 83-imi, § 86-imi, § 90, imm. 2-mik, § 88-imi oqaaseqatigiit siulliit malillugit ingasattumik nakuusernermik, § 92, imm. 1 malillugu kiffaangissusiiaanermik, § 93-imi, § 98, imm. 2-mik, § 102-mi oqaaseqatigiit siulliit malillugit ingasattumik tillinniarnermik, § 111 a malillugu ingasattumik aningaasatigut peqquserluutiniq malunnaarunnaarsaanermik, § 112-imi imaluunniit ikiaroornartut pillugit inatsimmik imaluunniit sakkut pillugit inatsimmik piaaraluni ingasattumik unioqqutitsinermik pinerluttoqarsimaneranik paasiniaanerup atatillugu oqarasuaatit sorliit piffissami aalajangersimasumi oqarasuaammut aalajangersimasumut atassuteqarnersut pillugit paasissutissanik pissarsinissaq pillugit eqqartuussiviup aalajangiinerani, oqarasuaatit normuinut aalajangersimasunut taarsiullugu, inuk akuliunnermi tunngassuteqartoq, taaneqarsinnaasussaassaaq.

Taamaalilluni, oqarasuaatikkut attaveqaqatigiinneq piviusoq imaluunniit nalunaarasuartaatitigut atassuteqarnermi assigisaa alla pineqarnersoq apeqqutaatinnagu, inuup nakkutigineqarani inummut allamut nalunaarsinnaatitaanerani akuliunnerit tamarmik, assersuutigalugu e-mailit, internetikkut- imaluunniit telefaxikkut attaveqaqatigiinnerit eqqartuussisarnermik inatsimmi §§ 385-imiit 386 ilanngullugu

aalajangersakkani ilaatinneqartut aalajangersagassatut
siunnersuutigineqartumi ilaatinneqassapput.

Pinerluttoqarsimanerani paasiniaaneq aalajangersakkanik taaneqartunik unioqqutitsinermut, inatsisinik unioqqutitsinernik ingasattorujussuarnik aamma navianartorujussuarnik, tunngassuteqarpat, aalajangersagassatut siunnersuutigineqartoq taamaallaat atorneqassaaq. Pinerluttulerinermi inatsimmi unioqqutitsinernut sorlernut aalajangersagassatut siunnersuutigineqartumi atorneqarsinnaanersut pillugit Inatsiseqarnermut ministereqarfiup aalajangersaanermini, qallunaat eqqartuussisarnermik inatsisaanni aalajangersakkat taakku ilaatinneqartut aallaavigisimavai, tassami killiliinermut tunngatillugu eqqarsaatigisassat assingi Kalaallit Nunaanni aamma atuuttussaammata. Aalajangersakkat ilaannut, unioqqutitsinerit erseqqissakkat pillugit pillaaasarnermik inatsimmit pinerluttulerinermi inatsimmi immikkut ittumik aalajangersakkanik – assersuutigalugu nakuuserneq aamma tillinniarneq – aalajangersaasoqarfiutinnagu – taakku ingasattumik unioqqutinneqarsimanerisa pineqarnissaat, piumasaqaataassaaq. Ikiaroorartut pillugit inatsimmik aamma sakkut pillugit inatsimmik unioqqutitsinerit pineqartillugit, qallunaat pillaaasarnermik inatsisaanni §§ 191-ip aamma 192 a-p, oqarasuaatit naalaarneqarnissaat imaluunniit inuk pillugu oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilerneqartut pillugit qallunaat eqqartuussisarnermik inatsisaanni § 783, imm. 2-mi ilaatinneqartut, assigisaanik pinerluttulerinermi inatsit aalajangersakkanik immikkut ittunik imaqqanngilaq. Kisianni, taama tulleriillutik, ikiaroorartut pillugit inatsimmik aamma sakkut pillugit inatsimmik piaaraluni ingasattumik unioqqutitsinerit pineqassat, aalajangersagassatut siunnersuutigineqartoq malillugu piumasaqaataassaaq. Assersuutigalugu ikiaroorartunik inunnut amerlasuunut imaluunniit annertuumik akilersilluni tunniussineq imaluunniit aallaasinik imaluunniit sakkunik allanik imaluunniit qaartartunik, taakku immikkut ittumik navianartumik pissuseqarnertik pissutigalugu annertuumik ajoqusiisinnaanermut naleqquttut, pineqarpata tamanna pisinnaavoq.

Oqarasuaatit naalaarneqarnissaat imaluunniit inuk pillugu aalajangiinermi oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilerneqartut pineqartillugit, eqqartuussisarnermik inatsimmi § 386,

imm. 1 malillugu aalajangersagassatut siunnersuutigineqartup siumut sammisumik taamaallaat oqarasuaatit naalaarneqarnissaat imaluunniit inuk pillugu aalajangiinermi oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilernerqartut ilaatissammagit, aamma tunniussisussaataaneq pillugu malittarisassat malillugit, kingumut sammisumik oqarasuaatit naalaarneqarnissaat imaluunniit inuk pillugu oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilernerqartut ilaatinneqassanngimmata, maluginiarneqassaaq. Taamaalilluni inuk pillugu aalajangiineq tunngavigalugu oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilernerqartut pereersut pissarsiarineqarsinnaasusnaanngillat.

Eqqartuussisarnermik inatsimmi § 391, imm. 2-mi oqaaseqatigiinni siullerni oqaasertaliunneqartussatut siunnersuutigineqartoq malillugu, inuk pillugu aalajangiinermi, taama tulleriillutik, oqarasuaatip naalaarneqarnissaanut imaluunniit oqarasuaatinut sorlernut piffissami aalajangersimasumi oqarasuaammut aallamut aalajangersimasumut atassuteqarsimasutut imaluunniit atassuteqartutut nalilernerqartunut piumasaqaatit allat naammassineqarnissaat soorunami piumasaqaatigissavaat. Politiit oqarasuaatip naalaarneqarnissaanik imaluunniit oqarasuaatinut sorlernut piffissami aalajangersimasumi oqarasuaammut aallamut aalajangersimasumut atassuteqarsimasunik imaluunniit atassuteqartutut nalilernerqartunik aallartitsinissamik periarfissaat, aalajangersagassatut siunnersuutigineqartup annertusitissanngilaa, kisianni taamaallaat ingerlatseriaaseq pisortatigoortoq piuminarsisassavaa, taamaalilluni politiit eqqartuussivimmit akuersisummik ataatsimik pissarsinissaat pisariaqalissalluni. Qaqugukkut oqarasuaatip naalaarneqarnissaa il.il. suliarineqarsinnaanersoq pillugu, piumasaqaatit nalinginnaasut, taamaalillutik allanngortinneqaratik ingerlateqqinneqassapput.

Periaaseq pineqartoq atorlugu pasineqartumut imaluunniit pasineqartumit nalunaarutunik tunniussisoqarnera imaluunniit nassiussisoqarnera, aalajangersimasumik pissutissaqartutut isumaqarfigineqarpat, ullumikkutut § 385, imm. 1, nr. 1 aamma § 386, imm. 1, nr. 1 malillugit, eqqartuussisarnermik inatsimmi §§ 385 aamma 386 malillugit inuup

nakkutigineqarani inummut allamut nalunaarsinnaatitaanerani akuliunneq suliarineqarsinnaassammat, tassunga atatillugu erseqqissarneqassaaq. Taamaalilluni oqarasuaat taanna atorlugu inummut pasineqartumut imaluunniit inummit pasineqartumit oqaloqatigiinnerit ingerlanneqarnerat pillugit aalajangersimasumik pissutissalimmik isumaqartoqarpat, oqarasuaatip normuata ataatsip naalaarneqarnera imaluunniit oqarasuaatinut sorlernut piffissami aalajangersimasumi oqarasuaammut aallamut aalajangersimasumut atassuteqarsimasutut imaluunniit atassuteqartutut nalilerneqartut pillugit paasissutissanik pissarsineq taamaallaat suliarineqarsinnaasussaavoq. Qulaani imm. 2.3.1.1. innersuussutigineqarpoq.

§ 391, imm. 2-mi oqaaseqatigiinni siullerni aalajangersagassatut siunnersuutigineqartoq tunngavigalugu, inuk pillugu aalajangiinermi oqarasuaatinut, naalaarneqartunut, ataasiakkaanut imaluunniit oqarasuaatinut sorlernut piffissami aalajangersimasumi oqarasuaammut aallamut aalajangersimasumut atassuteqarsimasutut imaluunniit atassuteqartutut nalilerneqartut pillugit paasissutissanik pissarsinernut tamanut tunngatillugu, § 385, imm. 1, nr. 1-imi, aamma § 386, imm. 1, nr. 1-imi piumasaqaatit taamaalillutik naammassineqarsimasussaapput. Ataani erseqqinnerusumik aallaaserineqartutut, ilaatigut suliami pissutsit piviusut, oqarasuaatit normuinit pineqartunit inummut imaluunniit inummit, akuliunnermut tunngassuteqartumut, nalunaarutinik tunniussisoqarnera pillugu aalajangersimasumik pissutissaqarluni isumaqarnermut tapersiisut pillugit tulliusumik eqqartuussivimmut nalunaaruteqarneq pissaaq.

§ 385, imm. 1, nr. 1-imi, aamma § 386, imm. 1, nr. 1-imi piumasaqaatit saniatigut, inuk pillugu aalajangiinermik piniarluni, inuup nakkutigineqarani inummut allamut nalunaarsinnaatitaanerani akuliunnermut piumasaqaatit nalinginnaasut allat naammassineqarsimanissaat piumasaqaataassaaq. Tamanna assersuutigalugu § 385, imm. 1, nr. 2-mi, aamma § 386, imm. 1, nr. 2 ilisarnaatit pillugit piumasaqaammut, aamma § 389-imi atsikkutigiissitsinissamik piumasaqaammut, aamma § 391, imm. 2 (siunnersuut malillugu § 391, imm. 3-nngortussaq) malillugit aalajangiinermi piffissaq, akuliunnerup suliarineqarfissaa, aalajangerneqarnissanik piumasaqaammut atuupput.

Imm. 2.3.1-imi inatsisit atuuttut pillugit allaaserinninneq aammattaaq innersuussutigineqarpoq.

Qulaani allaaserineqartutut, inuk pillugu aalajangiinermik aamma aalajangiineq taamaattoq tunngavigalugu naalaarnissap aallartinneqarnissaanut imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilerneqartut pillugit paasissutissanik pissarsiniarnerup aallartinneqarnissaanut, oqarasuaatit normuinit ataasiakkaanut tamanut tunngatillugu oqarasuaatip naalaarnissaanut imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilerneqartut pillugit paasissutissanik pissarsiniarnermut piumasagaatit nalinginnaasut naammassineqarsimanissaat piumasagaataassaaq.

Kisianni aalajangersagassatut siunnersuutigineqartup sulisaaseq piuminarsassavaa, taamaalilluni politiit taamaallaat sioqqutsisumik aalajangiinermik ataatsimik pissarsinissaat pisariaqartinneqassaaq. Inuup oqarasuaataanik naalaarnissaq pillugu aalajangiineq taamaattoq, inuup pasineqartup, nalunaarasuartaatitigut atassuteqarneq suugaluartorluunniit pineqartup taassuma atussallugu qinigaa apeqqutaatinnagu, pasineqartup naalaarneqarnissaanik periarfissiissaaq. Sioqqutsisumik aalajangiinermik taamaattumik periarfissiissummik peqarluni, inummit, pinerluttulerinermi inatsimmi aalajangersagassatut siunnersuutigineqartumi aalajangersakkanik allattorneqartunik unioqqutitsisutut pasineqartumit, atorneqartutut aalajangersimasumik pissutissaqartutut isumaqarfigineqartunik, politiit ingerlaavartumik oqarasuaatit normuinit taakkuninnga naalaarneq aallartissinnaasussaavaat.

Taamatuttaaq inuk pillugu aalajangiinerup oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilerneqartut pillugit, oqarasuaatit normuisa sorliit oqarasuaatinut, inuup pasineqartup atugaasut aalajangersimasumik pissutissalimmik isumaqarfigineqartut pillugit, ingerlaavartumik paasissutissanik pissarsiniarsinnaaneq periarfississavaa.

Tamatuma saniatigut pisuni piviusuni, inuup akuliunnermi sammitinneqartup, attaveqaaqatigiissinnaanermut atortunik arlalinnik

atuineranik politiit qularnarunnaarsitsinissaat immikkut ittumik piumasaqaataasariaqanngitsoq, Inatsiseqarnermut ministereqarfik isumaqarpoq. Suliani pinerluttulerinermi inatsimmi aalajangersakkanik pineqartunik unioqquitsinerit pillugit inuk pillugu aalajangiinermik aalajangersaasinnaanermi siunertaasoq, taaneqartutut ingerlatseriaatsip piuminarsarneqarnissaa siunertarineqarmat, Inatsiseqarnermut ministereqarfiup tassunga atatillugu pingaartissimavaa.

Oqarasuaatit – matumani assersuutigalugu IMSI- imaluunniit IMEI-normut – akuliunnermut sammitinneqarsimasut (imaappoq oqarasuaatip normui, naalaarneqarsimasut, imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimasutut imaluunniit atassuteqartutut nalilerneqartut, kiisalu § 385, imm. 1, nr. 1-imi aamma § 386, imm. 1, nr. 1-imi piumasaqaatit malillugit oqarasuaatit normuinit taakkunannga pasineqartumut pasineqartumillu nalunaarutininik tunniussisoqartarnera pillugu aalajangersimasumik pissutissalimmik isumaqartoqarnera pillugit, § 391, imm. 2-mi oqaaseqatigiit aappaanni oqaasertaliussassatut siunnertuutigineqartut malillugit, piffissap, akuliunnerup suliarineqarfigisinnaaffiata naanerata kingorna politiit eqqartuussivik piaarnerpaamik nalunaarfigissavaat.

Politiit eqqartuussivimmut nalunaarutiginninnerat, eqqartuussiviup tamatuma kingorna illersuisumut, § 391, imm. 2-mi oqaaseqatigiit pingajuattut aalajangersagassatut siunnersuutigineqartoq malillugu, eqqartuussisarnermik inatsimmi § 392, imm. 1 malillugu, suliami ivertinneqartumut nalunaaruteqarnissaa siunertaralugu pissaaq. Sulisaatsimi nalunaarutiginninneq taanna eqqartuussiviup illersuisumut ivertinneqarsimasunut, ullumikkut eqqartuussiviup § 396, imm. 3-mi oqaaseqatigiit pingajuat malillugu nalunaarutiginninneq suliarineqartussaareersoq peqatigitillugu, eqqartuussiviup nalunaarutiginninneq taanna amerlanertigut suliarisinnaassavaa. Piffissami tassani akuliunnerup inatsisinut naapertuussusiata allaffissornikkut inaluunniit inatsisilerinermut tunngasumik suliarinniffimmi qaffasinnerusumi, tassani eqqartuussiviup taamaallaat politiit saqqummiussinerat tunngavigisinnaallugu, suliarineqarnissaa naatsorsuutigineqanngilaq. Kisianni nalunaarutiginninnermik tigusaqarnermi kingorna illersuisup ivertinneqarsimasup, tamanna pillugu ataaniittut malillugit, apeqqtut eqqartuussivimmut saqqummiussinnaasussaavaa.

Illersuisoq, § 392, imm. 1 malillugu inuup nakkutigineqarani inummut allamut nalunaaruteqarsinnaatitaanernik akuliunneq pillugu suliani ivertinneqartussa, pasisamut, taassuma soqutigisaanik isumaginnissinnaasumik, illersuisoqareenera apeqqutaatinnagu, ivertinneqassaaq. Taamaalilluni pasisamuinnaq pinnani kisiannili aamma oqarasuaatinik piginnittut, assersuutigalugu naalaarneqartunik, aamma inunnik, annertunerusumik annikinnerusumilluunniit nalaatsornerinnakkut oqarasuaammik taamaattumi oqaloqatigineqaleriasaartut, imaluunniit allakkut akuliunnermit attorneqartut, soqutigisaat illersuisup ivertinneqartup isumagissavai.

Oqarasuaatit normui sorliit naalaarneqarsimasut pillugit, imaluunniit sumi oqarasuaatit sorliit piffissami aalajangersimasumi oqarasuaammik aalajangersimasumik atassuteqarsimasutut imaluunniit atassuteqartutut nalilerneqartut pillugit paasissutissanik pissarsiniarneq aallartinneqarsimanersoq – aamma oqarasuaatit normuinit pineqartunit pasineqartumut imaluunniit pasineqartumit nalunaarutininik tunniussisoqarsimaneranik aalajangersimasumik pissutissaqarluni isumaqarfigineqartut pillugit illersuisumut ivertinneqarsimasumut nalunaarutiginninnerup, akuliunnerup inatsisinut naapertuunnera pillugu apeqqutip eqqartuussivimmut saqqummiunneqarnissaa pillugu eqqartuussisoq periarfississavaa.

Naalaarnerup imaluunniit sumi oqarasuaatit sorliit piffissami aalajangersimasumi oqarasuaammik aalajangersimasumik atassuteqarsimasutut imaluunniit atassuteqartutut nalilerneqartut pillugit paasissutissanik pissarsiniarnerup, inuk pillugu sioqqutsisumik aalajangiineq tunngavigalugu naammassineqartup, inatsisinut naapertuunnera pillugu apeqqut taamaalilluni § 391, imm. 2-mi oqaaseqatigiit sisamaattut aalajangersagassatut siunnersuutigineqartoq malillugu eqqartuussivimmut saqqummiunneqarsinnaavoq. Oqarasuaatit normui piviusut, inuk pillugu aalajangiineq tunngavigalugu politiit naalaarsimasaat imaluunniit oqarasuaatit sorliit piffissami aalajangersimasumi oqarasuaammik aalajangersimasumik atassuteqarsimasutut imaluunniit atassuteqartutut nalilerneqartut pillugit paasissutissat pissarsiarisimasaat eqqarsaatigalugit, eqqartuussivinnik nakkutiginnissinnaanissap qulakkeerneqarnissaa, matumuuna siunertarineqarpoq. Suliaq illersuisumit ivertinneqarsimasumit eqqartuussivimmut saqqummiunneqarpat, inuk pillugu sioqqutsisumik

aalajangiinermi killiliussat iluanni akuliunneq pisimangersoq aamma ilaatigut § 385, imm. 1, aamma § 386, imm. 1 malillugit allakkut oqarasuaatinik naalaarneq aamma oqarasuaatit sorliit piffissami aalajangersimasumi oqarasuaammik aalajangersimasumik atassuteqarsimasutut imaluunniit atassuteqartutut nalilerneqartut pillugit paasissutissanik pissarsineq pisimangersoq, eqqartuussiviup aalajangiiffigissavaa.

Akuliunnerit eqqartuussiviup isumaa malillugu PET-mit suliarineqartussaasimannikkaluartut, § 391, imm. 2-mi oqaaseqatigiit arferngattut aalajangersagassatut siunnersuutigineqartoq malillugu, Inatsiseqarnermut ministereqarfimmut nalunaarutigineqassapput. Pisuni, taakkunani politiit imaluunniit PET, tamanna pillugu sioqqutsisumik eqqartuussivimmit aalajangiinermik peqqaarani (siunertaq malillugu), aamma tulliusumik akuersissuteqarnissaq siunertaralugu eqqartuussivimmut suliaq saqqummiunneqarsimalluni, kisianni akuliunneq eqqartuussivimmit akuerineqarani, ullumikkut eqqartuussisarnermik inatsimmi § 391, imm. 3-mi oqaaseqatigiit sisamaanni aamma tallimaanni atuuttut (inatsisissatut siunnersuut malillugu § 391, imm. 4-imi oqaaseqatigiit sisamaattut aamma tallimaattut inissittut) taakkua assigaat.

Inatsisissatut siunnersuummi § 1, nr. 3 aamma 4, taakkunungalu oqaaseqaatit innersuussutigineqarput.

2.4. Isertuussaasumik uppersarsaatinik ujaasinermut atatillugu isertuussaasumik arsaarinninneq

2.4.1. Inatsisit atuuttut

Pinerluttulerinermik suliap ataani pinerluttoqarsimaneranik paasiniaanerup nalaani, politiit piumasaqaatit ilaasa ataanni pinngitsaaliilluni akuliunnerit arlallit suliarisinnaavaat, matumani ilaatigut taakku pillugit eqqartuussisarnermik inatsimmi malittarisassat malillugit uppersarsaatinik ujaasineq, tunniussisussaataaneq aamma arsaarinninneq.

2.4.1.1. Uppersarsaatissanik ujaasineq

Init aamma pequtit uppersarsaatinik ujaasiffigineqarnissaannik politiit suliaqarsinnaanerut, eqqartuussisarnermik inatsimmi kapitali 36-imi (§§ 409-miit 416 ilanngullugu) malittarisassiuunneqarpoq. ,

Aalajangersakkami imm. 1, nr. 1 malillugu, illuatungaani najukkat, aamma illuni init allat, takussutissiat, pappiaqqat assigisaallu kiisalu aalajangersakkami imm. 1, nr. 2 malillugu, pequtit parnaaqkasut imaannik, illuatungaani pequtit kiisalu init illup inaasa avataaniittut uppersaatinik ujaasiffigineqarnissaat, eqqartuussisarnermik inatsimmi § 409-imi-imi immikkoortinneqarput.

Pisuni, taakkunani pasineqartoq inimik imaluunniit peqummik (§ 410) atuisinnaalluni, aamma pisut, taakkuni ini imaluunniit pequt pasineqartup atorsinnaanagu (§ 411), aammattaaq immikkoortinneqarput.

Pineqartup inatsimmik unioqqutitsinermut, pisortanit unnerluussutigineqartussamik, naleqquttumik pissutissaqarluni pasineqarnera, aamma eqqartuussisarnermik inatsimmi § 410, imm. 1 malillugu uppersaatinik ujaasineq pinerluttoqarsimaneranik paasiniaanermut annertuumik pingaaruteqartussatut isigisariaqarnera, pasisami uppersaatinik ujaasinermi piumasaqaatit piumasaqaatigineqarput.

Qulaani pineqartut malillugit, suliap inatsimmik unioqqutitsinermik, inatsit malillugu parnaarussivimmi inissinneqarnissamik kinguneqarsinnaasumik, imaluunniit § 410, imm. 2 malillugu pissutsit aalajangersimasut pissutigalugit suliami uppersaatat imaluunniit pequtit arsaarinnissutaasinnaasut, uppersaatinik ujaasinermi nassaarineqarsinnaasut isumaqartoqarpat, tamatuma saniatigut § 409, imm. 1, nr. 1-imi taaneqartutut pissuseqartumik uppersaatinik ujaasineq tunngassuteqassasoq, tamatuma saniatigut piumasaqaataavoq.

Pinerluttoqarsimaneranik paasiniaaneq, inatsimmik unioqqutitsinermik, inatsit malillugu parnaarussivimmi inissinneqarnissamik kinguneqarsinnaasumik tunngassuteqarpat, aamma § 411, imm. 1 malillugu pissutsit aalajangersimasut pissutigalugit suliami uppersaatat imaluunniit pequtit arsaarinnissutaasinnaasut, uppersaatinik ujaasinermi nassaarineqarsinnaasut isumaqartoqarpat, pasineqanngitsumi uppersaatinik ujaasineq taamaallaat suliarineqarsinnaavoq. Pineqartoq uppersaatinik ujaasinissamut allakkatigut akuersissuteqarpat imaluunniit aalajangersakkami imm. 3 malillugu nassaamut imaluunniit pinerluttoqarsimaneranik nalunaarutiginninnermut atasumik pineqartumit akuersissut tunniunneqarpat, uppersaatinik ujaasineq aammattaaq suliarineqassaaq.

Inuit, § 143-imi malittarisassat malillugit (ilagiinni naalagaaffiup tapersersugaani imaluunniit uppeqatigiinni palasit, ajoqit, oqaluffimmi suliassaqartut, nakorsat, illersuisut, eqqartuussissuserisut aamma eqqartuussinermi nammineq sinnerluni pisinnaatitaasut) suliami ilisimannittutut nassuiaammik nassuiaateqarnissamut ilaaqqusaanngillat, pasineqartup aamma inuup pineqartup akornani allakkatigut nalunaarutit assigisaallu kiisalu pineqartoq pillugu taassuma allakkiai assigisaalu, uppersaatinik ujaasinermi ilaatinneqassanngillat. Inunni, § 145-imi ilaatinneqartuni (aaqqissuisuni sulisunilu aaqqissuisuneersuni), atortussat, pissutsit pillugit paasissutissanik imaqartut, pineqartut § 145 malillugu suliami ilisimannittutut nassiaanissamik pisussaajunnaarsinneqassutigisaat, uppersaatinik ujaasinermi ilaatinneqanngillat.

§ 409, imm. 1, nr. 2-mi taaneqartuni pequtini imaluunniit inini, pasineqartup atorsinnaasaani, uppersaatinik ujaasinissaq pillugu aalajangiinerit, § 412, imm. 1 malillugu politiinit aalajangerneqassapput. Pisuni allani uppersaatinik ujaasineq pillugu aalajangiineq (qulaani taaneqartut malillugit pasineqanngitsumi, akuersissummik tunniussisimasumi, uppersaatinik ujaasineq minillugu), eqqartuussisarnermik inatsimmi § 412, imm. 2 malillugu eqqartuussivimmit aalajangerneqassaaq. Eqqartuussiviup aalajangiinissaata utaqqineqarnera pissutigalugu, misissuinerup siunertaa maangaannartinneqassappat, taamaattoq politiit uppersaatinik ujaasinerup suliarineqarnissaa aalajangersinnaavaat. Taamaattoqarpat, inuk attuumassuteqartoq tamanna pillugu noqqaassuteqarpat, piaarnerpaamik aamma kingusinnerpaamik nalunaaquttap akunneri 24-it 3-soriarlugit qaangiutsinnagit, suliaq eqqartuussivimmut saqqummiutissavaat, eqqartuussiviullu § 412, imm. 3 malillugu akuliunneq akuerineqarsinnaanersoq aalajangissavaa.

Uppersaatinik ujaasineq ininut imaluunniit pequtinut, pasineqartup atorsinnaasaanut, tunngatinneqarpat, aamma taassuma uppersaatinik ujaasinerup ingerlanneqarnissaa allakkatigut akuersissutigippagu, § 412, imm. 5 malillugu uppersaatinik ujaasineq pillugu aalajangiineq aamma politiinit suliarineqarsinnaavoq.

Eqqartuussisarnermik inatsimmi § 413 malillugu, tunngaviusumik atsikkutigiissaarisqaarnissaanik piumasaqaat aammattaaq atuuppoq,

kiisalu § 414 malillugu uppersaatinik ujaasinerup, pissutsit assigiinngitsut malillugit qajassuarnarpaamik suliarineqarnissaanik piumasaqaateqarpoq.

Eqqartuussisarnermut inatsimmi § 414, imm. 2 naapertorlugu inuk, uppersaatinik ujaasinerup suliarineqarfiusoq, imaluunniit taassuma peqannginnerani inuit allat, piffimmi tassaniittut, pineqartut uppersaatinik ujaasisoqarneranik aammalu tassunga tunngaviusut pillugit ilisimatinneqassapput kiisalu uppersaatinik ujaasinerup isiginnaarsinnaanerani kajumissaarneqassallutik. Eqqartuussiviup aalajangiinera tunngavigalugu uppersaatinik ujaasineq suliarineqarpat, noqqaassuteqarnerup kingorna taanna takutinneqassaaq. Uppersaatinik ujaasineq § 412, imm. 3 malillugu suliarineqarpat, apeqqutip eqqartuussivimmut saqqummiunneqarsinnaanera pillugu politiit pineqartoq ilitersussavaat. Tamanna piffissamut tunngasumik imaluunniit pinerluttoqarsimaneranik paasiniaanerup tunngasumik pissutsit akerlerinngippassuk, inuup, uppersaatinik ujaasinerup suliaqarfigeqartup, pinertumi ilisimannittut toqqarneqartup uppersaatinik ujaasinerup najuunnissaa piumasaqaatigisinnaavaa. Uppersaatinik ujaasinerup siunertaata tamanna pisariaqartippagu, matumani uppersaatinik ujaasinerup naammassineqarnissaanut akornusersuisoqarpat, uppersaatinik ujaasinerup suliarineqarnerani inuit sumiiffimmi tassani najuuttut peerneqarnissaat, politiit aalajangersinnaavaat.

Inunni uppersaatinik ujaasinerup suliarineqarneranni angerlarsimasoqanngippat, § 414, imm. 3 malillugu pineqartup najugaqatai ajornanngippat marluk, imaluunniit ilisimannittut allat marluk, uppersaatinik ujaasinerup isiginnaartussatut aggersarneqassapput.

Inuk, uppersaatinik ujaasinerup suliarinniffiusoq, uppersaatinik ujaasinerup najuutinngippat, § 414, imm. 3 malillugu tamanna pillugu pineqartoq politiit nalunaaruteqarfigissavaat. Uppersaatinik ujaasineq § 412, imm. 3 malillugu suliarineqarpat, apeqqutip eqqartuussivimmut saqqummiunneqarsinnaanera pillugu politiit pineqartoq ilitersussavaat.

Uppersaatinik ujaasineq, pasineqartoq imaluunniit allat tamanna pillugu ilisimatinnagit suliarineqarnissaa, pinerluttoqarsimaneranik paasiniaanerup aalajangiisumik pingaaruteqarpat,

pinerluttoqarsimaneranik paasiniaaneq pinerluttulerinermi inatsimmi kapitali 7-imik imaluunniit 8-mik imaluunniit § 65, imm. 1-imik, § 66-imi oqaaseqatigiinnik siullernik, § 67-imik, § 68, imm. 1-imik aamma 2-mik, § 69-imik, § 71-imik imaluunniit § 86-imik piaaraluni unioqqutitsinermik, imaluunniit ikiaroonartut pillugit inatsimmik imaluunniit sakkut pillugit inatsimmik piaaraluni ingasattumik unioqqutitsinermik tunngassuteqarpat, § 415, imm. 1 malillugu, § 414, imm. 2-mi oqaaseqatigiinnit siullernit oqaaseqatigiit sisamaat ilanngullugu aalajangersakkat malillugit, imm. 3-mi aamma 4-mi malittarisassat avaqqunneqassasut, eqqartuussiviup aalajangersinnaavaa. Taamaattoq illumi ininik, ininik allanik imaluunniit pequtunik, inuit, § 143-mi malittarisassat malillugit iserfigeqqusaanngitsunik, imaluunniit § 145-imi malittarisassani suliami ilisimannittutut nassuiaammik nassuiaanissamik pisussaajunnaarsitaasut atorsinnaasaanni, uppersaatinik ujaasinernut tamanna atuutinngilaq. Aalajangiineq aalajangiinikkut tunngavilersorneqartussakkut aalajangerneqassaaq.

§ 391, imm. 2-mi aamma 3-mi, § 392-imi aamma § 396-imi malittarisassat isertuussaasumik uppersaatinik ujaasinermi taamatuttaaq atuutissasut, § 415, imm. 2-p malitsigaa. Taamaalilluni § 391, imm. 2-mut innersuussineq malillugu, aalajangiinermi piffissaq sapaatit akunneri 4 tikillugit sivistigisoq, uppersaatinik ujaasinerup suliarineqarfissaa, eqqartuussiviup aalajangiinermi aalajangersassavaa. Eqqartuussiviup aalajangiinerata utaqqineqartussaanera pissutigalugu akuliunnerup siunertaa maangaannartinneqassappat, taamaattoq § 391, imm. 3-mut innersuussineq malillugu politiit isertuussaasumik uppersaatinik ujaasinerup suliarineqarnissaa aalajangersinnaavaat. Taamaattoqarpat akuliunnerup aallartinneranit piaarnerpaamik aamma kingusinnerpaamik nalunaaquttap akunneri 24-it qaangiutsinnagit suliaq eqqartuussivimmut saqqummiutissavaat.

Eqqartuussiviup aalajangiinera sioqqullugu, inummut uppersaatinik ujaasinermi tunngassuteqartumut, illersuisumik ivertitsisoqassaaq, aamma § 392-imut innersuussineq malillugu illersuisoq oqaaseqarnissaminut periarfissinneqassaaq. Assersuutigalugu nalunaarutiginninneq pinerluttoqarsimaneranik paasiniaanermut ajoqutaassappat, imaluunniit pinerluttoqarsimaneranik paasiniaanerminni politiit periaasii pillugit paasissutissat isertuussaasut illersorneqarnissaannut eqqarsaatigisassat taamaaliortoqarnissaa akerlilerpassuk, politiit noqqaassuteqarnerisa kingorna, nalunaaruteqarnermik pinngitsoortitsinissaaq imaluunniit

kinguartitsinissaq eqqartuussiviup aalajanginngippagu, uppersarsaatiniq ujaasinerup naanerata kingorna akuliunneq pillugu nalunaaruteqartoqassaaq.

Eqqartuussisarnermik inatsimmi § 415, imm. 3 malillugu, uppersarsaatiniq ujaasinerup qaqugukkut suliarineqarsinnaaneranut piffissaliussap aalajangerneqartup iluani, isertuussaasumik uppersarsaatiniq ujaasinerit uteqqiattut suliarineqarsinnaasut, aammattaaq eqqartuussiviup aalajangersinnaavaa.

2.4.1.2. Arsaarinninneq tunniussisussaataitanerlu

Politiit arsaarinninnermik aamma tunniussisussaataitanermik suliaqarsinnaataitanerat eqqartuussisarnermik inatsimmi kapitali 37-imi malittarisassiuunneqarpoq.

Arsaarinninneq tassaavoq pequtiniq aalajangersimasunik imaluunniit pisuussutiniq atuisinnaanermik arsaarinninneq aamma eqqartuussisarnermik inatsimmi § 417, imm. 1 malillugu suliarineqarsinnaalluni tulluuttut pippata 1) atortut uppersarsaataasunik isumannaajarneqarnissaannut, 2) pisortat arsaarinninnissamut, akiliisitsinissamut aamma sulianut aningaasartuutunut piumasaqaataasa isumannaajarneqarnissaannut, 3) eqqunngitsuliorfigineqartup utertitsivigineqarnissamut imaluunniit taarsiivigineqarnissamut piumasaqaataasa isumannaajarneqarnissaannut aamma 4) unnerluussaasoq suliap malersooqqinneqarnerani sumiginnaatillugu.

Eqqartuussisarnermik inatsimmi § 418, imm. 1 aamma 2 malillugit, pequtit pasineqartup atorsinnaasaasa aamma pasineqartup pigisaasa nalillit akornanni immikkoortitsisoqarpoq.

Pequtit, pasineqartup atorsinnaasaasa, arsaarinnissutigineqarnissaannut piumasaqaatit tassaapput, pineqartup naleqquttumik pissutissaqarluni inatsimmik unioqqutitsisimaneq, pisortanit unnerluussutigineqarsinnaasumik pasineqarnera, aamma pequtit uppersarsaatitut atorneqarsinnaanera imaluunniit arsaarinnissutaasariaqarneranik pissutissalimmik isumaqartoqarnera, imaluunniit inatsimmik unioqqutitsinermi eqqartuussisarnermik inatsimmi § 418, imm. 1 malillugu inummit, utertillugu piumasaqaateqarsinnaasumit, tiguneqarsimanera.

Pasineqartup pigisaanik nalilinnik arsaarinnissuteqarnissamut piumasaqaatit tassaapput, pineqartoq naleqquttumik pissutissaqarluni inatsimmik unioqqutitsinermut, pisortani unnerluussissutaasinnaasumik, pasineqarnera, aamma pinerluttulerinermi inatsimmi § 166, imm. 1-imi oqaaseqatigiinni siullerni pineqartup aappaa, aamma oqaaseqatigiit aappaat, aamma imm. 4, § 168, imm. 5, aamma § 170-imi oqaaseqatigiit aappaat malillugit, akiliisitsissummik akiliinissamik piumasaqaatip, suliami aningaasartuutit akilernerneqarnissaannut piumasaqaatip imaluunniit eqqartuussisarnermik inatsimmi § 418, imm. 2 malillugu eqqunngitsuliorfigineqartup suliami taarsiivigineqarnissamik piumasaqaataata isumannaajarneqarnissaanut arsaarinninnerup pisariaqartinneqartutut isigineqarnera.

Eqqartuussisarnermik inatsimmi § 420-imi malittarisassiuunneqartup, pasineqanngitsup pequtimik takutitsinissaa imaluunniit tunniussinissaa, tunniussisussaataitaneq pillugu naalakkiutip kinguneraa. Tunniussisussaataitanermik naalakkiuteqarnerup kingorna pequt tunniunneqarpat, § 420, imm. 2 malillugu arsaarinninneq pillugu § 419, imm. 1-imi malittarisassat taamatuttaaq atuutissapput.

Pequt, pineqartup atorsinnaasaa, uppersarsaatitut atorineqarsinnaasooq, arsaarinnissutaasariaqartoq pissutissalimmik isumaqarfigineqarpat, imaluunniit § 420, imm. 1 malillugu, inatsimmik unioqqutitsinikkut inummit, utertinneqarnissaanik piumasaqaateqarsinnaasumit, tiguneqarsimappat, tunniussisussaataitanermik naalakkiut nalunaarutigineqarsinnaavoq. Taamaattoq § 420, imm. 4 malillugu, § 142-imiit 145 ilanngullugu malillugit, pineqartoq ilisimannittutut nassuiaammik naasuaateqarnissamit ilaatinneqartussaannngiffianit imaluunniit pisussaajunnaarsitaaffianit, taamaaliornikkut paasissutissat saqqummissappata, tamanna atuutissanngilaq. Sulisaatsimi tunniussisussaataitaneq amerlanertigut takussutissianut tunngassuteqartarpoq aamma ilaatigut assersuutigalugu aningaaseriviup bankimi kontop piunera pillugu paasissutissanik tunniussinissaanut atorineqartarluni.

Arsaarinninnissaq aamma tunniussisussaataitaneq pillugit aalajangiineq eqqartuussisarnermik inatsimmi § 422, imm. 2 malillugu eqqartuussivimmit aalajangiinikkut aalajangerneqartarpoq. Uppersarsaatinik ujaasinertut taamaattoq, § 422, imm. 9 malillugu allakkatigut akuersissummik nalunaaruteqartoqarpat, imaluunniit § 422,

imm. 4 malillugu akuliunnerup siunertaa taamaanngippat maangaannassappat, politiit aalajangiisinnaapput.

Uppernarsaatinik ujaasineq assigalugu, arsaarinninnermut aamma tunniussisussaataitaanermut atsikkutigiissitsinissamik tunngavik atuuppoq, taannalu eqqartuussisarnermik inatsimmi § 421-imi aalajangersarneqarpoq. Tunniussisussaataaneq, ileqqut malillugit arsaarinninnermut qinigassatut allatut qajassuarnerusutut isigineqartariaqartoq, atortup taassuma naammattutut isumaqarfigineqarnerani, atorneqassaaq.

2.4.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

Pillaasarnermik inatsisip aamma eqqartuussisarnermik inatsisip allanngortinneqarneri pillugit inatsisikkut nr. 1552-ikkut, 21. december 2010-imeersukkut, qallunaat eqqartuussisarnermik inatsisaanni § 807 e-mi isertuussaasumik arsaarinninnermik suliaqarsinnaaneq pillugu aalajangersagaq erseqqissoq ilanngunneqarpoq. Qallunaat eqqartuussisarnermik inatsisaanni isertuussaasumik uppersarsaatinik ujaasineq pillugu malittarisassanut piareersaataasumik suliani, pisut ilaanni, pineqartoq ilisimateqqaarnagu, aamma arsaarinnittoqarsinnaanera, naatsorsuutigineqareersoq, kisianni taamaaliortoqarnissanut periarfissaliissummik erseqqissumik ilanngussisoqartariaqaraluartoq, Inatsiseqarnermik ministereqarfik isumaqartoq, tassunga atatillugu piareersaataasumik suliani takuneqarsinnaavoq. Folketingstidende 2010-11 (katersat siulliit), ilanngussaq A, L 54 saqqummiunneqarsimasoq innersuussutigineqarpoq.

Isertuussaasumik uppersarsaatinik ujaasineq pillugu eqqartuussisarnermik inatsimmi § 415-imut piareersaataasumik suliani qallunaat eqqartuussisarnermik inatsisaanni § 799-imut innersuussuseqarpoq, tassanilu Folketingstidende 2007-08 (katersat aappaat), ilanngussaq A, qupperneq 1488-imiit 1489 ilanngullugu malillugit, Kalaallit Nunaanni tamakkerluni eqqunneqarnissaa siunnersuutigineqarpoq. Taamaalilluni aalajangersagaq tassunga naapertuuttumik paasineqartariaqarpoq, matumani isertuussaasumik arsaarinnissinnaanermut periarfissamut naleqqiunnera ilanngullugu. Qallunaat eqqartuussisarnermik inatsisaanni § 807 e-mut innersuussillutik, eqqartuussisarnermik inatsimmi isertuussaasumik arsaarinninnermik suliaqarsinnaaneq pillugu assigisaanik periarfissaliissummik erseqqissumik eqqussisoqarnissaa,

unnerluussisussaataitaasut innersuussutigisimavaat. Tamanna tunngavigalugu aalajangersakkamik nutaamik, isertuussaasumik arsaarinninnerup suliarineqarsinnaaneramik erseqqissumik periarfissaliissummik ilanngussisoqarnissaa siunnersuutigineqarpoq.

Aalajangersagassatut siunnersuutigineqartoq ima ilusilersorneqassaaq, isertuussaasumik arsaarinninnermik suliaqarnissamut, taamaaliornerup pinerluttoqarsimaneranik paasiniaanermut aalajangiisumik pingaaruteqarnissaa piumasaqaataassalluni.

Eqqartuussisarnermik inatsimmi § 415, imm. 2 malillugu isertuussaasumik uppersaatinik ujaasisarnermut ingerlatseriaatsimi malittarisassat assingi isertuussaasumik arsaarinninnermut atuutissasut, aammattaaq siunnersuutigineqarpoq. Assersuutigalugu nalunaarutiginninneq pinerluttoqarsimaneranik paasiniaanermut ajoqutaassappat, imaluunniit pinerluttoqarsimaneranik paasiniaanerminni politiit periaasii pillugit paasissutissat isertuussaasut illersorneqarnissaannut eqqarsaatigisassat taamaaliorneqarnissaa akerlilerpassuk, politiit noqqaassuteqarnerisa kingorna, nalunaaruteqarnermik pinngitsoortitsinissaq imaluunniit kinguartitsinissaq eqqartuussiviup aalajanginngippagu, eqqartuussiviup isertuussaasumik arsaarinninneq pillugu aalajangiinnermik aalajangiisariartussaaneramik imaluunniit taassuminnga tulliusumik akuersissuteqartussaasariaqarneramik, inummut akuliunnermi tunngatinneqartumut illersuisumik ivertitsisoqartussaasariaqarneramik, qulaani imm. 2.4.1.-imi erseqqinnerusumik allaaserineqartut, malittarisassat taakku ingammik kingunerissavaat.

Palasit, nakorsat, illersuisut, eqqartuussissuserisut aamma eqqartuussinnermi nammineq sinnerluni pisinnaatitaasut pillugit eqqartuussisarnermik inatsimmi § 143 malillugu, imaluunniit aaqqissuisut aamma aaqqissuinnermi sulisut pillugit § 145 malillugu, pinerluttulerinnermik suliami tassani piviusumi ilisimannittuusut aamma suliami nassuiaanissami mininneqartut, eqqartuussisarnermik inatsimmi § 415, imm. 1-imi oqaaseqatigiit aappaata malitsigimmagu, maluginiarneqassaaq.

Inunni taaneqartuni isertuussaasumik arsaarinninnissamik suliaqarnissamut periarfissaq, aalajangersagassatut siunnersuutigineqartup aamma pisinnaajunnaarsippaa.

Inatsisissatut siunnersuummi § 1, nr. 5, tassungalu oqaaseqaatit innersuussutigineqarput.

2.5. Sioqqutsisumik piffissamik aalajangersaasinnaaneq

2.5.1. Inatsisit atuuttut

Politiit allakkamik unnerluussummik eqqartuussivimmut tunniussissasut, aamma suliaq tunniussinikkut eqqartuussivimmi aallartinneqartoq, eqqartuussisarnermik inatsimmi § 441, imm. 1-p malitsigaa. Allakkap unnerluussutip eqqartuussiviummut tunniunneqarnerata peqatigisaanik, imm. 2 malillugu taanna unnerluunneqartumut nassiunneqassaaq. Allagaq unnerluussut pingaarnertut isumaqatigiinniarnissamut aggersaaneq peqatigalugu nalunaarutigineqassasoq, aamma pingaarnertut isumaqatigiinniarneq sioqqullugu sapaatip akunnera ataaseq kingusinnerpaamik sioqqullugu, tamanna pissasoq, taassuma aammattaaq malitsigaa. Pisuni pisariaqavissuni, imm. 3 malillugu tamanna unnerluussaasup eqqarsaatigineqarnissaanut katigunneqarsinnaappat, eqqartuussiviup imm. 2-mi piffissaliussaq aalajangiunneqartoq avaqqussinnaavaa.

Eqqartuussisarnermik inatsimmi § 447, imm. 1 malillugu, tamanna pisariaqartinneqartutut nalilernerqarpat, suliami pissutsit aamma inatsisilerinermut tunngasut piviusut pillugit akuusut inissisimanerisa aalajangersarneqarnissaat siunertaralugu, eqqartuussivik immikkut piareersaataasumik ataatsimiinnissamut aggersaasinnaavoq, matumani pissutsit sorliit assortorneqannginnersut, aamma suut uppersaasersorneqassanersut, kiisalu pingaarnertut isumaqatigiinniarnissap aaqqissuunneqarnissaa ilanngullugit. eqqartuussineq tamanut ammanngilaq. § 447, imm. 1 malillugu, unnerluussaasup najuutinngikkaluarluni atortut elektroniskiusut assitallit ikiorsiullugit peqataanissaa pillugu eqqartuussisarnermik inatsimmi § 466, taamatuttaaq atuutissaaq. Imm. 1 malillugu piareersaataasumik ataatsimiinnermi, unnerluussaasoq imaluunniit taassuma illersuisua najuuppat, § 465-imut naapertuuttumik uppersaasatit saqqummiunneqarsinnaapput. Eqqartuussinerup ilaa taanna, § 447, imm. 2 malillugu tamanut ammavoq.

Eqqartuussisarnermik inatsimmi § 449, imm. 1 malillugu, politiit, unnerluunneqartoq aamma illersuisoq, pingaarnertut isumaqatigiinniarnissamut piffissaq aamma sumiiffissaq taallugu, eqqartuussiviup aggersassavai.

Allakkamik unnerluussummik saqqummiussinermut atatillugu, unnerluussisussaataasut allakkamik unnerluussummik eqqartuussivimmut tunniussippata, suliap siuarsarneqarnissaanut pingaarnertut akisussaasuusoq taamaalilluni malittarisassat atuuttut malillugit eqqartuussivimmut nuunneqassapput. Pingaarnertut isumaqatigiinniarnissamut aggeqqusineq peqatigalugu allagaq unnerluussut nalunaarutigineqassasoq, eqqartuussisarnermik inatsimmi § 441, imm. 2-mi takuneqarsinnaavoq. taamaalilluni piffissaliineq tamanna malillugu, unnerluussutip tunniunneqarnerata kingorna aatsaat pissaaq.

2.5.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

Ingammik suliani, taakkunani pingaarnertut isumaqatigiinniarneq ullunik eqqartuussiviusunik amerlasoorujussuarnik sivilissuseqartussatut naatsorsuutigineqartillugu kiisalu suliani arlalinnik unnerluussaasoqarfiusuni, suliami unnerluussisussaataasut allakkamik unnerluussummik tunniussinissat sioqqullugu, siuningaani piffissaliinermik taaneqartartoq pillugu noqqaasoqarnissaanik pisariaqartitsisoqarsinnaavoq. Eqqartuussisup, illersuisup (illersuisut) aamma unnerluussisussaataasup pingaarnertut isumaqatigiinniarnissamut piffissat erseqqinnerusumik isumaqatigiissutigineqartunik inniminniinerattut, siuningaani piffissaliineq paasineqassaaq, taamaalilluni allakkap unnerluussisutip tunniunneqarnerani pisortatigoortumik piffissaliinermi, pisoq pinnginniassammat, taakkunani eqqartuussiviup aamma/imaluunniit illersuisup pingaarnertut isumaqatigiinniarnissami piffissami ungasissorujussuarmi aatsaat peqataasinnaalluni imaluunniit taamaallaat ulluni ima siamasitsigisuni ingerlatsisinnaallutik, taamaalilluni pingaarnertut isumaqatigiinniarneq aaqqissuunneqarsinnaanani aamma naleqqunnerpaamik naammassineqarsinnaanani.

Kalaallit Nunaanni eqqartuussivinni pinerluttulerinermik suliat suliarineqartarnerisa siuarsarneqarnissaa siunertaralugu, tamanna tunngavigalugu pingaarnertut isumaqatigiinniarnermut siuningaani piffissaliisinnaanermut periarfissaliissutip eqqunneqarnissaa siunnersuutigineqarpoq. Pinerluttulerinermik suliat ataatsimut sivilissusaasa appartinneqarnissat, aalajangersakkami siunertarineqarpoq.

Tamanna naleqquttutut isigineqarpat, unnerluussisussaataasut allakkamik unnerluussummik tunniussinissat sioqqullugu, noqqaassuteqarnikkut

eqqartuussiviup suliami pingaarnertut isumaqatigiinniarneq sioqqutsisumik piffissalersinnaassagaa, eqqartuussisarnermik inatsimmi § 448 a-tut siunnersuutigineqartup kingunerissavaa.

Sioqqutsisumik piffissaliinissamik noqqaassuteqarneq unnerluussisussaataitaasunit aamma pissutissalimmik pasisamit (illersuisumit) saqqummiunneqarsinnaasussaavoq.

Inatsisissatut siunnersuummi § 1, nr. 6, tassungalu oqaaseqaatit innersuussutigineqarput.

2.6. Akiliisitsissutinik suliat ingerlanneqartarnerinik piuminarsaaneq

2.6.1. Inatsisit atuuttut

Eqqartuussisarnermik inatsimmi § 449 b, imm. 1 malillugu, inatsimmik unioqqutitsinerit, akiliisitsinermik imaluunniit arsaarinninnermik allaanerusumik kinguneqartussatut naatsorsuutigineqanngitsut pillugit suliani, pissutissalimmik pasisaq unioqqutitsinermi pisuusutut nalunaaruteqarpat aamma allakkut akiliisitsissut saqqummiunneqartoq akilissallugu piumassuseqarluni nalunaaruteqarpat aamma taamaattoqassappat aammattaaq piffissaliussap erseqqinnerusumik taaneqartup iluani arsaarinninneq akuersissutigippagu (akileeqqussut), akileeqqusissummi suliap eqqartuussinertaqanngitsumik aalajangiiffigineqarnissaa pissutissalimmik pasisamut unnerluussisussaataitaasut nalunaarutigisinnaavaat.

Inatsimmik allanngorneri ilanngullugit nalunaarutiginninneq nr. 995, 26. oktober 2009-imeersoq (matuma kingorna aqqusinertigut angallanneq pillugu inatsit) malillugu, Kalaallit Nunaanni aqqusinertigut angallanneq pillugu inatsimmi § 57-imi, aammattaaq imigassartorsimalluni biilernerim imaluunniit § 59, imm. 1, nr. 2 malillugu sukkassutsinik akuerisaasunik qaangiinermik, akiliisitsissummik allaanerusumik kinguneqartussatut nalilerneqanngitsuni, suliani akileeqqussutit atorneqarnissaannut aalajangersakkanik aalajangersaasoqarpoq. Oqartussaasut allat, politiinit aamma unnerluussisussaataitaasunit (immikkut oqartussaasunik taaneqartartunit) allaanerusut, pisut ilaanni akileeqqussummik atulersitsinissamut piginnaatitaapput.

Pissutissalimmik pasisap, pisuunerarluni nalunaartup, eqqartuussivimmut takkunnissaata pisariaarunnissaanik, aamma eqqartuussiviit suliassanik, taakkunani kukkuluttornerit erseqqillutik, annikitsuararsuarnik

amerlasuunik isummernissaasa pinngitsoortinneqarnissaat,
akileeqqussummik atulersitsinissamut malittarisassat siunertaraat.

Suliap akileeqqussut aqqutigalugu eqqartuussivik avaqqullugu
naammassineqarnissaanut, akileeqqussummik tiguisimasumit
qisuariaateqarnissaq piumasaqaataavoq. Pineqartoq taamaalilluni
unioqqutitsinermik pisuusutut aamma piffissaliussap erseqqinnerusup iluani
akileeqqussut akilerniarlugu piumassuseqarnerminik nalunaaruteqassaaq.
Pineqartup ilatsiinnarnera taamaalilluni akileeqqussutip akuerineqarneranik
kinguneqanngilaq. Pineqartoq qisuarianngippat imaluunniit inuup
akileeqqussut akueriumanagu nalunaaruteqarpat, unnerluussisussaataasut
suliaq eqqartuussivimmut saqqummiutissavaat.

Akileeqqusissutit pillugit suliat, akileeqqussutikkut eqqartuussiviup avataani
aalajangiiffigineqartussaasutut naleqqutinngitsutut nalilerneqartut,
toqqaannartumik eqqartuussivimmut aalajangigassanngorlugit
saqqummiunneqassapput.

Eqqartuussisarnermik inatsimmi §§ 437 aamma 441 malillugit, allakkamik
unnerluussummik eqqartuussivimmut tunniussinermikkut, politiit
eqqartuussivimmut sulianik saqqummiussisarput. Suliap
eqqartuussivimmut saqqummiunneqarnera sioqqullugu politiinit
imaluunniit unnerluussisussaataasunit akileeqqussut
atulersinneqarsimappat, suliani akileeqqussut oqaaseqaatitalerlugu
imaluunnit unnerluussutip saqqummiunneqarnissaa pillugu allagaq
malinnaatitaq annertuumik annertussusilerlugu, allakkatut unnerluussutitut
atorneqassaaq.

Suliat, taakkunani, unnerluussaasoq pisuutinneqarpat, akiliisitsissummik,
arsaarinninnermik, biilersinnaanermut allagartaajagaanissamik imaluunniit
taarsiissuteqarnissamik annertunerusumik akuliunnerusut
pineqarsinnaanngippata, eqqartuussisarnermik inatsimmi § 44, imm. 2
malillugu, eqqartuussisooqataasut peqataatinnagit suliarineqassapput.
Unnerluussaasumut suliaq immikkut ittumik akuliunnertut
kinguneqartussaasoq, eqqartuussiviup nalilerpagu, taamaattoq imm. 3
malillugu eqqartuussisooqataasut peqataanissaat, eqqartuussiviup
aalajangersinnaavaa.

Allagaq unnerluussut eqqartuussivimmut tunniunneqarpat,
eqqartuussisarnermik inatsimmi § 449, imm. 1 malillugu, suliami

pingaarnertut isumaqatigiinniarnissamut piffissaq sumiiffissarlu eqqartuussiviup aalajangissavaa. § 441, imm. 2 malillugu, allagaq unnerluussut, pingaarnertut isumaqatigiinniarnissamut aggeqqusissut peqatigalugu, aamma kingusinnerpaamik pingaarnertut isumaqatigiinniarnep pinissaa sapaatip akunneranik 1-mik sioqqullugu unnerluunneqartumut nalunaarutigineqassaaq.

Unnerluunneqartoq akuerisaasumik pisinnaannginnini nalunaarutiginagu takkutinnitsoorpat imaluunniit nassuiaajumanngippat, aamma suliap nalaani akiliisitsinnermit, arsaarinninnermit, biilersinnaanermut allagartaajagaanissamit aamma taarsiissuteqarnissamit allaanerusumik pineqaatissiinnissaq pillugu apeqquteqanngippat, eqqartuussisarnermik inatsimmi § 452, imm. 2 malillugu, unnerluussaasup nassuersimaneratut eqqartuussiviup suliaq suliarisinnaavaa, aamma unnerluussaasumut immikkut ittumik akuliunnertut kinguneqassanngippat, uppersaaseqqinnagu suliaq aalangiiffigisinnaavaa.

Eqqartuussivik suliameq eqqartuussummik nalunaaruteqarpat, politiit unnerluussaasumut takussutissiamik nassiusissasut, § 474, imm. 3-p malitsigaa.

Unnerluussaasoq eqqartuussisarnermik inatsimmi § 452, imm. 2 malillugu, takkutinnitsoortut eqqartuunneqarpat, imm. 3 malillugu taanna suliap aallartiteqqinneqarnissaanik periarfissaqarpoq. Aallartiteqqinnissaq pillugu noqqaassut eqqartuussivimmut, eqqartuussummik nalunaaruteqarsimasumut saqqummiunneqassaaq, kingusinnerpaamik eqqartuunneqartoq eqqartuussut pillugu nalunaaruteqarfigineqarnerata kingorna ullut 14-it qaangiutsinnagit. Aallartiteqqinnissaq itigartitsissutigineqarpat, apeqqut eqqartuussiviup tamanna pillugu aalangiinerata kingorna sapaatit akunneri 4 qaangiutsinnagit Den Særlige Klageret-imut saqqummiunneqarsinnaavoq.

2.6.2. Inatsiseqarnermut ministereqarfiup isumaliutiginninnera aqqissuussinerlu siunnersuutigineqartoq

Pinerluttulerinermik suliat sukkanerpaamik aamma sunnuteqarluarnerpaamik politiini, unnerluussisussaataasuni aamma eqqartuussivinni suliarineqartarnissaat pingaaruteqartoq, Inatsiseqarnermut ministereqarfik isumaqarpoq. Tamatuma peqatigisaanik suliarinninneq inummot tassunga, iliuutsumik pinerluttuliornerusumik pasineqartumut, aamma pineqaatissinneqarnissamik naalakkerneqarnissamik

aarlerinartorsiortumut tunngatillugu, tunngaviusumik inatsisitigut isumannaatsuunissamut eqqarsaatigisassanik naammassinninnissaata qulakkeerreqarnissaa pingaaruteqarpoq.

Eqqartuussiveqarnermik systemimi isumalluutit pitsaanerusumik aamma nikerarnerusumik atorluarreqarnissaasa anguneqarnissaat siunertaralugu, § 449 d-tut siunnersuutigineqartukkut eqqartuussiviit suliani, taakkunani, unnerluunneqartup suliap eqqartuussivimmi suliarineqarnissaa erseqqissumik noqqaassutigisimanngippagu, aamma pissutsit assigiinngitsut takkutinnitsoornermi eqqartuussummik nalunaaruteqarnissaq akerlilinngippassuk, akileeqqussut eqqartuussinertaqanngitsumik atulersinneqarsimalluni, takkutinnitsoornermi eqqartuussummik nalunaaruteqarnissaat pillugu aaqqissuussineq aallarnerniarneqarpoq. Tamanna pillugu ataani erseeqqinnerusumik allaaserinninneq malillugu, akileeqqusummi noqqaassut sumut tunniunneqassanersoq takuneqarsinnaassaaq.

Oqartussaasoq akileeqqusummik atulersitsisoq, pineqartup akileeqqussut akuerinnigippagu (imaappoq unioqqutitsinermi pisuusutut aamma piffissap erseqqinnerusumik taasap iluani akiliisitsissut akilissallugu piareersimalluni nalunaaruteqarpat), pineqartup piffissaliussap akileeqqusummi aalajangerneqartup iluani suliap eqqartuussinikkut suliarineqarnissaa noqqaassutigisimanngippagu, pineqartoq ilimasaareqqeqqaarani pissutsinut akileeqqusissummut tunngassuteqartunut eqqartuussiviup eqqartuussinnaagaa, aalajangersagassatut siunnersuutigineqartup kingunerissavaa.

Eqqartuussinissaq pillugu noqqaassummut piffissaliussaq, (sumiiffimmi tassani malittarinneqqinnermik allakkat akiliisitsissutit pillugit nalunaaruteqarnernut tunngasut pineqartillugit) akileeqqussutip ullormit pineqartumut nassiunneqarneranit minnerpaamik ullut 14-inik sivilissuseqarnissaa naatsorsuutigineqarpoq. Piffissaliussaq, suliap eqqartuussivimmut saqqummiunneqarnissaa pinngitsoortinniarlugu, piffissaliussamut pineqartup akileeqqusummik akuersissuteqarfissaanut, ataatsikkoortillugu pisinnaassaaq.

Akileeqqusummik tiguisup tamatuma kingorna akileeqqussut akuerippagu imaluunniit piffissaliussap aalajangerneqartup iluani eqqartuussisoqarnissaa noqqaassutigippagu, pissutsit assigiinngitsut tamanna akerlerinngippassuk, eqqartuussivik nammineq tamanna

sioqqullugu unnerluunneqartumut saaffiginneqqaarani
eqqartuussinertaqanngitsumik takkutinngitsoornermi eqqartuussummik
nalunaaruteqarsinnaassaaq.

Akileeqqussut, politiinit unnerluussisussaataasunillu atulersinneqartoq,
nalunaarummik pineqartumik imaqarsinnaasussaasoq siunertarineqarpoq,
taamaalilluni aaqqissuussineq taanna nutaaq malillugu suliat taakku
suliarineqarsinnaasussaallutik. Aqqusinikkut allanneq pillugu inatsimmi §
57 malillugu, qulaani allaaserineqartut malillugit, eqqartuussisarnermik
inatsimmi § 452, imm. 2 malillugu, eqqartuussuteqarsinnaanerup
akornuserneqannginnissaa piumasaqaatigalugu, akileeqqussutit
akiliisitsissummik taamaallaat ilaatitsinngitsut, kisiannili aamma
biilersinnaanermik allagartamik arsaarinninnertaqartut, aallaaviatigut
aamma atuutissapput.

Politiinit unnerluussisussaataasunillu allaanerusunit oqartussaasunit
akileeqqussutit atulersinneqartut pineqartillugit, Rigsadvokatip aamma
oqartussaasut ataasiakkaat akoranni isumaqatigiissut malillugu,
akileeqqussutit taamaallaat nalunaarummik qulaani pineqartumik
imaqartinneqassasut, naatsorsuutigineqarpoq. Suliamut tamanna
naleqquttuusooq immikkut oqartussaasut ataasiakkaat oqaloqatigereerlugit
unnerluussisussaataasut naliliippata, akileeqqussutit taakku taamaallaat
aaqqissuussinissatut nutaatut siunnersuutigineqartumi ilaatinneqarnissaat,
taamaalilluni naatsorsuutigineqarpoq.

Qulaani taaneqareersutut, eqqartuussinermik suliap suliarineqarnissaanik
noqqaassutip sumut nassiunneqarnissaa, akileeqqussummi
takuneqarsinnaasussaavoq. Oqartussaasumut, akileeqqussummik
atulersitsisimasumut noqqaassut aallaaviatigut nassiunneqartussaassaaq.
Akileeqqussut immikkut ittumik oqartussaasumit atulersinneqarsimasooq
pineqarpat, taamaattoq akileeqqussut akuerineqanngippat, immikkut
ittumik oqartussaasumut imaluunniit politeeqarfimmut, suliamik
tunniussiffiusussamut noqqaassut nassiunneqassanersoq pillugu,
Rigsadvokatip aamma oqartussaasup pineqartup akornanni
isumaqatigiissutigineqartussaassaaq.

Rigsadvokatimik isumaqatigiissuteqarneq malillugu, immikkut ittumik
oqartussaasumit akileeqqussut atulersinneqartoq aaqqissuussinissatut
nutaatut siunnersuutigineqartumi ilaatinneqarpat, akileeqqussutit
akuersissutigineqanngitsut immikkut ittumik oqartussaasup suli

politeeqarfimmut pineqartumut tunniuttussaassavaa, tamatumalu kingorna taassuma suliap politiinut tunngatillugu pinerluttoqarsimaneranik paasiniarnerup aallartinneqarnissaa pisariaqarnersoq pillugu, aamma suliaq eqqartuussivimmut saqqummiunneqassanersoq pillugu aalajangiisussaavoq. Taamaattoqassappat, unnerluussisussaataasut sulitassaassapput suliamik eqqartuussivimmut saqqummiussisussat.

Aallaaviatigut, suliat tamarmik, akileeqqusummik atulersinneqarfiusut, qulaani allaaserineqartutut, suliap eqqartuussivimmi suliarineqarnissaanut, tamanna pillugu noqqaassuteqarnissap piumasaqaataanera pillugu, aamma suliap eqqartuussisooqataasut peqataatinnagit suliarineqarnerani, aaqqiussuussinissatut siunnersuutigineqartumi tassani ilaatinneqarnissaa pillugu nalunaarummik imaqartinneqassapput. Taamaattoq suliat akileeqqusummik atulersitsiffiusimasut, kisianni allagaq unnerluussut akileeqqusummik qaangiisunik piumasaqaatinik imaqarluni, ullumikkutut pingaarnertut isumaqatigiinniarnissamut aggersaassutigineqarnissaat naatsorsuutigineqarpoq. Eqqunngitsuliorfigineqartoq akileeqqusummik atulersitsinerup kingorna taarsiivigineqarnissamik piumasaqaammik, suliap nalaani suliarineqartussatut kissaatigineqartumik, saqqummiussisimappat, assersuutigalugu tamanna pisinnaavoq.

Aammattaaq suliaqarnersoq, taakkunani qulaani taaneqartoq nalunaarut tunniunneqarsimalluni, aamma eqqartuussinissaq pillugu noqqaassuteqartoqarsimanani, taamaakkaluartoq ullumikkut pisartutut, eqqartuussinissamut aggersaasoqartariaqartoq (assersuutigalugu takkutinngitsoornermi eqqartuussummik nalunaaruteqartoqarnissaanut piumasaqaatit naammassineqarsinnaannginnerat siuningaani nalilerneqarpat), eqqartuussiviup aalajangertussaassavaa.

Aamma suliap suliarineqarnerani takkutinngitsoornermi eqqartuussutip nalunaarutigineqarsinnaaneranut tunngavissaqannginnera, aatsaat eqqartuussiviup paasigaa, pisinnaavoq. Taamaattoqarpat piffissami tassani unnerluussaasoq ullumikkutut pingaarnertut isumaqatigiinniarnissamut aggersassavaa.

Inuup akileeqqusummik tigusisimasup, qanoq ililluni eqqartuussinissamik noqqaassummik saqqummiussisussaananera pillugu inatsissatut siunnersuummi malittarisassanik aalajangersaasoqanngilaq. Tamanna allakkatigut imaluunniit oqalunnikkut pisinnaasussaasoq naatsorsuutigineqarpoq.

Piffissaliussap akileeqqusummi takuneqarsinnaasup, iluani pineqartoq suliap eqqartuussinermi suliarineqarnissaa noqqaassutigippagu, inatsisissatut siunnersuut malillugu pingaarnertut isumaqatigiinniarnissamut piffissaq sumiiffissarlu eqqartuussiviup aalajangertussaassavaa aamma unnerluunneqartoq ullumikkut pisartutut pingaarnertut isumaqatigiinniarnissamut aggersaanermisut tassunga aggersassallugu.

Kisianni suliap eqqartuussivimmi suliarineqarnissaanik pineqartoq piffissaq eqqorlugu noqqaassuteqanngippat, inatsisissatut siunnersuut malillugu, pissutsinut allakkami unnerluussummi takuneqarsinnaasunut unnerluussaasup nassuersimaneratut, eqqartuussiviup suliaq suliarisinnaasussaavaa – imaappoq, eqqartuussivik takkutinngitsoornermi eqqartuussummik nalunaaruteqarsinnaavoq. Eqqartuussiviit akiliisitsissutit pillugit suliani ullumikkutut suliaq suliarisussaassagaat, taakkuni qulaani imm. 2.6.1-imi erseqqinnerusumik allaaserineqartut malillugit, unnerluussaasoq pingaarnertut isumaqatigiinniarnermi akuerisaasumik pisinnaannginnini nalunaarutiginagu takkutinngitsoorluni imaluunnit nassuiaanissani itigartitsissutigalugu, inatsisissatut siunnersuutikkut tassa aallarnerniarneqarpoq.

Aaqqissuussinissatut siunnersuutigineqartoq malillugu eqqartuussivik takkutinngitsoornermi eqqartuussummik nalunaaruteqarpat, eqqartuussut pillugu takussutissiaq aalajangersakkamut atuuttumut naapertuuttumik, eqqartuunneqartumut nassiunneqartussaassaaq.

Eqqartuunneqartut – ullumikkutut takkutinngitsoornermi eqqartuussuteqarnerni, akiliisitsissutit pillugit suliani nalunaarutigineqartuni, taakkunani qulaani allaaserineqartut malillugit unnerluussaasoq pingaarnertut isumaqatigiinniarnermi akuerisaasumik pisinnaannginnini nalunaarutiginagu imaluunniit nassuiaanissani itigartitsissutigippagu – suliami aallarteqqinneqarsinnaanera noqqaassutigisinnaassagaa, inatsisissatut siunnersuutigineqartukkut aallarnerniarneqarpoq. Qulaani erseqqinnerusumik allaaserineqartut malillugit, eqqartuussisarnermik inatsimmi § 452, imm. 3 taamaalilluni aaqqissuussinissatut siunnersuutigineqartoq malillugu sulianut taamatuttaaq atuutissaaq.

Aammattaaq inatsisissatut siunnersuummi § 1, nr. 7-miit 10 ilanngullugu aalajangersakkat taakkunungalugu oqaaseqaatit innersuussutigineqarput.

2.7. Akissarsiat pillugit suliani aalajangeqqitassanngortitsisarnerup killilerneqarnera

2.7.1. Inatsisit atuuttut

Eqqartuussisarnermik inatsimmi § 261 malillugu, eqqartuussinermi nammineq sinnerluni pisinnaatitatut ivertinneqartoq, imm. 1 malillugu naleqquttumik akissarsitinneqarnissaminik aamma akiliussinermi taartisiaqartinneqarnissaminut piumasaqassaaq. Akissarsiat aamma akiliussinernut taartisiassat eqqartuussivimmit, eqqartuussinermi nammineq sinnerluni pisinnaatitatut ivertitsisumit aalajangersarneqassapput. Imm. 2 malillugu, suliap imaluunniit eqqartuussinerup naammassinera peqatigalugu immikkut ittumik aalajangiinikkut aalajangersaaneq pissaaq.

Eqqartuussisarnermik inatsimmi § 517 malillugu, inatsisikkut immikkut aallatut aalajangiisoqarsimanngippat, saqitsaanermik suliani aalajangiinerit, najukkami eqqartuussivimmit imaluunniit Nunatsinni Eqqartuussivimmit aalajangerneqartut, Nunatta Eqqartuussisuuneqarfianut aalajangeqqitassanngortinneqarsinnaapput.

Kalaallit Nunaanni eqqartuussisarnermik inatsisip aamma Kalaallit Nunaanni pinerluttulerinermi inatsisip allanngortinneqarneri pillugit inatsisikkut nr. [X-ikkut, X-imeersukkut (Kalaallit Nunaanni eqqartuussisarnermik inatsisip nutarterneqarnera il.il.)] saqitsaanermik suliani aalajangiinerit Nunatsinni Eqqartuussivimmi aalajangerneqartut Danmarkimisut aalajangeqqitassanngortitsisarnermi killiliinerit annertuumik annertussusilerlugit eqqunneqarput, matumani § 517 b malillugu, suliami aningaasartuutit pillugit eqqartuussutit aamma aalajangiinerit allat annerpaamik 50.000 kr.-inut aalajangersarneqartut, aalajangeqqitassanngortinneqarsinnaannginnerat ilanngullugu.

Kalaallit Nunaanni pinerluttulerinermik suliani suliarinneqqaarfiusumit aappassaaneersumik suliarinniffiusumut aalajangeqqitassanngortitsisarnermi killiliinerit eqquttariaqannginnerat, ingammik najukkani eqqartuussivinni aalajangiinerit eqqarsaatigalugit nalinginnaasumik inatsisilerinermut tunngasumik eqqartuussivimmut, immikkut ittumik akuersisummik peqqaarani suliassanngorteqqinneqarsinnaasariaqarnerat, tassunga atatillugu Inatsiseqarnermut ministereqarfik isumaqarpoq. Tassunga

atatillugu Kalaallit Nunaanni eqqartuussiveqarneq pillugu isumaliutissiissut nr. 1442/2004, atuagaq 2, qupperneq 612 innersuussutigineqarpoq.

Pissutaasut assigisaat pissutigalugit, saqitsaannermik suliani najukkani eqqartuussivinnit Nunatta Eqqartuussisuuneqarfianut suliareqqitassanngortitsisarnermi killiliineq eqquttariaqanngitsoq, Inatsiseqarnermut ministereqarfik aammattaaq isumaqarpoq.

Folketingstidende [Kalaallit Nunaanni eqqartuussisarnermik inatsisip aamma Kalaallit Nunaanni pinerluttulerinermi inatsisip allanngortinneqarneri pillugit inatsisikkut nr. X, X-meersoq (Kalaallit Nunaanni eqqartuussisarnermik inatsisip nutarterneqarnera il.il.)] innersuussutigineqarpoq.

2.7.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

Aalajangeqqitassanngortitsineq pillugu malittarisassami § 517 b-mi, qallunaat eqqartuussisarnermik inatsisaanni § 389, imm. 3-p assigisaani, akissarsiat pillugit Nunatsinni Eqqartuussiviup aalajangiineranut aalajangeqqitassanngortitsisarneq pillugu aalajangersakkamik peqanngilaq.

Saqitsaannermik suliani eqqartuussinermi nammineq sinnerluni pisinnaatitamut ivertinneqarsimasumut akissarsiat pillugit Nunatsinni Eqqartuussiviup aalajangiinerinut aalajangeqqitassanngortitsisinnaanermik taamaattumik eqqussisoqarnissaa siunnersuutigineqarpoq. Imm. 2.7.1-imi qulaani taaneqartut aamma, Folketingstidende malillugu inatsimmut nr. [X-imut, X-meersumut Kalaallit Nunaanni eqqartuussisarnermik inatsisip aamma Kalaallit Nunaanni pinerluttulerinermi inatsisip allanngortinneqarneri pillugit inatsisikkut nr. (Kalaallit Nunaanni eqqartuussisarnermik inatsisip nutarterneqarnera il.il.)] oqaaseqaatit innersuussutigalugit, akissarsiat pillugit aalajangeqqitassanngortitsisinnaaneq saqitsaannermik suliani aalajangiinernut, Nunatsinni Eqqartuussivimmit aalajangerneqarsimasunut killilerneqartariaqartoq, Inatsiseqarnermut ministereqarfik isumaqarpoq.

Nunatta Eqqartuussisuuneqarfiani suliani allani sulianik suliarinnittarnermi piffissap atorneqartartup sivikillineqarnissaa siunertaralugu, akissarsiat, killiffiup aalajangersimasup ataaniittut, pillugit suliat amerlassusaasa ikilisinneqarnissaat siunnersuummi siunertarineqarpoq.

Akissarsiat, annerpaamik 50.000 kr.-inik aalajangerneqartut pillugit, § 261, imm. 2 malillugu Nunatta Eqqartuussivianit aalajangiinerit aalajangerneqartut, aalajangeqqitassanngortinneqarsinnaanngitsut, tamanna tunngavigalugu siunnersuutigineqarpoq. Taamaattoq, pissutsit immikkut ittut tamanna pissutissaqartippassuk, Ingerlatitseqqinnissamik aalajangiisartut aalajangeqqitassanngortitsinermut akuersissuteqarsinnaassapput. Akissarsiat 50.000 kr.-it sinnerlugit aalajangerneqarsimappata, imaluunniit – akissarsiat 50.000 kr.-it sinnernagit aalajangerneqarsimappata – Ingerlatitseqqinnissamik aalajangiisartut akuersissuteqarnerisigut, § 261, imm. 2 malillugu akissarsiat pillugit aalajangiinerit, Nunatta Eqqartuussivianit aalajangerneqartut, siunissami taamaallaat aalajangeqqitassanngortinneqarsinnaanerit periarfissaassasoq, tamatuma kinguneraa.

Akissarsianut, eqqartuussummi ilaasunut, aamma akissarsiat pillugit immikkut ittumik aalajangiinernut, akissarsiat pillugit aalajangiinernut siunnersuut atuutissaaq. Momi ilanngullugu akissarsianut ataatsimoortunut, aningaasat amerlassusaannut killiliussaq tunngassuteqassaaq.

Aammattaq inatsisissatut siunnersuummi § 1, nr. 11-imut, tassungalu oqaaseqaatinut innersuussisoqarpoq.

2.8. Inuit Pisinnaatitaaffii pillugit Europami Eqqartuussivimmit inaarutaasumik eqqartuussutit eqqartuussutigineqarsimasut malinniarlugit pinerluttulerinermik sulianik suliareqqitassanngortitsisinnaaneq

2.8.1. Inatsisit atuuttut

2.8.1.1. Pinerluttulerinermi suliani eqqartuussivimmi aalajangiinernik eqqartuussisunut annerusunut ingerlateqqitassanngortitsineq

Pinerluttulerinermik suliat eqqartuussisarnermik inatsimmi kapitali 44-mi malittarisassat malillugit naammagittaalliutigineqarsinnaapput, taakkulu aamma eqqartuussivimmut qaffasinnerusumut aalajangeqqitassanngortitsineq pillugu malittarisassanik imaqarput.

Pinerluttulerinermik suliami eqqartuussutit, najukkami eqqartuussivimmit imaluunniit Nunatsinni Eqqartuussivimmit eqqartuussutigineqartut, eqqartuussisarnermik inatsimmi § 534 malillugu unnerluunneqartumit imaluunniit unnerluussisussaataasunit Nunatta Eqqartuussisuuneqarfianut

naammagittaalliuutigineqarsinnaasut, taassuma malitsigaa.
Unnerluussaasoq nammineq iluaqutissaminik
naammagittaalliuuteqarsinnaavoq, tamatumalu peqeqatigisaanik
unnerluussisussaataitaasut unnerluussaasumut iluaqutaasumik aamma
ajoqutaasumik naammagittaalliorsinnaapput.

Eqqartuussisarnermik inatsimmi § 566 malillugu, inatsisikkut allatut
immikkut aalajangiisoqarsimanngippat, pinerluttulerinermik suliami
aalajangiinerit, najukkami eqqartuussivimmit imaluunniit Nunatsinni
Eqqartuussivimmit aalajangerneqartut, Nunatta Eqqartuussisuuneqarfianut
aalajangeqqitassanngortinneqarsinnaapput.

Pinerluttulerinermik suliami aalajangiinerit, pingaarnertut
isumaqatigiinniarnep imaluunniit taassuma piareersarneqarnerata nalaani
aalajangerneqartut, pissutsini § 566, imm. 3, nr. 1-imiit 7 ilanngullugu
aalajangersakkani allatorneqartut ataanni taamaallaat
aalajangeqqitassanngortinneqarsinnaapput.

Eqqartuussutit, Nunatta Eqqartuussisuuneqarfianit eqqartuussutigineqartut,
aallaaviatigut naammagittaalliuutigineqarsinnaanngillat. Taamatuttaaq
aalajangiinerit, Nunatta Eqqartuussisuuneqarfianit aalajangerneqartut
aallaaviatigut aalajangeqqitassanngortinneqarsinnaanngillat. Taamaattoq
Ingerlatitseqqinnissamik aalajangiisartut eqqartuussisarnermik inatsimmi
§§ 564 aamma 577 malillugit Eqqartuussiviit Qullersaannut
suliassanngortitsineq akuersissutigisinnaavaat.

Eqqartuussisarnermik inatsimmi § 536, imm. 1 malillugu, eqqartuussutit
pillugit naammagittaalliornissamut piffissaliussaq ullunik 14-inik
sivisussuseqarpoq. § 567 malillugu, aalajangiinernut
aalajangeqqitassanngortitsinissamut piffissaliussaq taamatuttaaq ullunik
14-inik sivisussuseqarpoq. § 542, imm. 1 malillugu naammagittaalliuut,
naammagittaalliornissamut piffissaliussap naanerani
tunniunneqarsimanngitsoq, eqqartuussisuuneqarfiup
itigartitsissutigisinnaavaa. § 537 malillugu unnerluussisussaataitaasut
unnerluussaasumut iluaqutaasumik naammagittaalliornerat pineqarpat,
tamanna taamaattoq atuutinngilaq. Inuup naammagittaalliortup, pineqartup
aatsaat naammagittaalliornissamut piffissaliussap naanerata kingorna
pissutsimik, naammagittaalliummut tapersiisumik ilisimasaqalersimanini
ilimanassuseqalersippagu, imaluunniit § 542, imm. 2 malillugu,
piffissaliussap qaangerneqarnera allakkut pissutsit pissutigalugit

pineqartumut akisussaatsissutigineqarsinnaanngippat, taamaattoq eqqartuussiviup naammagittaalliorneq akuersissutigisinnaavaa.

2.8.1.2. Pinerluttulerinermik suliat suliareqqitassanngortinneqartarnerat

Pinerluttulerinermik suliami aalajangiineq, suliaassanngorteqqinneqarsinnaanngitsoq imaluunniit allanngortinneqarsinnaanngitsoq, taamaallaat suliareqqitassanngortitsineq pillugu malittarisassat malillugit allanngortinneqarsinnaavoq. Tamanna assersuutigalugu tassaasinnaavoq Nunatta Eqqartuussisuuneqarfianit aalajangiineq eqqartuussutigineqartoq. Tamanna pillugu malittarisassat eqqartuussisarnermik inatsimmi §§ 579-imiit 592 b ilanngullugu aalajangersakkani nassaassaapput.

Suliat suliareqqitassanngortinneqartarnerannut aalajangiinissamut piginnaatitaaneq, qallunaat eqqartuussisarnermik inatsisaanni § 1 a malillugu, eqqartuussisarnermik inatsimmi § 585, imm. 1 malillugu, Den Særlige Klageretip pigaa.

Eqqartuussisarnermik inatsimmi § 580 malillugu, suliaq eqqartuussutigineqartoq, tassani unnerluussaasoq pinngitsuutinneqarluni, tulluuttut pippata unnerluussisussaataasunit noqqaassuteqarnerup kingorna suliareqqitassanngortinneqarsinnaavoq, 1) unnerluunneqartoq kingusinnerusukkut nassuersimappat, tamatumalu kingorna unnerluunneqartup pinerluttuliorneq pinerluttuliarisimagaa isumaqarfigineqartariaqarpat, 2) uppersaasatit allat saqqummerpata, tamatumalu kingorna unnerluunneqartup pinerluttuliorneq pinerluttuliarisimagaa isumaqarfigineqartariaqarpat, 3) ilisimannittoq imaluunniit suliamut tunngasumik arlaannaannulluunniit atassuteqarani misissuisartoq imaluunniit nalilersuisartoq suliap suliarineqarnerata nalaani eqqunngitsumik nassuiaateqarsimappat imaluunniit nalunaaruteqarsimappat aamma taamaaliornerup pinngitsuutitaanermut peqataasimaneranut pissutissaqarluartutut isumaqarfigineqarpat, 4) takussutissiat eqqunngitsut imaluunniit peqquserlulluni allanngortitat suliap nalaani atorineqarsimappata aamma pissutsit assigiinngitsut malillugit tamanna pinngitsuutitaanermut peqataasimanera pissutissaqartutut isumaqarfigineqarpat, 5) unnerluussaasoq imaluunniit inuit, pisortani kiffartuussinertik imaluunniit sulisitaanertik malillugu suliap suliarineqarnerani peqataasimasut, suliap inernerata sunnerneqarnissaa siunertaralugu pinerluttuliornermik takutitsisimappata, aamma pissutsit

assigiinngitsut malillugit tamanna pinngitsuutitaanermut peqataasimanera pissutissaqarluartutut isumaqarfigineqarpat.

Piumasaqaatit assingisa ataanni, tassani unnerluussaasoq, pineqartoq eqqartuunneqarnerminit pingaarutilimmik annertunerusumik pinnerluttuliornermut pisuusimaneragaalluni, § 581 malillugu suliareqqitassanngortitsineq pisinnaavoq.

§ 582 malillugu suliat, suliarni eqqartuussutitaqanngitsumik naammassineqareersut suliareqqitassanngortinneqarsinnaapput tulluuttut pippata, 1) § 580-imi piumasaqaatit naammassineqarsimappata, 2) uppersaarnatit nutaat pingaarutillit kingusinnerusukkut saqqummerpata imaluunniit 3) § 315, imm. 1-imi piumasaqaatit naammassineqarsimappata.

Eqqartuussisarnermik inatsimmi § 583, imm. 1 malillugu, suliap eqqartuussutigineqartoq, tassani unnerluussaasoq pisuutitaalluni, eqqartuunneqartumit imaluunniit unnerluussisussaataitaasunit noqqaassuteqarnerup kingorna suliareqqitassanngortinneqarsinnaavoq tulluuttut pippata, 1) paasisutissat nutaat pissarsiarineqarpat, suliap nalaani pigineqarsimagaluarunik pinngitsuutitaanermik imaluunniit pineqaatissiinermik annertuumik annikinnerusumik akuliuninnermik kinguneqarsimasinnaagaluartutut isumaqarfigineqartunik, 2) pissutsit § 580, nr. 3-miit 5 ilanngullugu aalajangersakkani taaneqartutut atuuppata, aamma pissutsit assigiinngitsut malillugit taamaattoqarnera eqqartuussinermi aalajangiinermut peqataasimanera pissutissaqarluartutut isumaqarfigineqarpat, imaluunniit 3) allakut pissutsit immikkut ittut piuppata, taakkunani uppersaarnatit unnerluussaasup pisuunerata eqqortumik nalersorneqarsimannginnerannik annersumik ilimaginnilersitsillutik.

§ 583, imm. 2 malillugu suliareqqitassanngortitsinissamut noqqaassuteqarsinnaanissanissamut § 535, imm. 1-imi aamma imm. 2-mi oqaaseqatigiinni siullerni aalajangersakkat taamatuttaaq atuupput.

Eqqartuussa 18-it inorlugit ukioqarpat, suliareqqitassanngortitsineq pillugu noqqaassuteqarneq taamaalilluni angajoqqaatut oqartussaataitaasumit aallartinneqarsinnaavoq, aamma eqqartuunneqartoq toqusimappat, kisianni tamanna sioqqullugu pineqaatissiinermik kiffaanngissusiiaasumik eqqartuunneqarsimappat, taassuma aappaataa, inooqatigisaata, angajoqqaavisa imaluunniit kinguaavisa imaluunniit

qatanngutaasa eqqartuunneqartoq sinnerlugu suliareqqitassanngortitsineq noqqaassutigisinnaavaat.

Pissutsinik, eqqartuunneqartumut imaluunniit eqqartuunneqartoq sinnerlugu allanut, suliareqqitassanngortitsinissaq pillugu noqqaassuteqarnissamik pissutaasinnaasutut isumaqarfigineqartunik, eqqartuussivik imaluunniit unnerluussisussaataasut ilisimasaqalerunik, eqqartuussisarnermik inatsimmi § 584 malillugu eqqartuussiviup imaluunniit unnerluussisussaataasut tamanna pillugu pineqartoq nalunaaruteqarfigisariaqarpaat.

2.8.1.3. Suliareqqitassanngortitsinermi suleriaaseq

Eqqartuussisarnermik inatsimmi § 579, imm. 1, malillugu, naammagittaalliorsinnaanermut periarfissat tamarmik misilinneqareersimatinnagit, imaluunniit naammagittaalliorneq saqqummiunneqarsimasoq naammassisimatinnagu, suliareqqitassanngortitsineq pisinnaanngitsoq, eqqartuussisarnermik inatsimmi § 579, imm. 1-imi takuneqarsinnaavoq. Imm. 2 malillugu eqqartuussutip naammassineqarsimanera suliareqqitassanngortitsinermut akornutaanngilaq.

Eqqartuussisarnermik inatsimmi § 564, imm. 2, aamma § 577, imm. 2 malillugit, suliap suliassanngortinneqarnissaanut Ingerlatitseqqinnissamik aalajangiisartut akuersissuteqarnissaasa atorluarneqarnissaata ujartorneqarnissaanik periarfissaq, eqqartuussiviup naammagittaalliorfiusup nalinginnaasumik innersuussutigissavaa. Aalajangiinerup kingorna sapaatit akunneri 4 qaangiutsinnagit suliassanngortitsinissamut akuersissummik qinnuteqarneq tunniunneqassaaq. Qinnuteqaat kingusinnerusukkut tunniunneqarpat, kisianni § 564, imm. 2 aamma § 577, imm. 2 malillugit aalajangiinerup kingorna ukiup 1-p qaangiutinnginnerani tunniunneqarpat, Ingerlatitseqqinnissamik aalajangiisartut taamaattoq qaqutigunnaq akuersissummik nalunaaruteqarsinnaapput. Suliamut tamarmut suliassanngortitsineq pineqartariaqanngilaq, kisianni taassuma ilaannaanut pisinnaalluni.

§ 585, imm. 2 malillugu suliareqqitassanngortitsinermik noqqaassut allakkatigut qinnuteqaateqarnikkut pissaaq, taannalu Nunatta Eqqartuussisuunneqarfianut imaluunniit toqqaannartumik Den Særlige Klageret-imut tunniunneqassaaq. Qinnuteqaammi eqqartuussut,

sulieqqitassatut kissaatigineqartoq, aamma pissutsit noqqaassuteqarnermut tapersersuutaasut, kiisalu uppersarsaatit, § 585, imm. 3-mi oqaaseqatigiinni siullerni suliap allatut inerreqartariaqarneranik kinguneqartariaqaraluartutut isumaqarfigineqartut, taaneqassapput. Qinnuteqaat immersugassami, § 585, imm. 3-mi oqaaseqatigiit aappaat malillugu, Domstolsstyrelsip suliaa atorlugu tunniunneqassaaq.

Qulaani allaaserineqartut malillugit, pisuni § 583, imm. 1, nr. 3-mi ilaatinneqartuni, § 586 malillugu sulieqqitassanngortitsinissamik qinnuteqaat, eqqartuussutip nalunaarutigineqarnerata kingorna kingusinnerpaamik ukiut 5 qaangiutinnginneranni saqqummiunneqassaaq. Eqqartuunneqartoq eqqartuussutip malitsigisaanik kiffaanngissusiagaasimappat, taamaattoq iperagaanerp kingorna ukiut 2 tikillugit sulieqqitassanngortitsineq pillugu qinnuteqaat tamatigut saqqummiunneqarsinnaavoq.

Eqqartuussiviup naammagittaalliuuteqarfiusup sulieqqitassanngortitsinermik qinnuteqaat erninnaartumik itigartitsissutigisinnaavaa tulluittut pisimappata, 1) § 586 malillugu piffissaliussaq eqqortinneqanngippat, 2) inatsit malillugu sulieqqiinnermik kinguneqarsinnaasumik pissutsimik qinnuteqaammi nalunaaruteqartoqarsimanngippat, imaluunniit 3) § 588 malillugu pissutsit imaluunniit takussutissiat assigisaallu uppersarsaatitut atorniarneqartut erseqqissumik pingaaruteqanngitsutut nalilerneqarpata.

§ 588 malillugu sulieqqitassanngortitsiniarneq ingerlaannartumik itigartitsissutigineqanngippat, noqqaassut pillugu Den Særlige Klageret-ip illuatungerisaq nalunaaruteqarfigissavaa, soorlu aamma § 589 malillugu illuatungerisaq pisariaqartinneqartumik annertussusilimmik allakkatigut imaluunniit oqaatsitigut oqaaseqaateqarsinnaaneramik periarfissinneqassasoq.

Eqqartuussiviup naammagittaalliuuteqarfiusup, suliami atugassanik paasissutissanik suli allannik pissarsisoqarnissaa aalajangersinnaavaa, matumani § 589, imm. 2 malillugu ilisimannittut killissiorneqarnerat ilanngullugu. Pinerluttulerinermik suliat pinerluttoqarsimaneranik paasiniaaffigineqarnerannut paasinarsarneqarnerannullu malittarisassat nalinginnaasut aammattaaq atuutissapput. Imm. 3 malillugu unnerluunneqartumut imaluunniit eqqartuussaasumut illersuisumik ivertitsisoqarsinnaanera periarfissaavoq. Suliaq oqaatsitigut

suliarineqarpat, tamatigut illersuisumik ivertitsisoqassasoq, taassuma aammattaaq malitsigaa.

Qulaani imm. 2.8.1.2-imi erseqqinnerusumik allaaserineqartut malillugit, suliareqqitassanngortitsineq pillugu qinnuteqaat unnerluussisussaataasunit imaluunniit eqqartuussamit saqqummiunneqassaaq. § 583 malillugu, eqqartuussaq 18-it inorlugit ukioqarpat, suliareqqitassanngortitsineq pillugu qinnuteqaat aammattaaq eqqartuussap angajoqqaatut akisussaataasuanit saqqummiunneqassaaq, aamma § 583, imm. 2-mi § 535, imm. 1 aamma imm. 2-mi oqaaseqatigiinnut siullernut innersuussineq malillugu, eqqartuunneqartoq toqusimappat, taassuma aappaataa, inooqatigisaata, angajoqqaavisa imaluunniit kinguaavisa imaluunniit qatanngutaasa eqqartuunneqartoq sinnerlugu suliareqqitassanngortitsineq noqqaassutigisinnaavaat.

Inatsimmi 587 malillugu, Den Særlige Klageretip taamaattoqarnissaa aalajangiingippagu, eqqartuussutip kinguartinneqarnissaa imaluunniit unitsinneqarnissaa, suliareqqitassanngortitsinermik qinnuteqatip kingunerissanngilaa.

Eqqartuussisarnermik inatsimmi § 591 malillugu, Den Særlige Klageretip aalajangiineri inaarutaasuupput aamma naammagittaalliutigineqarsinnaanngillat. Suliareqqitassanngortitsineq pillugu qinnuteqaatinik nutaanik tunniussisoqarnissaa, taassuma akornusinngilaa.

Suliami suliareqqitassanngortinneqartumi pingaarnertut isumaqatigiinniineq nutaaq eqqartuussisarnermik inatsimmi § 592, imm. 1 malillugu, eqqartuussivimmi, siusinnerusukkut suliami eqqartuussisimasumi, ingerlanneqassaaq. suliani, Eqqartuussiviit Qullersaanni aalajangiiffigineqarsimasuni, tamanna aamma atuuppoq. Suliaq eqqartuussisuuneqarfimmi suliareqqinneqartussanngortoq, eqqartuussisarnermik inatsimmi § 564, imm. 1 malillugu Ingerlatitseqqinnissamik aalajangiisartut akuersissuteqarpata, Eqqartuussiviit Qullersaannut taamaallaat naammagittaalliutigineqarsinnaavoq. Pisumi taamaattumi, suliap nutaap suliarinneqqaarfiusumi suliarineqarneratut isigineqarnissaa, suliareqqitassanngortitsinerup taamaattut tassa kingunerinngilaa. Najukkami eqqartuussivimmit suliap suliareqqinneqarnera pitillugu, pisuni

taakkunani nutaamik pingaarnertut isumaqatigiinniarneq nutaaq, najukkami eqqartuussivimmi pissaaq.

Pisuni, suliaq § 453, imm. 3, nr. 4 malillugu unnerluunneqartoq peqanngitsillugu ingerlanneqartuni, suliareqqitassanngortitsineq pillugu malittarisassanik immikkut ittunik eqqartuussisarnermik inatsimmi § 592 a imaqarpoq.

2.8.1.4. Inuit Pisinnaatitaaffii pillugit Europami Isumaqatigiissut (EMRK) – Inuit Pisinnaatitaaffii pillugit Europami Eqqartuussivimmit (EMD-mit) eqqartuussutininik malinnittarneq

EMRK aamma isumaqatigiissummut tapiliussat 1, 4, 6 aamma 7, Inuttut pisinnaatitaaffiit pillugit Europami naalagaaffiit isumaqatigiissutaat pillugu inatsisip Kalaallit Nunaanni atortuulersinneqarnissaa peqqussutikkut nr. 814-ikkut, 18. september 2001-imeersukkut Kalaallit Nunaanni atuutilersinneqarput. Pissutsit, namminersorlutik oqartussat imaluunniit naalagaaffiup oqartussaasui pineqarnersut apeqqutaatinnagu, Kalaallit Nunaanni oqartussasunit sularineqarsimasut, naammagittaalliutigineqarsinnaapput.

Naalagaaffiit oqartussaasut, EMD-p suliani tamani, akuuffigisaminni, inaarutaasumik eqqartuussutaanik maleruaassasut, EMRK-mi artikili 46, imm. 1-p malitsigaa.

Eqqartuussut Storkammerimit eqqartuussutigineqarsimappat, EMD-p eqqartuussut eqqartuussutigisaa EMRK-mi artikili 44, imm. 1 malillugu inaarutaasumik eqqartuussutaavoq. Taakku suliap Storkammer-imut innersuunneqarnissaa noqqaassutiginiarnagu, akuusut nalunaaruteqarpata, imaluunniit eqqartuussummut ulluliussap kingorna suliap Storkammer-imut innersuunneqarnissaa pillugu noqqaassuteqartoqanngippat, imaluunniit artikili 43 malillugu Storkammer-imi ataatsimiititaliap innersuussinissaq pillugu noqqaasut itigartitsissutigippagu, EMD-mit eqqartuussut inaarutaasumik eqqartuussutinngussasoq, EMRK-mi artikili 44, imm. 2-p aammattaaq malitsigaa.

Suliami, tassani naalagaaffik akuusuulluni, assersuutigalugu Papamichalopoulos allallu Grækenland akerleralugu (suliap normua: 14556/89), tunngavigisaq 34 malillugu, EMD-mit sulisaaseq malillugu–EMKR-mik innarliineq pisimappat – innarliinerup atorunnaarsinneqarnissaa aamma innarliinerup kingunerisimasaasa ima

iluarsisinnegarnissaat, innarliineq sioqqullugu pissutsit sapinngisamik atulersinneqassallutik (»restitutio in integrum«), naalagaaffiup pisussaaffigigaa, EMD-imit inaarutaasumik eqqartuussutip malinneqarnissaanik pisussaaffiup kinguneraa. Taamaalilluni naalagaaffik, innarliineq paasineqartoq atorunnaarsinniarlugu aamma tamanna ajornanngippat, taamaalorsimanerup kingunerisai iluarsisinniarlugit, iliuuseqarnernik ataasiakkaanik aamma/imaluunniit nalinginnaasunik pisariaqartinneqartunik aalajangiinissaminut pisussaaffeqarpoq. Assersuutigalugu Kuric allallu Slovenien akerleralugu (suliap normua: 26828/06), tunngavigisaq 132 aamma Jon Fridrik Kjølbro, Den Europæiske Menneskerettighedskonvention – for praktikere, saqqummersitat arferngat (2023), qup. 193 malillugit, iliuutsit taamaattut taamaallaat naammagittaalliutitut aalajangerneqassanngillat, kisiannili aamma inunnut allanut, pissutsimi assingusumiittunut, tunngatillugu aalajangerneqassapput.

Innarliineq iluarsisinniarlugu naalagaaffiup iliuutsit aalajangiiffigisariaqagai pillugit EMD-p eqqartuussummi uparuaasarnera qaqutiguinnaq pisartutut pissuseqarpoq. Taamaammat – Scozzari aamma Giunta Italia akerleralugu (suliap normua: 39221/98 aamma 41963/98), tunngaviusoq 249 malillugu, Europaråde-mi Ministerit komité-annit nakkutigineqarlutik – EMRK-mi artikili 46 malillugu, naalagaaffiit pisussaaffiisa eqquutsinneqarnissaannut iliuutsit suut aalajangiiffigineqassanersut taamaammat naalagaaffiit namminneq aallaaviatigut nalilissavaat.

Pisut ilaanni suliamik, nunap eqqartuussiviini naammassineqareersumik, suliami innarliineq EMD-mit eqqartuussummit aalajangersarneqartoq, assersuutigalugu Öcalan Tyrkiet akerleralugu (suliap normua: 46221/99), tunngaviusoq 210 malillugu, iluarsisinniarlugu suliareqqitassanngortitsineq naleqquttumik iliuusiusinnaavoq. Taamaattoq siusinnerusukkut eqqartuussissutigineqartut naammassineqareersut aamma eqqartuussutip kimiata (res judicata-p) nalornissutigineqannginnissaannut eqqarsaatigisassat, assersuutigalugu Henryk Urban aamma Ryszard Urban Polen akerleralugu (suliap normua: 23614/08), tunngaviusut 62-imiit 67 ilanngullugu malillugit, EMRK-mi artikili 46 malillugu naalagaaffiit pisussaaffimminnik eqquutitsinissaminnut iliuutsit suut aalajangissaneraat, naliliinermi ilaatinneqarsinnaasut, EMD-p taamaattoq aamma akuersaarpaa.

2.8.2. *Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq*

Qulaani imm. 2.8.1-mi takuneqarsinnaasutut, EMD-mit inaarutaasumik eqqartuussutip malitsigisaanik pinerluttulerinermik suliat suliareqqitassanngortinneqarnissaannik immikkut ittumik malittarisassiuisunik massakkut eqqartuussisarnermik inatsimmi aalajangersagaqanngilaq. EMD-mit eqqartuussut malinniarlugu suliat suliareqqinneqarnissaannut, pinerluttulerinermik suliat suliareqqitassanngortinneqartarnerat pillugit malittarisassat pisuni amerlasunni toqqaannaq imaluunniit assigisaannik atorneqarsinnaassapput.

Kisianni qallunaat eqqartuussisarnermik inatsisaanni inatsisikkut nr. 664-ikkut, 11. juni 2024-imeersukkut eqqartuussisarnermik inatsimmi kapitali 86-imi § 997 a-mi aalajangersagaq nutaaq ilanngunneqarpoq, tamatumalu kingorna pillaasarnermik eqqartuussisarnermi suliap suliarineqarsimasup suliareqqitassanngortinneqarnera, EMD-mit eqqartuussut inaarutaasoq malinniarlugu, tamakkiisumik ilaannakortumilluunniit rigsadvokatip imaluunniit eqqartuunneqartup qinnuteqarneratigut pisinnaavoq.

Qallunaat eqqartuussisarnermik inatsisaanni § 977 malillugu suliareqqitassanngortitsineq, eqqartuunneqartup qinnuteqaat akuerisimappagu, assersuutigalugu Den Særlige Klageret-ip suliامي nr. G-108-14-imi, Tidsskrift for Kriminalret 2015, qup. 1151/1-imi tamanut saqqummiunneqartumi, Den Særlige Klageretip sulisaasia malillugu aamma unnerluussisussaatitaasunit qinnuteqarnermit tamanna aamma pisinnaammat, tassunga tunngaviuvoq. Kisianni eqqartuunneqartup suliarinneqqinnissamik qinnuteqaat akuerinngippagu, Den Særlige Klageretip qinnuteqaat suliarisinnaanngilaa. Suliامي nr. 22/02739-imi, Østre Landsre-imit aalajangiinikkut 13. januar 2015 aalajangerneqartumi Den Særlige Klageretip erseqqissumik aalajangiinerani 21. juni 2022-imeersumi tamanna pivoq, tassani eqqartuussaq eqqartuussissuserisuni aqqutigalugu unnerluussisussaatitaasut suliap suliareqqinneqarnissaanik Den Særlige Klageretimut qinnuteqaataa akerlilerpaa. Suliامي Savran Danmark akerleralugu, 7. december 2021-imeersumi (nr. 57467/15-imi) EMD-p eqqartuussutaanik noqqaassut tunngavilerneqarsimavoq, tassanilu Danmarkip EMRK-mi artikili 8 innarlarsimagaa, EMD-p nalilerpaa, tassami nunani allamiut pillugit inatsimmi § 50 a malillugu, naammagittaalliortoq tarnikkut napparsimasut napparsimaviannit angerlartinneqarmat, anisitsinissamut piumasaqaatit suli atuunnersut misilinneqarneranni, aalajangiinermut tunngaviit attuumassuteqartut

tamaasa ilanngunneqarneranni naammattumik peqqissaarussilluni naliliinermik Østre Landsret suliaqarsimanngilaq. Eqqartuussut tunngavigalugu suliaq suliareqqitassanngortinneqarnissaa unnerluussisussaataasut Den Særlige Klageretimet noqqaassutigaat, taamaalilluni aalajangiinermi tunngaviit attuumassuteqartut tamaasa peqqissaartumik ilaatinneqarnerisigut, anisitsinerup attanneqarsinnaaneranik apeqqut nutaamik nalilersuiffigineqarnissaa Østre Landsret-ip periarfissarilissammagu. Kisianni, suliareqqitassanngortitsineq pillugu noqqaassut, eqqartuussaasup eqqartuussissuserisumigut unnerluussisussaataasut noqqaassutaat erseqqissumik akerliliinera innersuussissutigalugu, Den Særlige Klageretimit itigartissutigineqarpoq.

Pisoqarsinnaasoq, taakkunani qallunaat eqqartuussisarnermik inatsisaanni siusinnerusukkut malittarisassat atuuttut malillugit, naak unnerluussisussaataasut tamanna pillugu noqqaassutaat EMRK-mik innarliinerup, EMD-mit eqqartuussummit aalajangersarneqartup, atorunnaarsinneqarnissaa aamma iluarsisinneqarnissaa pillugit pigaluartoq, eqqartuussivimmi suliaq suliareqqitassanngortinneqarnissaa periarfissaasimanngitsoq, suliaq takutippaa.

Aammattaaq pisoqarsinnaasoq, taakkunani malittarisassat siusinnerusukkut atuuttut malillugit, suliareqqitassanngortitsineq EMD-mit eqqartuussutip malinneqarnissaa pissutigalugu qinnutigineqarnera apeqqutaatinnagu, Den Særlige Klageretip piginnaaneqarnerata avataaniilernissaat itigartinneqarsinnaanngitsoq, Inatsiseqarnermut ministereqarfiup aammattaaq nalilerpaa. Nunani allamiut pillugit inatsimmi § 50 a malillugu aalajangiinerit suliareqqitassanngortinneqarnissaannut erninnaartumik periarfissaliissuteqarnavianngitsoq, assersuutitut taaneqarpoq, tassami pillaatissiinermik suliaq eqqartuussutaasoq pineqanngimmat.

Tamanna tunngavigalugu eqqartuussisarnermik inatsimmi kapitali 86-imi § 977 a-mi aalajangersakkamik nutaamik ilanngussisoqarpoq, tamatumalu kingorna EMD-mit inaarutaasumik eqqartuussut malinniarlugu, pillasarnermik eqqartuussisarnermi suliaq suliarineqarsimasup suliareqqitassanngortinneqarnera rigsadvokatip imaluunniit eqqartuunneqartup qinnuteqarneratigut tamakkiisumik ilaannakortumilluunniit pisinnaalerpoq. Folketingstidende 2023-24, ilanngussaq A, L 148 saqqummiunneqarsimasoq, qupperneq 14 ff innersuussutigineqarpoq.

Kalaallit Nunaanni eqqartuussisarnermik inatsimmi allanngortitsinerup assinga eqqunneqassannginnersoq, Inatsiseqarnermut ministereqarfiup isumaliutigisimavaa.

Qulaani imm. 2.8.1-imi takuneqarsinnaasutut, suliaq eqqartuussutigineqartoq, tassani unnerluussaasoq pisuutinneqarluni, eqqartuussisarnermik inatsimmi § 583, imm. 1 malillugu eqqartuussaasumik aamma unnerluussisussaataitaasunit noqqaassuteqarnikkut suliareqqitassanngortinneqarsinnaavoq. Taamaalilluni, qallunaat inatsiseqartitsinerat malillugu Den Særlige Klageret-ip suliasaasiata assinganik unnerluussisussaataitaasunit suliareqqitassanngortitsineq pillugu qinnuteqaat eqqartuussaasup akerlilersinnaanngilaa. Tamanna apeqqutaatinnagu, pisut, taakkunani suliareqqitassanngortitsineq EMD-mit eqqartuussutip malinneqarnissaanut qinnuteqaatigisimanera apeqqutaatinnagu, malittarisassat atuuttut malillugit sulianik suliareqqitassanngortitsinissamut Den Særlige Klageret-ip piginnaasaqarnerata avataaniilernissaasa pinngitsoortinneqarnissaata qulakkeerneqarnissaa siunertaralugu, eqqartuussisarnermik inatsimmi malittarisassap assigisaanik eqqussisoqarnissaa naleqquttuusoq, Inatsiseqarnermut ministereqarfiup nalilerpaa.

Tamanna tunngavigalugu eqqartuussisarnermik inatsimmi kapitali 44-mi § 583 a-mi nutaamik aalajangersakkamik ilanngussisoqarnissaa siunnersuutigineqarpoq, tamatumalu kingorna pinerluttulerinermik suliaq, EMD-p inaarutaasumik eqqartuussutaa, Danmarkip akuuffigisaa, malinniarlugu, rigsadvokatip imaluunniit eqqartuussaasup qinnuteqarneratigut tamakkiisumik ilaannakortumilluunniit pisinnaavoq.

Taakku najukkami eqqartuussivinni, Nunatsinni Eqqartuussivimmi, Nunatta Eqqartuussisuuneqarfiani imaluunniit Eqqartuussiviit Qullersaani aalajangerneqarsimanerat apeqqutaatinnagu, aalajangersagassatut siunnersuutigineqartumi pinerluttulerinermik suliat suliareqqitassanngortinneqarsinnaanerannut tunngassuteqarpoq. Eqqartuussutitut suliareqqitassanngortitsisinnaaneq killilerneqanngilaq, kisianni aalajangiinerup ilusaa apeqqutaatinnagu atuutissalluni. pinerluttulerinermi inatsimmi kapitali 33 malillugu imikkut ittumik pineqaatissiinerit allanngortinneqarneri pillugit aalajangiinerit suliareqqitassanngortinneqarnissaat pillugit rigadvokat-i qinnuteqassappat, tamanna assersuutigalugu naleqquttuussaaq.

Eqqartuussutip malinneqarnissaanut periarfissat allat atorneqarsinnaannginnerat, assersuutigalugu suliassanngortitsineq, allanngortitsineq assigisaaluunniit, suliareqqitassanngortitsisinnaanerup siunnersuutigineqartup atorneqarsinnaanissaannut piumasaqaataassaaq. EMD-mit eqqartuussut unnerluussisussaataasut inatsisitigut kingunerititap eqqartuussutigineqartup allanngortinneqarnissaa pillugu noqqaassummik tunniussipata, suliareqqitassanngortitsisinnaanermut siunnersuutigineqartoq aammattaaq atorneqarsinnaanaviannngilaq.

Eqqartuussisarnermik inatsimmi § 537 malillugu, naammagittaalliuuteqarnissamut piffissaliussap naareernerata kingorna, eqqartuunneqartumut iluaqutaasumik unnerluussisussaataasut naammagittaalliuuteqarsinnaanerat periarfissaapput, taamatuttaaq suliareqqitassanngortitsisinnaaneq siunnersuutigineqartoq atorneqarsinnaanaviannngilaq. Tamanna § 579, imm. 1-ip malitsigereerpaa. § 564, imm. 2, aamma § 577, imm. 2 malillugit, suliassanngortitsineq Ingerlatitseqqinnissamik aalajangiisartut akuersissuteqarnerannik piumasaqaatitaqarpat, periarfissaq taanna taamaattoq atorneqarsinnaasusaaannngilaq.

Pisuni, taakkunani EMRK-mi artikili 46 malillugu EMD-mit eqqartuussut malinniarlugu suliap suliareqqitassanngortinneqarnissaa pillugu noqqaassuteqarnissaq naleqquttutut nalilernerqartillugu, tamanna pillugu rigsadvokati noqqaassummik saqqummiussissasoq, piumasaqaataavoq. Suliareqqitassanngortitsinissaq pillugu noqqaassuteqarnissap naleqquttuunissaa pillugu Rigsadvokatip naliliinermi ataatillugu, EMRK-mi artikili 46 malillugu, eqqartuussutip eqquutsinneqarnissaanut iliuutsit, naalagaaffiit nammineerlutik naliligassaar, aalajangerneqartussat pillugit missiliuinerit, eqqarsaatigisussaassavai.

Suliareqqitassanngortitsisinnaaneq siunnersuutigineqartoq malillugu, eqqartuunneqartumit qinnuteqaateqarnikkut, suliaq suliareqqitassanngortinneqassanersoq pillugu, naalagaaffiit EMRK-mi artikili 46 malillugu, eqqartuussutip eqquutsinneqarnissaanut iliuutsit aalajangiiffigineqartussat nalilernerqarnissaannut tunngatillugu, missiliuinissaq naalagaaffinnut tunniunneqarmat, maluginiarneqassaaq.

Pineqartoq 18-it inorlugit ukioqarpat, eqqartuunneqartup angajoqqaatut akisussaasuani suliareqqitassanngortitsinissaq aamma

qinnutigineqarsinnaasussaavoq. Eqqartuussaasoq toqusimappat, pineqartup aapparisaata, angajoqqaavisa, kinguaavisa aamma qatanngutaasa, eqqartuussaasimasoq sinnerlugu suliareqqitassanngortitsineq qinnuteqaatigisinnaavaat. § 583, imm. 2-mi § 535, imm. 1-imut aamma imm. 2-mi oqaaseqatigiinnut siullernut innersuussineq malillugu, taassuma inatsisit atuuttut malillugit suut atuuttut assigai.

EMD-mit eqqartuussutip malinneqarnissaanut pisariaqartinneqarpat, suliareqqitassanngortitsineq taamaallaat pisinnaasoq, suliareqqitassanngortitsisinnaanermut siunnersuutigineqartup aammattaaq kingunerissavaa.

EMRK-mi artikili 46 malillugu, EMD-mit eqqartuussutitut, Danmarkip akuuffigisaanut aamma malissallugit pisussaaffigisaanut, suliareqqitassanngortitsisinnaaneq siunnersuutigineqartoq taamaallaat atuutissaaq. Artikili 36 malillugu suliami ingerlasumi akuliunnikkut Danmarki suliami akuusunnngussanngimmat, maluginiarneqassaaq. Danmarki suliami akuunersoq aamma eqqartuussutip malinneqarnissaanik pisussaatitaanersoq, taamaalilluni pingaaruteqarpoq, tassami suliat taamaattut – taakkunani Danmark akuulluni – imm. 2.8.1.4 malillugu, naammagittaalliuutitut taamaallaat tunngatinnagit, kisianni aamma inunnut allanut pissutsini assigisaaniittunut tunngatillugu iliuuseqarnissaq pisariaqartinneqalersinnaammat, maluginiarneqassaaq.

EMRK-mi artikili 44 malillugu, EMD-mit eqqartuussut inaarutaappat, suliareqqitassanngortitsisinnaaneq siunnersuutigineqartoq atuutissaaq. Pissutsit immikkorluinnaq ittut atuutsinnagit, suliareqqitassanngortitsisinnaanermut siunnersuutigineqartoq malillugu eqqartuunneqartumit suliareqqitassanngortitsitsineq pillugu piffissaliussaq ukiumik 1-mik sivilissusilik atuutissasoq, siunnersuutigineqarpoq. EMRK-mi artikili 44 malillugu, eqqartuussutip attuumassuteqartup piffissami inaarutaasunnngorfianit, piffissaliussaq naatsorsorneqassaaq. Piffissaliussap naleqquttup iluani akuusut peqataasut suliassanngortitsineri pillugit paasisimasaqalernissamut eqqarsaatiginninneq aallaavigalugu, suliareqqitassanngortitsinissamut noqqaassuteqarnerup tunniunneqarnissaa aalajangersarneqarpoq. Piffissaliussamut atuutitsinnnginnissamut (annikitsumik) siunnersuuteqarnermut eqqarsaatiginninnerit tassaapput, pissutsit immikkorluinnaq ittut, noqqaassutip piffissaliussap iluani saqqummiunneqannginneranut tunngaviusut, assersuutigalugu ilungersunartumik napparsimaneq, atuussinnaanerat.

Taamaattoq EMD-p eqqartuussutaa malinniarlugu, Rigsadvokatip tamatigut piffissaligaanngitsumik suliap suliareqqinneqarnissaa qinnuteqaatigisinnaavaa, soorlu aamma eqqartuussisarnermik inatsimmi § 537 malillugu, unnerluunneqartumut iluaqutaasumik, unnerluussisussaataasut ullumikkut piffissaligaanngitsumik pinerluttulerinermik suliat naammagittaalliuutigisinnaagaat. Ingerlatsineq pillugu malittarisassat nalinginnaasut suliareqqitassanngortitsisarneq pillugu eqqartuussisarnermik inatsimmi kapitali 44-imi malittarisassaasut, suliareqqitassanngortitsisinnaaneq siunnersuutigineqartoq malillugu qinnuteqaatit sularineqarnerannut atuutissapput, aamma inatsisissatut siunnersuutip taakku allanngortinngilai. Assersuutigalugu suliareqqitassanngortitsisinissaq pillugu qinnuteqaat Nunatta Eqqartuussisuuneqarfianut imaluunniit toqqaannartumik Den Særlige Klageret-imut allakkatigut tunniunneqartussaassaaq aamma inatsimmi § 585, imm. 3-imi piumasagaatit naammassineqartussaassapput. Eqqartuussiviup naammagittaalliorfiusup tamatuma kingorna § 589 malillugu, inatsisit atuuttut malillugit uppernarsaasiinerup assinga, aamma taamaattoqassappat oqaatitsigut isumaqatigiinniarnissamut aamma illersuisumik ivertitsinissamut il.il. iliuusissat aallartissinnaasussaavai. § 592 malillugu, suliaq suliareqqinneqartussanngorpat, pingaarnertut isumaqatigiinniarneq nutaaq, eqqartuussivimmi suliarnik aalajangiinermik aalajangiisimasumi, pissussaassaaq. § 587 malillugu, suliareqqitassanngortitsisinnaaneq siunnersuutigineqartoq malillugu suliareqqitassanngortitsineq aallaaviatigut aalajangiinerup equutinneqarnissaanik kinguartitsinermik imaluunniit unitsinneqarnissaanik kinguneqarnavianngilaq.

Inatsisip atuutilersinneqarnerata kingorna, EMD-mit eqqartuussutit eqqartuussutigineqartut malitsigisaannik suliareqqitassanngortitsisinissaq pillugu noqqaassutitut tunngatillugu, suliareqqitassanngortitsisinnaanermik siunnersuutigineqartoq atuuttussaasariaqarpoq. Piffissaq taanna sioqqullugu eqqartuussisutigineqartut naammassineqareersut pillugit paatsuungassuteqarnissap pilersinnginneqarnissaanut eqqarsaatigisassanik tamanna pissuteqarpoq.

Aammattaaq inatsisissatut siunnersuummi § 1, nr. 12-imiit 21 ilanngullugu aalajangersakkat innersuussutigineqarput.

2.9. Digitaliusumik atsiornermi allaganngorlugu takussutissiap allakkatigut assilillugu sanaqqinneqarnera

2.9.1. Inatsisit atuuttut

Suut tunngavigalugit pinngitsaaliissummik naammassititsineq pillugu eqqartuussisarnermik inatsimmi § 598 malittarisassanik imaqarpoq. Eqqartuussiviup avataatigut allakkatigut isumaqatigiissutit aamma akiitsut allagartaat, taamaallaat digitaliusumik pilersinneqartut, akiliisitsisarnermut eqqartuussivimmi pinngitsaaliissummik naammassitinneqarnissaannut tunngavimmik pilersitsisinnaasumik periarfissaliissuteqanngilaq.

Eqqartuussisarnermik inatsimmi § 601, imm. 1-imiit 3 ilanngullugu aalajangersakkat pinngitsaaliissummik naammassititsiniaanerup suliarineqarnissaanut piginnaasaqarneq pillugu pisortatigoortumik malittarisassanik imaqarput. § 601, imm. 4-imi oqaaseqatigiit siulliit malillugit, pinngitsaaliissummik naammassisitsiniaaneq pillugu noqqaassummi, paasissutissat, suliap suliarineqarnissaanut pisariaqartinneqartut, ilanngunneqassapput.

2.9.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq

Innuttaasut suliffeqarfiillu attaveqaqatigiinnermut ilutsinik nutaaliaasunik atuisut, soorlu internetimik, e-mail-inik, homebanking-imik aamma sms-inik, amerliartornerat ilutigalugu, assersuutigalugu atuisut taarsigassarsisarnersa aamma akiligassarsillutik nioqqutissanik pisisarnersa digitaliusumik isumaqatigiissutigineqartarnerat pissusissamisoortunngorsimavoq. Pisuni taamaattuni takussutissiaq atavog, matumani atsiorneq takussutissiamut ilanngunneqartoq, taamaallaat digitaliusumik ilusilik ilanngullugu.

Eqqartuussiviup avataatigut allakkatigut isumaqatigiissutit aamma akiitsut allagartaat, taamaallaat digitaliusumik pilersinneqartut, akiliisitsisarnermut eqqartuussivimmi pinngitsaaliissummik naammassitinneqarnissaannut tunngavimmik pilersitsisinnaasumik eqqartuussisarnermik inatsit periarfissaliissuteqanngilaq. Pisortatigoortumik takussutissiat pappiaraasut tunngavigalugit akiliisitsisarnermut eqqartuussiviup ikiuuttarnerata assigisaanik, takussutissianik digitaliusunik taamaattunik pinngitsaaliissummik naammassisitsiniaanerup akiliisitsisarnermut eqqartuussiviup ikiuussinnaanissaanut pisariaqartitsinerup pinngorsimanera, digitaliusumik ineriartornerup kingunerisimavaa.

Ulloq 3. november 1998 taamanikkut Forskningsministereqarfik siunersueqatigereerlugu, Udvalget om retsvirkninger af digital signatur m.v., (digitaliusumik atsiornep il.il. inatsisilerinermut tunngasumik malitsigisai pillugit Ataatsimiititaliaq), Inatsiseqarnermut ministereqarfiup pilersippaa, taannalu ilaatigut nalunaarutit digitaliusumik atsiornikut inatsisilerinikkut malittarisassiornissaat pillugit apeqqutit nalilersorneqarnissaat suliassaraa. E-kkut atsiornep inatsisilerinermut tunngasumik malitsigisai pillugit isumaliutissiissut nr. 1456/2004 ataatsimiititaliap tunniuppaa, tassanilu digitaliusumik atsiorneq, assaat atorlugit atsiornep atorneqarnerannit taamaallaat tekniskiusumik atatillugu immikkoorteqartoq, ataatsimiititaliap ilaatigut taavaa. Teknikki nutaaliaasoq atorlugu atsiornep iliuuttip immini suliarineqarnera nalinginnaasumik malittarisassanut, atsiornep pineqartup inatsisilerinermut tunngasumik malitsigisaanik taasisunut tunngatillugu, taamaalilluni allannguuteqanngilaq. Iliuuseqarnek aqqutigalugu ersersitsineq imaluunniit pisussaatitaanissamut piumassuttip atuutinneqannginnissaanik ersersitsineq, taamaalilluni pingaaruteqarpoq. Taamaammat digitaliusumik atsiorneq nalinginnaasumik pappiaqqamik tunngavilimmik atsiornep naligiissinneqassaaq, aamma isumaqatigiissutinut, eqqartuussivikkut atorsinnaasunngortussamik aalajangiinernut imaluunniit nalunaarutinut, digitaliusumik atsiornep tunniunneqartunut, ataatsimiititaliap isumaa malillugu immikkut ittumik inatsisilerinermut tunngasumik malitseqartitsinissanik atassuteqartitsinissaq pissutissaqanngilaq.

Eqqartuussiviit avaqqullugit allakkatigut isumaqatigiissutinut aamma akiitsut allagartaannut digitaliusumik atsiornep atsiornertut naleqquttuusut, Inatsiseqarnermut ministereqarfiup nalilerpaa. Digitaliusumik takussutissiamik atsiornep kinaassusaanik annertuumik isumannaajaaneq taamaalilluni digitaliusumik atsiornep tunniuppaa, aamma, tamatuma kingorna paasineqarsinnaasussaasumik, takussutissiap imarisaasa atsiornep kingorna allanngortinneqarsinnaannginnerat qulakkeerlugu. Digitaliusumik atsiornep, atorneqartut, OCES-imi (Offentlige Certifikater til Elektroniske Servicesimi) tamanut atugassiamik tunngaveqartuunissaat, allagartat akuersissutit piumasaqaatitaliunissaat imaluunniit digitaliusumik atsiornep, minnerpaamik OCES-imi killiffiup assinganik, isumannaatsuunissamut killiffeqarnissaat, tassunga atatillugu piumasaqaataavoq.

Tamanna tunngavigalugu nutaamik § 601, imm. 5-imik ilanngussisoqarnissaa siunnersuutigineqarpoq, tamatumalu kingorna eqqartuussiviit avaqqullugit allakkatigut isumaqatigiissuteqarnerni aamma akiitsut allagartaanni digitaliusumik atsiorneqartuni, takussutissiap allakkatigut assilillugu sanaqqinneqarnera akiliisitsisarnermut eqqartuussivimmut tunniunneqassaaq.

Aammattaaq inatsisissatut siunnersuummi § 1, nr. 22, tassungalu oqaaseqaatit innersuussutigineqarput.

3. Pisortanut aningaasaqarnikkut kingunissai aamma atortuulersitsinermi kingunissaa

Inatsisissatut siunnersuut pisortanut aningaasaqarnikkut kinguneqassanngilaq imaluunniit atortuulersinermut kinguneqassanngilaq.

4. Inuussutissarsiornermut il.il. aningaasaqarnikkut allaffissornikkullu kingunissaa

Inatsisissatut siunnersuut inuussutissarsiornermut il.il. allaffissornikkut imaluunniit aningaasaqarnikkut kinguneqarnissaa naatsorsuutigineqassanngilaq.

5. Innuttaasunut allaffissornikkut kingunissaa

Inatsisissatut siunnersuut innuttaasunut allaffissornikkut kinguneqassanngilaq.

6. Silaannaap pissusaanut kingunissaa

Inatsisissatut siunnersuut silaannaap pissusaanut kinguneqassanngilaq.

7. Avatangiisinut- pinngortitamullu kingunissaa

Inatsisissatut siunnersuut pinngortitamut- imaluunniit avatangiisinut kinguneqassanngilaq.

8. EU-mi inatsisitigut tunngassuteqartut

Inatsisissatut siunnersuut EU-mi inatsisitigut tunngassuteqartunik imaqanngilaq.

9. Oqartussaasut suleqatigiiffiillu il.il. tusarniaavigineqartut

Inatsisissatut siunnersuut piffissami [*] oqartussaasunut aamma suliniaqatigiiffinnut il.il. tusarniutigalugu nassiunneqarsimavoq:

[*]

10. Immersugaq eqikkaaffiusoq

	Pitsaasumik sunniutissai/aningaasartuutikinnerunerit (angeruit, annertussusaa allaguk/Naaggaaruit allaguk »Soqanngilaq«)	Ajortumik sunniutissai/aningaasartuu- teqarnerunissaq (angeruit, annertussusaa allaguk/Naaggaaruit allaguk »Soqanngilaq«)
Naalagaaffimmut, kommuninut nunallu immikkoortuinut aningaasaqarnikkut kinguneri	Soqanngilaq	
Naalagaaffimmut, kommuninut nunallu immikkoortuinut atuutilersitsinerup kinguneri	Soqanngilaq	Soqanngilaq
Inuussutissarsiorturnut aningaasaqarnikkut kingunissaa	Soqanngilaq	Soqanngilaq
Inuussutissarsiorturnut allaffissornikkut kingunissaa	Soqanngilaq	Soqanngilaq
Innuttaasunut allaffissornikkut kingunissaa	Soqanngilaq	Soqanngilaq
Silap pissusaanut tunngatillugu kingunissaa	Soqanngilaq	Soqanngilaq
Avatangiisinullu tunngatillugu kingunissaa	Soqanngilaq	Soqanngilaq
EU-mi inatsisitigut tunngassuteqartut	Inatsisissatut siunnersuut EU-mi inatsisitigut tunngasunik isiginniffinnik imaqanngilaq.	

§ 250 *a-mi* nutaamik aalajangersakkamik ilanngussisoqarnissaa siunnersuutigineqarpoq, tamatumalu kingorna inuk, akuusumut ukiukitsumut, imaappoq 18-it inorlugit ukiulimmut, angajoqqaatut akisussaatitaasusoq, suliamik saqqummiussisimasoq imaluunniit suliareqqitassanngortitsisimasoq, tamakkiisumik ilaannakortumilluunniit suliami aningaasartuutit, ukiukitsumut akilerneqartussatut pisussaaffigineqaraluartut, akilissagai, eqqartuussiviup aalajangersinnaavaa.

Ukiukitsup, suliami akuusup, akiliinissaanut taarsiullugu, angajoqqaatut akisussaatitaasup suliami aningaasartuutitik akileeqqullugu naalakkerneqarnissaa eqqartuussiviup nammineerluni aalajangiiffigissallugu periarfissarilissagaa, siunnersuutip kingunerissavaa.

Ukiukitsup akuusup suliami aningaasartuutitik illuatungerisamut akiliinera, nammineq aningaasartuutiginagu eqqartuussisulersuussinermi imaluunniit eqqartuussisutigoortitsinermi ikiorteqarnissamut sillimmasiissummit matussuserneqanngippat, aalajangersagassatut siunnersuutigineqartoq taamaallaat naleqquttuussaaq.

Ammattaaq ukiukitsoq akuusoq taamaanngippat tamakkiisumik ilaannakortumilluunniit illuatungerisamut imaluunniit naalagaaffiup karsianut suliami aningaasartuutitut akiliisussaasussappat, malittarisassatut siunnersuutigineqartoq malillugu taamaallaat aalajangiisoqarsinnaasussaavoq.

Ukiukitsup akuusup eqqartuussinermut, matumani saqitsaannermik suliat suliarineqartarnerannut naalagaaffimmut akitsuut aamma eqqartuussissuserisumit ikiorteqarnissamut aningaasartuutit ilanngullugit, nammineerluni aningaasartuutai aalajangersakkami ilaatinneqassanngillat.

Pissutsit, siunissami angajoqqaatut akisussaatitaasumit tamakkiisumik ilaannakortumilluunniit akilerneqarnissaannik naalakkiuteqarnissamut periarfissiisut, illuatungerisap imaluunniit naalagaaffiup karsiata suliamut aningaasartuunik akiliinissaannik aamma taamaattoqassappat aningaasat amerlassusaannik qanoq amerlatigisunik akiliinissaannik, aalajangiineq sunniuteqarfiginavianngilaa. Akuusup aningaasatigut inissisimanera imaluunniit inuttut atugarisai aalajangiinermut tassunga pingaaruteqarpata, taamaalilluni ukiukitsup akuusup aningaasatigut inissisimanera aamma inuttut atugarisaat, taamaattoqassappat tamanna pillugu eqqartuussiviup

aalajangiinerani tunngavilersuutini ilaatinneqarsinnaapput. Kisianni illuatungerisaq imaluunniit naalagaaffiup karsia suliami aningaasartuutini akiliisinneqassanersoq pillugu, angajoqqaatut akisussaatitaasup aningaasatigut inissisimanera imaluunniit inuttut atugarisai pingaaruteqassanngillat.

Ukiukitsoq sinnerlugu angajoqqaatut akisussaatitaasup eqqartuussivimmi suliamut aallartissimasai, aamma ukiukitsoq akuusoq sinnerlugu eqqartuussummik suliassanngortitseqqissutigisimasai, sulianut suliassanngorteqqitat, aalajangersagassatut siunnersuutigineqartumi ilaatinneqassapput. Pisuni, taakkunani suliaq ukiukitsoq pillugu eqqartuussivimmi suliassanngortitsisoqarsimalluni, kisianni angajoqqaatut akisussaatitaasooq piomasaaammik illuatungiliisumik immikkut eqqartuussutigineqartussaasumik ukiukitsoq sinnerlugu saqqummiussisimalluni, suliami aningaasartuutit, piomasaaammik illuatungiliisumik immikkut eqqartuussutigineqartussamut atatinneqarsinnaasut, matumani naligiissinneqarput. Ukiukitsoq suliassanngortitaq suliami tamarmi ajorsartitaappat, tassani piomasaaammik illuatungiliisumik angajoqqaatut akisussaatitaasooq immikkut eqqartuussutigineqartussaasumik ukiukitsoq sinnerlugu saqqummiussisimalluni, piomasaaatip illuatungiliisup immikkut eqqartuussutigineqartussap aningaasartaasa amerlassusaasa, suliami aningaasartuutitut ukiukitsumit illuatungerisamut imaluunniit naalagaaffiup karsianut akileqqullugit naalakkiutigineqartunit annertunerulersitsippata, taamaalluni aalajangersagassatut siunnersuutigineqartoq taamaallaat atorneqarsinnaasussaavoq. Immikkut eqqartuussutigisassatut piomasaaatip illuatungiliisup, aningaasat amerlassusaat, suliami aningaasartuutitut ukiukitsumit illuatungerisamut imaluunniit naalagaaffiup karsianut akileqqullugit naalakkiutigineqartut amerlanerulersinngippagit, aalajangersagassatut siunnersuutigineqartoq atuutinneqarsinnaanaviannngilaq.

Suliami aningaasartuutit, ukiukitsumit taamaanngippat akilernerqartussatut naalakkiutigineqartussaagaluit, tamakkerlutik imaluunniit ilaannai angajoqqaatut akisussaatitaasumit akilernerqassanersut pillugit eqqartuussiviup aalajangiinerani, suliaq qanoq issusaa aamma ukiukitsup aamma angajoqqaatut akisussaatitaasup aningaasatigut inissisimanerat pingaartinneqassasoq naatsorsuutigineqarpoq. Suliaq ukiukitsup namminerisamik suliffeqarfiutaanut tunngappat, imaluunniit ukiukitsoq aningaasaqarnikkut inissisimanani malillugu ujariatsinani suliami

anigaasartuutini akiliisinnaassappat, pissutsit aallaaviatigut angajoqqaatut akisussaataasup suliami anigaasartuutini akiliinissamut naalakkerneqarnissaanut pissutissaqartitsissanngillat. Tamatuma saniatigut ukiukitsup ukiui eqqartuussiviup pingaartissinnaasussaavaa. Ukiukitsoq 15-it inorlugit ukioqarpat, angajoqqaatut akisussaataasup suliami anigaasartuutini akiliinissamut naalakkerneqarnissaa pissutissaqartinneqassaaq. Pisuni immikkut illuinnartuni, taakkunani suliami paasissutissat aamma suliap qanoq issusaa tunngavigalugu eqqartuussiviup ukiukitsup suliami anigaasartuutini akiliinneqarnissaa erseqqissumik naleqquttuunngitsoq nalilerpagu, malittarisassaq taamaallaat atuutissammat, maluginiarneqassaaq.

Illuatungerisamut eqqarsaatiginninneq, matumani illuatungerisap sulisaatsimi suliami anigaasartuutini akiligassanngortinneqartuniki akiliinissaminut periarfissaa ilanngullugu, eqqartuussiviup naliliinerani ilaatinneqassanngitsoq, aammattaaq naatsorsuutigineqarpoq. Pisuni pineqartuni angajoqqaatut akisussaataasup aamma ukiukitsup akuusup imminnut atassuteqarneranni suliami anigaasartuutit ilanngussortut agguarneqarnissaat aalajangersagassatut siunnersuutigineqartup taamaallaat siunertarivaa, aamma illuatungerisamut eqqarsaatigisassat tassunga atatillugu naleqqutinngillat.

Suliami anigaasartuutit ukiukitsumit namminermit imaluunniit taassuma angajoqqaatut akisussaataasuani akilerneqassanersut, nammineq imaluunniit akuusumit noqqaassuteqartoqarnerata kingorna, eqqartuussiviup isummerfigisussaassavaa. Suliaq aamma ukiukitsoq akuusoq pillugit paasissutissat, suliami takussutissiani takuneqarsinnaasut imaluunniit allakkut eqqartuussivimmut apuussimasut, aallaavigalugit, eqqartuussivik aalajangiisussaassaaq. Eqqartuussinerup ingerlanerani ukiukitsoq inersimasutut piginnaatitaalerpat, siusinnerusukkut angajoqqaatut akisussaataasoq, ukiukitsoq sinnerlugu suliamik saqqummiussisimasoq, taamaattoqarpat, eqqartuussiviusup naliliinera malillugu suliami anigaasartuutit, piffissamut ukiukitsup inersimasutut piginnaatitaalinnginnera sioqqullugu pisimasumut tunngassuteqartumut, tamakkiisumik ilaannakortumilluunniit akileeqqullugu naalakkerneqarsinnaavoq.

Angajoqqaatut akisussaataasut, ukiukitsoq sinnerlugu suliamik saqqummiussisut imaluunniit suliaasanngortitseqqittut, aalajangersakkami ilaatinneqassapput. Angajoqqaatut akisussaataasut marluuppata,

ataatsimoorlutik suliamik saqqummiussisimasut imaluunniit
suliassanngortitseqqissimasut, angajoqqaatut akisussaatitaasut taakku
marluk aalajangersakkami ilaatinneqassapput.

Suliap nalaani ukiukitsoq angajoqqaatut akisussaatitaasumik nutaamik
imaluunniit angajoqqaatut akisussaatitaasunik nutaanik pippat,
angajoqqaatut akisussaatitaasut nutaat, angajoqqaatut akisussaatitaasutut
sulilernermik kingorna, suliaq imaluunniit suliareqqitassanngortitsineq,
suliami aningaasartuutitik amerlanerusunik ilanngussisoqaqqitsinnagu,
taamaatinngippassuk, inuk imaluunniit inuit siusinnerusukkut
angajoqqaatut akisussaatitaasut aamma inuk imaluunniit inuit
angajoqqaatut akisussaatitaasut nutaat, aalajangersakkami
ilaatinneqassapput. Angajoqqaatut akisussaatitaasup imaluunniit
angajoqqaatut akisussaatitaasut nutaat piunasaqaat allanngortippassuk
imaluunniit ingerlatsinermi alloriarnernik allanik suliaqarpata, taakkulu
suliami aningaasartuutit malunnaatiliimmik ilappatigit, inuk imaluunniit
inuit siusinnerusukkut angajoqqaatut akisussaatitaasimasut, aalajangiinerit
taamaattut malitsigisaannik suliami aningaasartuutit ilaneqarnerannut
akiliinissamik naalakkerneqartussaassannginnerat, kisianni taamaallaat
aningaasat amerlassusaannik, aalajangiinerit taakku minillugit
amerlassuseqartussatut isumaqarfigineqartunik akiliinissaat,
naatsorsuutigineqarpoq.

Angajoqqaatut akisussaatitaasut marluuppata, imaluunniit angajoqqaatut
akisussaatitaasut nikinneranni angajoqqaatut akisussaatitaasut arlallit,
aalajangersakkami ilaatinneqartut, taanna imaluunniit taakku marluullutik
imaluunniit tamarmik illuatungerisamut imaluunniit naalagaaffiup karsianut
suliami aningaasartuutitik akiliinissamik naalakkerneqassanersoq, aamma
taamaattoqarpat aningaasat amerlassusaat qanoq amerlatigisut tassani
pineqarnersut, eqqartuussiviup naliliineranik tunngaveqartinneqassaaq.
Angajoqqaatut akisussaatitaasut ataasiakkaat aningaasatigit
inississimanerisa aamma inuttut atugaasa saniatigit, ilaatigit angajoqqaatut
akisussaatitaasut ataasiakkaat suliassanngortitsinermi imaluunniit
suliareqqitassanngortitsinermi aamma suliap ingerlanneqarnerani qanoq
atuussimanersut, eqqartuussiviup pingaartissinnaassavaa. Suliami
aningaasartuutit illuatungerisamut imaluunniit naalagaaffiup karsianut
angajoqqaatut akisussaatitaasut arlallit akilissagaat, eqqartuussiviup
naalakkiutigippagu, tamatuma peqatigisaanik angajoqqaatut
akisussaatitaasut assigiimmik pisussaaffeqarlutik imaluunniit tamarmik
immikkut akisussaatitaassanersut, eqqartuussiviup aalajangissavaa.

Aalajangersagassatut siunnersuutigineqartoq malillugu angajoqqaatut akisussatitaasoq ataaseq imaluunniit arlallit suliami aningaasartuutit illuatungerisamut imaluunniit naalagaaffiup karsianut akiliinissaat eqqartuussiviup naalakkiutigippagu, suliami aningaasartuutitut taakkununga ukiukitsup akiliinissaraluanut naalakkiut taarsiutaassaaq. Suliamut aningaasartuutit, ukiukitsumut akuusumut akiligassatut naalakkiutigineqartussaagaluartut, angajoqqaatut akisussaatitaasoq imaluunniit angajoqqaatut akisussaatitaasut akilissagaat naalakkerneqarpata, ukiukitsaq akuusoq taamaalilluni illuatungerisamut imaluunniit naalagaaffiup karsianut suliami aningaasartuutit akiliinissamik naalakkerneqassanngilaq. Angajoqqaatut akisussaatitaasoq imaluunniit angajoqqaatut akisussaatitaasut aningaasat amerlassusaasa ilaannaanik akiliinissamik, ukiukitsup akuusut taamaanngippat akilissallugit pisussaaffigisassaraluinik, akileeqqullugit naalakkerneqarpata, ukiukitsaq akuusoq tamatuma peqatigisaanik aningasaasat amerlassusaasa sinnernik akileeqqullugu naalakkerneqartussaassaaq. Suliami aningaasartuutit ilai assigiinngitsut pineqartussaapput, aamma angajoqqaatut akisussaatitaasoq imaluunniit angajoqqaatut akisussaatitaasut aamma ukiukitsup akuusup taamaammat akiliineq assigiimmik pisussaaffiliisoq akisussaafigissanngilaat.

Angajoqqaatut akisussaatitaasup, aalajangersagassatut siunnersuutigineqartoq malillugu, illuatungerisamut imaluunniit naalagaaffiup karsianut suliami aningaasartuutit akilerneqarnissaannik naalakkerneqartup, tamanna pillugu eqqartuussisarnermik inatsimmi § 517 aamma 517 b malillugit malittarisassat nalinginnaasut malillugit aalajangiineq aalajangeqqitassanngortissinnaavaa, tamatumalu kingorna suliami aningaasartuutit pillugit eqqartuussutini aalajangiinernilu allani Nunatsinni Eqqartuussivimmit aamma Nunatta Eqqartuussisuuneqarfianit aalajangerneqartuni, annerpaamik 50.000 kr.-inut aalajangersarneqartut, Ingerlatitseqqinnissamik aalajangiisartut akuersissuteqarnerannik piumasqaateqarfiussapput.

Tamatuma saniatigut suliaq suliareqqitassanngortinneqarpat, angajoqqaatut akisussaatitaasut suliami aningaasartuutit akiliinerat allanngortinneqarsinnaassaaq. Suliap nammineq aalajangiiffigineqarnera aalajangersarneqarpat imaluunniit eqqartuussivimmi suliareqqitassanngortitsiviusumit allanngortinneqarnera apeqqutaatinnagu, tamanna atuuppoq. Eqqartuussisarnermik inatsimmi § 251

(allanngortinneqartussatut siunnersuutigineqanngitsoq) malillugu, suliami aningaasartuutit pillugit aalajangiineq eqqartuussiviup nammineerluni aalajangiiffigissavaa.

Pisuni, angajoqqaatut akisussaatitaasoq ukiukitsoq sinnerlugu suliamik saqqummiussisimalluni, taannalu suliarinneqqaarfiusumi taparserneqarluni, kisianni illuatungerisap naammagittaalliuuteqarnerata kingorna naammagittaalliornermi suliaq ajorsarfigalugu, aalajangersagassatut siunnersuutigineqartup suliarinneqqaarfimmi suliami aningaasartuutit ilaatissavai. Kisianni aalajangersagassatut siunnersuutigineqartoq pisumi taamaattumi, tassani illuatungerisap taamaallaat naammagittaalliuuteqarsimalluni, suliarinneqqaarfimmi suliami aningaasartuutit ilaatinneqassanngillat. Taamaattoqarpat pisuni taamaattumi, suliap suliarinneqqaarfimmi suliarineqarnera pineqartillugu, pissutsit assigiinngitsut malillugit angajoqqaatut akisussaatitaasoq tassa illuatungerisamut imaluunniit naalagaaffiup karsianut, suliami aningaasartuutininik akiliinissaanik angajoqqaatut akisussaatitaasoq tassa naalakkerneqarsinnaassaaq, kisianni naammagittaalliorfimmi suliap sulierineqarnera pineqartillugu naamik.

Aalajangersagassatut siunnersuutigineqartoq malillugu eqqartuussiviup angajoqqaatut akisussaatitaasoq suliami aningaasartuutit illuatungerisamut imaluunniit naalagaaffiup karsianut akileqqullugit naalakkiippat, illuatungerisap suliami aningaasartuutaasa taarsiissutigineqarnissaat pillugit pissusaaffik ukiukitsumit akuusumit angajoqqaatut akisussaatitaasumut inatsisitigut aalajangersakkamik ikaarsaariarneq pineqassaaq, aamma angajoqqaatut akisussaatitaasoq tassunga atatillugu ukiukitsumut arlaannaanilluunniit piumasaqaateqarnissamut pissutissaqanngilaq.

Aammattaaq immikkut ittumik inatsisitigut pissusaaffigalugu akiliineq pineqassaaq, taannalu tunissutitut imaluunniit pilersuinertut pissuseqanngilaq. Angajoqqaatut akisussaatitaasumut aamma ukiukitsumut suliami aningaasartuutininik akiliinerup akileraarutitut tunngatillugu suliarineqarnerata, akileraartarneq pillugu inatsiseqartitsinermi malittarisassat nalinginnaasut malissavaa.

Qallunaat eqqartuussisarnermik inatsisaanni § 319 a-mi tunngaviit tunngavigalugit aalajangersagaq sananeqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.1 innersuussutigineqarpoq.

Nr. 2-mut

Iliuutsit, eqqartuusiviup peqataanissaanik piumasaqaateqarfiusut, pillugit noqqaassut saqqummiunneqarpat, pinerluttoqarsimaneranik paasiniaanerup nalaani eqqartuussinerit ingerlanneqassasoq, eqqartuussisarnermik inatsimmi § 343, imm. 1-p malitsigaa.

Pinerluttoqarsimaneranik paasiniaanerup nalaani eqqartuussineq aammattaaq ingerlanneqassaaq tulluuttut pippata, 1) uppernarsaatit, taamaaliortoqanngippat annaaneqartussatut aarlerigineqartut, isumannaajarneqarnissaannut tamanna pisariaqartinneqarpat imaluunniit annertuumik ajoqusiineq imaluunniit kinguartitsineq pitinnagu erniinnaartumik eqqartuussivimmut eqqartuussisussamut ingerlanneqarsinnaassappat, 2) pinerluttoqarsimaneranik paasiniaanermut taanna pingaaruteqartutut isumaqarfigineqartariaqarpat, 3) tamat soqutisisaannik eqqarsaatiginninnermut tamanna naleqquttutut nalilerneqarpat imaluunniit 4) § 343, imm. 2 malillugu, pissutissalimmik pasisaq immikkoortitaatillugu tigummigallagaappat, aamma uppernarsaatit isumannaarneqarnerat immikkoortitaanerup atorunnaarsinneqarnissaa pillugu apeqqummut pingaaruteqarsinnaassappat.

§ 343, imm. 3-mik nutaamik ilanngussisoqarnissaa siunnersuutigineqarpoq. Aalajangersagassatut siunnersuutigineqartoq malillugu, eqqartuussinerni, kapitali 36 aamma 37 malillugit pinngitsaaliissummik akuliunnissat pillugit aalajangiinissanik tunngasuni, politiit aamma § 392 malillugu illersuisup ivertitap najuutinngikkaluarluni atorlut elektroniskiusut atorlugit peqataasinnaanerat, eqqartuussiviup aalajangersinnaavaa.

Politiit aamma suliami illersuisoq ivertitaq eqqartuussiviup akuerisaanik eqqartuussinerni eqqartuussisarnermik inatsimmi kapitali 36 aamma 37 malillugit pinngitsaaliissummik akuliunnissat pillugit aalajangiinissanik tunngasuni, politiit aamma illersuisup ivertitap najuutinngikkaluarluni atorlut elektroniskiusut atorlugit peqataasinnaanerat, allanngortitsinerup kingunerissavaa.

Eqqartuussinerni, taakkunani, akuliunnerup imaluunniit akuliunnerit suliarineqarfigisinnaasaasa iluanni piffissaliussap sivitsorneqarnissaanik

taamaallaat isummertoqartussaalluni, periarfissap taassuma pingaarnertut atornerqarnissaa naatsorsuutigineqarpoq.

Eqqartuussinerni aallarnersaataasuni, taakkunani politiit akuliunnermik suliaqarsinnaanerat eqqartuussiviup isummerfigisussaallugu, timitalerlugu takkulluni eqqartuussinerup ingerlanneqarnissaa utaqqineqarsinnaanngippat, najuutinngikkaluarluni atortut elektroniskiusut atorlugit peqataasinnaanermik periarfissap taamaallaat atornerqarnissaa, kisianni naatsorsuutigineqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.2. innersuussutigineqarpoq.

Nr. 3-mut

Inuup nakkutigineqarani inummut allamut nalunaarsinnaatitaaneranik akuliunneq aamma nakkutilliineq pillugit eqqartuussiviup aalajangiinneranut eqqartuussisarnermik inatsimmi § 391 tunngassuteqarpoq. Eqqartuussiviup aalajangiinnermini oqarasuaatip normui, init, najugaqarfiit imaluunniit nassiussat, akuliunnermut tunngassuteqartut, taassagai, § 391, imm. 1-malitsigaa.

§ 391, imm. 1-imi oqaaseqatigiinni siullerni »akuliunnermut tunngasut« kingorna ilanngunneqassaaq: », taamaattoq imm. 2 takuuk« siunnersuutigineqarpoq.

Inatsisissatut siunnersuummi § 1, nr. 4 malillugu eqqartuussisarnermik inatsimmi § 391-mi nutaamik imm. 2-mik ilanngussisoqarnissaanik siunnersuutip malitsigisaanik allanngortitsineq pineqarpoq.

Inatsisissatut siunnersuummi § 1, nr. 4 malillugu, taamaalilluni § 391, imm. 2-tut siunnersuutigineqartoq malillugu, inatsisinik unioqutitsinerit ilaanni pinerluttoqarsimaneranik pasiniaanermut atatillugu oqarasuaatip naalaarneqarnissaa imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissat pillugit aalajangiinikkut oqarasuaatip normuinit taarsiullugu inuk, akuliunnermut tunngassuteqartoq (pasisaq) eqqartuussiviup taasinnaavaa.

Nr. 4-mut

Inuup nakkutigineqarani inummut allamut nalunaarsinnaatitaanerani akuliunneq aamma nakkutilliineq pillugit eqqartuussiviup aalajangiineranut eqqartuussisarnermik inatsimmi § 391 tunngassuteqarpoq. Eqqartuussiviup aalajangiinnermini oqarasuaatip normui, init, najugaqarfiit imaluunniit nassiussat, akuliunnermut tunngassuteqartut, taassagai, § 391, imm. 1-malitsigaa. Aammattaaq suliami pissutsit piviusut taaneqassapput, tassani akuliunnissamut piumasaqaatit naammassineqarsimanerat taperserneqassalluni. Aalajangiineq qaqugukkulluunniit allanngortinneqarsinnaavoq.

§ 391, imm. 2-mik nutaamik ilanngussisoqarnissaa siunnersuutigineqarpoq. Aalajangersagassatut siunnersuutigineqartoq taanna malillugu, pinerluttulerinermi inatsimmi kapitali 7-imiit 8 ilanngullugu malittarisassanik imaluunniit § 65, imm. 1-imik, § 66-imi oqaaseqatigiinnik siullernik, § 68, imm. 1-imik aamma 2-imik, § 69-imik, § 83-imik, § 86-imik, § 90, imm. 2-mik, § 88-imi oqaaseqatigiit siulliit malillugit ingasattumik nakuusernarmik, § 92, imm. 1 malillugu kiffaanngissusiiarnermik, § 93-imik, § 98, imm. 2-mik, § 102-mi oqaaseqatigiit siulliit malillugit ingasattumik tillinniarnermik, § 111 a malillugu ingasattumik aningaasatigut peqquserluutinik malunnarunnaarsaanermik, § 112-imik imaluunniit ikiaroornartut pillugit inatsimmik imaluunniit sakkut pillugit inatsimmik piaaraluni ingasattumik unioqquitsinermik pinerluttoqarsimaneranik paasiniaaneq tunngassuteqarpat, § 385, imm. 1, imaluunniit § 386, imm. 1 malillugu, eqqartuussiviup aalajangiinerani oqarasuaatip normuinit aalajangersimasunut taarsiullugu, inuk, akuliunnermut tunngassuteqartoq (inuk pasineqartoq) taaneqassaaq. Taamaattoqarpat aalajangersagassatut siunnersuutigineqartoq malillugu, akuliunnerup suliarineqarsinnaaffiata iluani, piffissaliussap naanerani piaarnerpaamik oqarasuaatit normui, akuliunnermi sammitinneqartut, aamma aalajangiinnermi taaneqanngitsut, pillugit politiit eqqartuussivik nalunaarfigissavaat. Pissutsit immikkut ittut tamanna pissutissaqartippassuk, oqaaseqatigiit aappaat malillugu nalunaarutiginninneq, kingusinnerpaamik akuliunnerup aallartinneqarnerata kingorna nalunaaquttap akunneri 24-it qaangiutsinnagit pissaaq. Oqaaseqatigiit aappaat aamma pingajuat malillugit nalunaarutiginninneq, oqarasuaatip normuinit taakkunannga pasineqartumut imaluunniit pasineqartumit nalunaarutininik tunniussisoqartarneranik, pissutaasut aalajangersimasut ilimagineqarnerisa taaneqarnerannik imaqassaaq. § 392, imm. 1 malillugu illersuisoq

ivertinneqarsimasoq eqqartuussiviup nalunaaruteqarfigissava, taassumalu tamatuma kingorna akuliunneq inatsisinut naapertuunnersoq pillugu apeqqut eqqartuussivimmut saqqummiussinnaavaa. Eqqartuussiviup isumaa malillugu akuliunneq suliarineqartussaasimanngikkaluarpat, tamanna pillugu eqqartuussiviup Rigsadvokati nalunaaruteqarfigissavaa. Akuliunnerit, eqqartuussiviup isumaa malillugu Politiit Immikkut Paasiniaasartuinit suliarineqarsimasussaannngikkaluartut, Inatsiseqarnermut ministereqarfimmut nalunaarutigineqassapput. « Tamatuma kingorna imm. 2-miit 3 ilanngullugu imm. 3-miit 4 ilanngullugu aalajangersaganngussapput.

Inatsisinik unioqqutitsinerit ilaanni pinerluttoqarsimaneranik pasiniaanermut atatillugu oqarasuaatip naalaarneqarnissaa imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissat pillugit aalajangiinikkut oqarasuaatip normuinut taarsiullugu inuk, akuliunnermut tunngassuteqartoq (inuk pasisaq) eqqartuussiviup taasinnaagaa, aalajangersagassatut siunnersuutigineqartup kingunerissavaa.

Oqarasuaatikkut attaveqatigiinneq imaluunniit assigisaanik nalunaarasuartaatikkut attaveqatigiinneq piviusoq, assersuutigalugu e-mail-, internet, imaluunniit telefax-ikkut attaveqatigiinneq apeqqutaatinnagu, eqqartuussisarnermik inatsimmi § 385-imi (oqarasuaatinik naalaarneq) aamma 386-imi (oqarasuaatip naalaarneqarnissaa imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissat) ilaatinneqartut, inuup nakkutigineqarani inummut allamut nalunaarsinnaatitaaneranik akuliunnerit tamaasa, aalajangersagassatut siunnersuutigineqartumi ilaatinneqassapput.

Eqqartuussisarnermik inatsimmi § 386 malillugu siumut sammisumik oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissat pissarsiarinissaannut aamma tunniussisussaataitanermut malittarisassat malillugit kingumut sammisumiinngitsoq, aalajangersagassatut siunnersuutigineqartumi taamaallaat ilaatinneqassapput.

Eqqartuussisarnermik inatsimmi § 391, imm. 2-mi oqaaseqatigiittut siullertut oqaasertaliarineqartussatut siunnersuutigineqartoq malillugu, inuk pillugu eqqartuussiviup aalajangiinermik atuutilersitsisinnaaneranut,

oqarasuaatip naalaarnissaanut imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissat pissarsiarineqarnissaannut piumasaqaatit nalinginnaasut naammassineqarsimasussaassapput.

Eqqartuussisarnermik inatsimmi § 391, imm. 2-tut aalajangersagassatut siunnersuutigineqartup, taamaalilluni ingerlatseriaaseq pisortatigoortoq taamaallaat piuminarsassavaa, taamaalilluni politiit taamaallit sioqqutsisumik aalajangiinerup ataatsip pissarsiarinnissaa pisariaqartissammasuk.

Nalunaarasuartaatikku attaveqatigiinnermut atortut sorliit pineqartup atussallugit toqqarsimasai apeqqutaatinnagit, inuup oqarasuaataanik naalaarnissaq pillugu aalajangiinerup, inuup pasineqartup naalaarneqarnissaa periarfississavaa. Taamatut sioqqutsisumik aalajangiineq periarfissaliissutigalugu, oqarasuaatit normui, pissutsit aalajangersimasut pissutigalugit inuup, pinerluttulerinermi inatsimmi kapitali 7-imiit 8 ilanngullugu malittarisassanik imaluunniit § 65, imm. 1-imik, § 66-imi oqaaseqatigiinnik siullernik, § 68, imm. 1-imik aamma 2-imik, § 69-imik, § 83-imik, § 86-imik, § 90, imm. 2-mik, § 88-imi oqaaseqatigiit siulliit malillugit ingasattumik nakuusernermik, § 92, imm. 1 malillugu kiffaanngissusiiaanermik, § 93-imik, § 98, imm. 2-mik, § 102-mi oqaaseqatigiit siulliit malillugit ingasattumik tillinniarnermik, § 111 a malillugu ingasattumik aningaasatigut peqquserluutinik malunnarunnaarsaanermik, § 112-imik imaluunniit ikiaroornartut pillugit inatsimmik imaluunniit sakkut pillugit inatsimmik piaaraluni ingasattumik unioqqutitsisimaneranik pasineqartup, naalaarneqarnissaata, politiit ingerlaavartumik aallartissinnaasussaavaat.

Assigisaanik inuk pillugu oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissanik pissarsinerup, oqarasuaatit normuisa sorliit oqarasuaatinut, pasineqartumut imaluunniit pasineqartumut nalunaarutinik tunniussinnermut atorneqartutut aalajangersimasumik pissutissaqartutut isumaqarfigineqartut pillugit ingerlaavartumik pissarsisinnaanissaq periarfississavaat.

Pinerluttoqarsimaneranik paasiniaaneq aalajangersakkanik taaneqartunik unioqqutitsinnermut, ingasattorujussuarmik aamma navianaatilimmik inatsisinik unioqqutitsinerusunik tunngassuteqarpat, aalajangersagassatut siunnersuutigineqartoq taamaallaat atuutissaaq. Pinerluttulerinermi

inatsimmi unioqqutitsinernut sorlernut aalajangersagassatut siunnersuutigineqartup atorneqarnissaata aalajangersarneqarnerani Inatsiseqarnermut ministereqarfiup aalajangersakkat taakku, qallunaat eqqartuussisarnermik inatsisaanni ilatinneqartut aallaavigisimavai, tassami killiliinermut tunngatillugu eqqarsaatigisassat assingi Kalaallit Nunaanut atuuttussaammata. Aalajangersakkat ilaannut, pillaaasarnermik inatsimmisut, unioqqutitsinerit erseqqissakkat pillugit – assersuutigalugu nakuuserneq aamma tillinniarneq – pinerluttulerinermi inatsimmi immikkut ittumik aalajangersakkamik aalajangersaasoqanngitsillugu, taakku ingasattumik unioqqutinneqarsimanerat pineqassasoq, piumasaqaataassaaq. Ikiaroorartut pillugit inatsimmik aamma sakkut pillugit inatsimmik unioqqutitsinerit pineqartillugit, qallunaat eqqartuussisarnermik inatsisaanni §§ 191-p aamma 192 a-p assigisaannik, oqarasuaatip naalaarneqarnissaa aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissanik pissarsinissaq pillugu qallunaat eqqartuussisarnermik inatsisaanni § 783, imm. 2 -mi ilaatinneqartunik, inuk pillugu eqqartuussiviup aalajangiinera, pinerluttulerinermi inatsit aalajangersakkanik immikkut ittunik aalajangersakkanik imaqanngilaq. Kisianni taama tulleriillutik, ikiaroorartut pillugit inatsimmik aamma sakkut pillugit inatsimmik piaaraluni ingasattumik unioqqutitsinerup pisimanissaa, aalajangersagassatut siunnersuutigineqartoq malillugu piumasaqaataassaaq. Assersuutigalugu ikiaroorartunik inunnut amerlasuunut imaluunniit annertuumik akilersilluni tunniussineq imaluunniit aallaasinik imaluunniit sakkunik allanik imaluunniit qaartartunik, taakku immikkut ittumik navianartumik pissuseqarnertik pissutigalugu annertuumik ajoqusiisinnanermut naleqquttut, pineqarpata tamanna pisinnaavoq.

§ 391, imm. 2-mi oqaaseqatigiit aappaanni oqaasertaliunneqartussatut siunnersuutigineqartut malillugit, piffissap, akuliunnerup suliarineqarsinnaaffissaata naanerani, oqarasuaatit normui naalaarneqarsimasut, imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissianik pissarsiniarneq, kiisalu oqarasuaatit normuisa sorliit oqarasuaatinut, pasineqartumut imaluunniit pasineqartumit nalunaarutininik tunniussinermut atorneqartutut aalajangersimasumik pissutissaqartutut isumaqarfigineqartut pillugit piaarnerpaamik politiit eqqartuussivik nalunaaruteqarfigisussaassavaat.

Eqqartuussiviup tamatuma kingorna illersuisumut, § 391, imm. 2-mi oqaaseqatigiit pingajuattut aalajangersagassatut siunnersuutigineqartoq malillugu, eqqartuussisarnermik inatsimmi § 392, imm. 1 malillugu suliami ivertinneqartumut nalunaaruteqarnissaa siunertaralugu, politiit eqqartuussivimmut nalunaaruteqarnerat pisussaassaaq. Nalunaaruteqarnerup illersuisup ivertinneqarsimasup akuliunnerup inatsisinut naapertuunnera pillugu apeqqut pillugu eqqartuussivimmut saqqummiunneqarnissaata isummerfiginissaa periarfississavaa.

Taamaalilluni § 391, imm. 2-mi oqaaseqatigiit pingajuanni aalajangersagassatut siunnersuutigineqartoq malillugu, akuliunnerup inatsisinut naapertuunnera pillugu apeqqut, eqqartuussivimmut saqqummiunneqarsinnaassaaq.

Tassunga atatillugu § 391, imm. 3-mi oqaaseqatigiit tallimaat aamma arferngat malillugit aalajangersagassatut siunnersuutigineqartut malillugit, akuliunneq suliarineqartussaasimanngikkaluq suliarineqarsimasoq eqqartuussiviup paasiguniuk, tamanna pillugu Rigsadvokatimut, aamma akuliunneq Politiit Immikkut Paasiniaasartuinit suliarineqarsimappat, Inatsiseqarnermut ministereqarfimmut eqqartuussivik nalunaaruteqartussaassaaq.

Qallunaat eqqartuussisarnermik inatsisaanni § 783, imm. 2-mi tunngaviit tunngavigalugit, aalajangersagaq sananeqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.3 innersuussutigineqarpoq.

Nr. 5-mut

Politiit arsaarinninnermik aamma tunniussisussaataitanermik suliaqarsinnaanerat eqqartuussisarnermik inatsimmi kapitali 37-imi malittarisassiuunneqarpoq.

Arsaarinninnissaq pillugu aalajangiineq aamma tunniussisussaataitaneq pillugu naalakkiineq, politiit noqqaassuteqarnerisigut eqqartuussivimmit aalajangerneqassasoq, § 422, imm. 1-p malitsigaa. Massakkuugallartoq Kalaallit Nunaanni isertuussaasumik arsaarinninnissamut erseqqissumik periarfissaliissuteqanngilaq.

Nutaatut § 422, imm. 10-imi erseqqissumik periarfissaliisummik taamaattumik ilanngussisoqarnissaa siunnersuutigineqarpoq. Pasineqartoq imaluunniit allat tamanna pillugu ilisimasaqartinnagit, arsaarinninnermik suliaqartoqarnissaa, pinerluttoqarsimaneranik paasiniaanermut pingaaruteqarpat, aalajangersagassatut siunnersuutigineqartukkut tamanna pillugu eqqartuussivik aalajangiisinnaavoq aamma § 423, imm. 1-imi oqaaseqatigiit aappaanni aamma pingajuanni malittarisassat avaqqunneqassapput. § 391, imm. 2-mi aamma 3-mi, § 392-imi § 396-imi malittarisassat taamatuttaaq atuutissasut siunnersuutigineqarpoq.

Tamanna pinerluttoqarsimaneranik paasiniaanermut annertuumik pingaaruteqarpat, isertuussaasumik arsaarinninnissamik suliaqarsinnaanermut erseqqissumik periarfissaliissutip eqqunneqarnissaa, siunnersuutip kingunerissavaa.

Eqqartuussisarnermik inatsimmi § 415, imm. 2 malillugu isertuussaasumik uppersaatinik ujaasinerup assigisaanik isertuussaasumik arsaarinninnermut ingerlatsineq pillugu malittarisassat assingi atuuttariaqassasut, siunnersuutigineqarpoq.

Qallunaat eqqartuussisarnermik inatsisaanni § 807 e-mi tunngaviit tunngavigalugit, aalajangersagaq sananeqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.4 innersuussutigineqarpoq.

Nr. 6-mut

Unnerluussummik tunniussinnermut atatillugu, unnerluussisussaataasut allakkamik unnerluussummik eqqartuussivimmut tunniussippata, suliap siumut ingerlanneqarnissaanut pingaarnertut akisussaaffik eqqartuussivimmut tiguneqassaaq. Allagaq unnerluussut pingaarnertut isumaqatigiinniarnissamut aggeqqusissut peqatigalugu nalunaarutigineqassasoq, eqqartuussisarnermik inatsimmi § 441, imm. 2-mi takuneqarsinnaavoq. Taamaalilluni tamanna malillugu piffissaliineq allakkap unnerluussutip tunniunneqareernerata kingorna pissaaq.

Nutaamik § 488 a-mik ilanngussisoqarnissaa siunnersuutigineqarpoq, tamatumalu kingorna noqqaassuteqarnerup kingorna, tamanna naleqquttutut isigineqarpat, unnerluussisussaataasut allakkamik

unnerluussummik tunniussinissaat sioqqullugu eqqartuussiviup suliami
pingaarnertut isumaqatigiinniarneq sioqqutsilluni
piffissalersinnaanngussavaa.

Tamanna naleqquttutut nalilerneqarpat, unnerluussisussaataitasut
unnerluussummik tunniussinissaat sioqqullugu, noqqaassuteqarnikkut
suliami pingaarnertut isumaqatigiinniarneq eqqartuussiviup sioqqutsisumik
piffissalersinnaassagaa, aalajangersagassatut siunnersuutigineqartup
kingunerissavaa. Sioqqutsilluni piffissaliineq ima paasineqassaaq,
eqqartuussisup, illersuisup/illersuisut aamma unnerluussisussaataitasut
pingaarnertut isumaqatigiinniarnissamut piffissat erseqqinnerusumik
isumaqatigiissutigissagaa, taamaalilluni allakkap unnerluussisutip
tunniunneqarnerani pisortatigoortumik piffissaliinermi, pisoq
pinnginniassammat, taakkunani eqqartuussiviup aamma/imaluunniit
illersuisup pingaarnertut isumaqatigiinniarnissami piffissami
ungasissorujussuarmi aatsaat peqataasinnaalluni imaluunniit taamaallaat
ulluni ima siamasitsigisuni ingerlatsisinnaallutik, taamaalilluni
pingaarnertut isumaqatigiinniarneq aaqqissuunneqarsinnaanani aamma
naleqqunnerpaamik naammassineqarsinnaanani. Pinerluttulerinermik suliat
ataatsimut sivilissusaasa appartinneqarnissaat aalajangersakkakut
siunertarineqarpoq.

Sioqqutsilluni piffissaliinissaq pillugu noqqaasut
unnerluussisussaataitasunit aamma pissutissalimmik pasisamit
(illersuisumit) saqqummiunneqarsinnaassaaq.

Suliani tamani, taakkunani unnerluussinissaq pillugu aalajangiineq
sioqqullugu, unnerluussutip saqqummiunneqarnissaa
erseqqissisinneqareerluni, aallaaviatigut aalajangersagaq
atorneqarsinnaassaaq. Sulisaatsimi pingaarnertut suliat, taakkunani suliap
ingerlanera unnerluussut pillugu apeqqummut unnerluussisussaataitasut
aalajangiiniarnerat sivilisoreerluni, imaluunniit suliap ingerlanissaa
sivilisoorujussuusussatut ilimagineqarluni, aalajangersakkap atuuffigissavai.

Tamatuma saniatigut sioqqutsisumik piffissaliinissaq pillugu noqqaassut,
pisuni, taakkunani pingaarnertut isumaqatigiinniarneq eqqartuussinerni
ullunik arlalinnik sivilissuteqartussatut naatsorsuutigineqartuni, kiisalu
suliani arlalinnik unnerluussaasoqartuni naleqquttuusinnaavoq. Suliani
taamatut pissuseqartuni, pissutsit assigiinngitsut tamanna
pissutissaqartinngippassuk, unnerluussutip saqqummiunneqarnissaa

erseqqissippat, unnerluussisussaataasut sioqqutsilluni piffissaliinissaq pillugu noqqaassuteqartariaqarput.

Allakkatigut, oqarasuaatikkut ataatsimiinneq, piareersaataasumik eqqartuussineq, imaluunniit eqqartuussineq, pissut alla pissutigalugu ingerlanneqartoq, assersuutigalugu piffissaliussap sivitsorneqarnissaa pillugu eqqartuussineq, tunngavigalugu aalajangiineq aalajangerneqarsinnaasussaavoq. Eqqunngitsuliorfigineqartumut illersuisoq ivertinneqarsimappat, taanna attavigineqartariaqarpoq, matumani eqqartuussisoqassappat eqqartuussinissaq sioqqullugu.

Sioqqutsisumik piffissaliineq pissanersoq pillugu eqqartuussiviup aalajangiinera, aalajangiinermik aalajangiinikkut pissaaq. Eqqartuussisarnermik inatsimmi § 517, imm. 1-imi aalajangersagaq atuuttoq malillugu aalajangiineq aalajangeqqitassanngortinneqarsinnaassaaq.

Qallunaat eqqartuussisarnermik inatsisaanni § 843 b-mi tunngaviit tunngavigalugit, aalajangersagaq sananeqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.5 innersuussutigineqarpoq.

Nr. 7-mut

Eqqartuussisarnermik inatsimmi § 449, imm. 1 malillugu pingaarnertut isumaqatigiinniarnissamut piffissaq sumiiffissarlu taallugit, eqqartuussiviup politiit, unnerluussaasoq aamma illersuisoq aggeqqussavai.

§ 449, imm. 1-imi, »Eqqartuussisut« sioqqullugit ilanngunneqassaaq: »Suliaq § 449 d malillugu eqqartuussinertaqanngitsumik suliarineqanngippat,«, siunnersuutigineqarpoq.

Inatsisissatut siunnersuummi § 1, nr. 8 malillugu, § 449 d-mi aalajangersagassatut nutaatut siunnersuutigineqartoq malillugu, pineqartoq akileeqqusummi piffissaliussap erseqqinnerusumik aalajangersakkap iluani, suliap eqqartuussivimmi suliarineqarnissaa noqqaassutigisimanngippagu, piumaasaqaatit erseqqinnerisut ilaasa ataanni, eqqartuussiviup suliat suliarisinnaassavai, taakkunani

eqqartuussinertaqanngitsumik akileeqqussut atulersinneqarsimalluni, eqqartuussiviup suliarisinnaasussaavai.

Suliat, taakkunani akileeqqussut atulersinneqarsimalluni, aamma inatsisissatut siunnersuummi § 1, nr. 8 malillugu, akileeqqussummi eqqartuussisarnermik inatsimmi § 449 d-mi aalajangersagassatut siunnersuutigineqartumut naapertuuttumik nalunaarummik tunniussisoqarsimalluni, eqqartuussiviup pingaarnertut isumaqatigiinniarnermut piffissalerlugu sumiiffissalerlugu aggersaasarnernik pingaarnertut malittarisassamit ilaatinneqannginnissat, allannguutissatut siunnersuutigineqartup kingunerissavaa.

Nr. 8-mut

Nutaatut § 449 d-mik ilanngussisoqarnissaa siunnersuutigineqarpoq. Aalajangersagassatut siunnersuutigineqartoq malillugu, eqqartuussinertaqanngitsumik suliat, taakkunani akiliisitsissutip akuersissutigineqarnera aamma taamaattoqarpat aqqusinikkut angallanneq pillugu inatsit malillugu arsaarinninneq imaluunniit biilersinnaanermik allagartaajagaaneq atulersinneqarsimalluni, akileeqqussut atulersinneqarsimalluni, eqqartuussiviup suliarisinnaavai tulliuttut pippata, 1) § 449 c, imm. 2 malillugu, akileeqqussut akuerineqanngippat, imaluunniit akuersissut utertinneqarpat, pineqartup piffissaliussap akileeqqussummi aalajangerneqartup iluani suliap eqqartuussinikkut suliarineqarnissaa noqqaassutigisimanngippagu, pineqartoq ilimasaareqqeqqaarani pissutsinut akileeqqusissummut tunggassuteqartunut eqqartuunneqarsinnaasoq, akileeqqussummi taaneqarpat, aamma 2) nr. 1-imi piffissaq eqqorlugu noqqaassummik pineqartoq saqqummiussisimanngippat.«

Piumasaqaatit taakku ataanni, pineqartup akileeqqussummi piffissaliussap aalajangerneqarsimasup iluani, suliap eqqartuussivimmi suliarineqarnissaa noqqaassutigisimanngippagu, eqqartuussiviup suliat, taakkunani akiliisitsissutip akuersissutigineqarnissaa aamma taamaattoqassappat, eqqartuussinertaqanngitsumik aqqusinikkut angallanneq pillugu inatsit malillugu, arsaarinninneq imaluunniit biilersinnaanermik allagartaajagaaneq suliarisinnaassagai, aalajangersagassatut siunnersuutigineqartup kingunerissavaa. Ataani erseqqinnersumik allaanerineqartut malillugit, noqqaassut sumut nassiunneqassanersoq, akileeqqussummi takuneqarsinnaasussaavoq.

Akileeqqussummut, pineqartumut nassiunneqartumut (allakkami malitseqartitsiviusumi akiliisitsissutit tassani pineqartillugit) ulluliussumut minnerpaamik ullunik 14-inik sivisutigisussamut eqqartuussinissamik noqqaassummut piffissaliussaq aalajangersarneqassasoq naatsorsuutigineqarpoq. Suliap eqqartuussivimmut nassiunneqarnissaa pinngitsoortinniarlugu, pineqartup akileeqqussummik akuersissuteqarnissaanut piffissaliussamut, piffissaliussaq naapertuussinnaavoq.

Akileeqqusissut, politiinit unnerluussisussaataitaasunillu atulersinneqartoq, nalunaarummik qulaani taaneqartumik imaqartussaasariaqartoq siunertarineqarpoq, taamaalilluni suliat taakku aaqqissuussinissatut nutaatut siunnersuutigineqartoq malillugu suliarineqarsinnaaniassammata. Akileeqqusissutitut, inatsisissatut siunnersuummut nalinginnaasumik oqaaseqaatini imm. 2.6.1 malillugu, eqqartuussisarnermik inatsimmi § 452, imm. 2 malillugu, eqqartuussuteqarsinnaaneq akornuserneqanngippat, aqqusinermi angallanneq pillugu inatsimmi § 57 malillugu taamaallaat akiliisitsissummik imaqanngitsunut, kisianni aamma biilersinnaanermik allagartaataanermik imaqartunut, aallaaviatigut tamanna aamma atuutissaaq.

Akileeqqusissutit, oqartussaasunit politiinit unnerluussisussaataitaasunillu allaanerusunit atulersinneqartut pineqartillugit, akileeqqusissutit Rigsadvokatip isumaqatigiissuteqarfigineqarnera malillugu qulaani taaneqartumik nalunaarummik taamaallaat pilersorneqassasut naatsorsuutigineqarpoq. Taamaattoqarpat immikkut oqartussaasup akileeqqusissutit akuersissutigineqanngitsut unnerluussisussaataitaasunut tunniuttussaasariaqaraat, taakkulu tamatuma kingorna politiinit suliami pinerluttoqarsimaneranik paasiniaanissaq pisariaqartinneqarnersoq, aamma suliaq eqqartuussivinnut saqqummiunneqassanersoq aalajangiiffigissagaat, maluginiarneqassaaq. Taamaattoqarpat unnerluussisussaataitaasut aamma tassaassapput suliamik eqqartuussivimmut saqqummiussisussat.

Suliap eqqartuussivimmi suliarineqarnissaa pillugu noqqaassutip sumut nassiunneqarnissaa, akileeqqussummi takuneqarsinnaasussaassaaq. Oqartussaasumut, akileeqqussummik atulersitsisimasumut, noqqaassut aallaaviatigut nassiunneqartussaassaaq. Akileeqqussut immikkut oqartussaasumit atulersinneqarsimasoq pineqarpat, noqqaassut immikkut oqartussaasumut imaluunniit politeqarfimmut, akileeqqussut akuersissutigineqanngippat, suliamik tiguisussamut nassiunneqassanersoq,

Rigsadvokatip oqartussaasullu pineqartup akornanni taamaattoq isumaqatigiissutigineqassaaq.

Suliat tamarmik, akileeqqusummik atulersitsiviusimasut, eqqartuussivimmi suliap suliarineqarnissaanut tamanna pillugu noqqaassuteqarnissap piumasaqaataaneramik nalunaaruteqarnermik qulaani taaneqartumik nalunaarummik, aamma suliaq eqqartuussisooqataasartut peqataatinnagit suliarineqartussaanninneranik imaqartut, aaqqissuussinissamut siunnersuutigineqartumi ilaatinneqassapput. Suliat, taakkunani akileeqqussut atuutilersinneqarsimalluni, kisianni allagaq unnerluussut piumasaqaatini, akileeqqussut sinnerlugu imaqartut, aaqqissuussineq malillugu suliarineqassanngillat. Eqqunngitsuliorfigineqartoq akileeqqussutip atulersinneqarnerata kingorna, taarsiivigitinnissamik piumasaqaammik, suliap nalaani suliarineqartussatut kissaatigineqartumik, saqqummiussisimappat, tamanna assersuutigalugu pisinnaavoq.

Suliassaqarnersoq, taakkunani nalunaarut qulaani pineqartoq tunniunneqarsimalluni, aamma eqqartuussinissaq noqqaassutigineqarsimanani, taamaakkaluartoq ullumikkutut eqqartuussinissamut aggeqqusisoqartariaqannginnersoq, aammattaaq eqqartuussiviup aalajangersinnaavaa. Najuutinngikkaluarluni eqqartuussummik nalunaaruteqarsinnaanermut piumasaqaatit naammassineqanngitsut, siuningaani nalilernerqarpat, assersuutigalugu tamanna pisinnaavoq.

Najuutinngikkaluarluni eqqartuussummik nalunaaruteqarsinnaaneq tunngavissaqanngitsaq, suliap suliarineqarnerata nalaani aatsaat kingusinnerusukkut eqqartuussiviup paasippagu, tamanna amma pisinnaasussaavoq. Taamaattoqarpat piffissami tassani pingaarnertut isumaqatigiinniarnissamut ullumikkut pisartutut, unnerluussaasoq eqqartuussiviup aggersassavaa.

Inuup akileeqqusummik tiguisisimasup, qanoq ililluni eqqartuussinissaq pillugu noqqaassummik saaffiginnissuteqarnissaa pillugu, inatsisissatut siunnersuummi malittarisassanik aalajangersaasoqanngilaq. Pineqartup noqqaassutini oqaatsitigut allakkatigullu saqqummiussinnaagaa naatsorsuutigineqarpoq. Eqqartuussinissamik pineqartoq noqqaassuteqarusuppat, eqqartuussiviup noqqaassut unnerluussisussaataitaasunit tiguguniuk, pingaarnertut

isumaqatigiinniarnissamut piffissaq aamma sumiiffissaq aalajangissavaa aamma akiliisitsissutit pillugit suliani ullumikkut eqqartuussiviup pingaarnertut isumaqatigiinniarnernut, eqqartuussisooqataasut peqataatinnagit suliarineqartartunut, aggersaasarnera assigalugu, aggersaassaaq.

Qallunaat eqqartuussisarnermik inatsisaanni § 896 a-mi tunngaviit tunngavigalugit, aalajangersagaq sananeqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.6 innersuussutigineqarpoq.

Nr. 9-mut

Unnerluussaasoq akuerisaasumik takkutinngitsoornissani nalunaarutigiginagu imaluunniit nassuiaateqarumanngippat, aamma suliap nalaani akiliisitsissummit, arsaarinninnermit, biilersinnaanermut allagartaajagaanermut aamma taarsiissuteqarnissamit allaanerusumik pineqaatissiinissaq imaluunniit inatsisilerinnermut tunngasumik kinguneqartitsinnermik apeqquteqanngippat, unnerluunneqartup nassuersimaneratut suliaq eqqartuussiviup suliarisinnaagaa, aamma suliaq immikkut ittumik unnerluussaasumut akuliunnerunngippat, suliaq uppersaasarsaq innagu aalangiiffigisinnaagaa, § 452, imm. 2-p malitsigaa.

§ 452, imm. 2-mi, »imaluunniit unnerluutigineqartoq nassuiaateqarumanngippat« ima allanngortinneqassasoq: »unnerluunneqartoq nassuiaateqarumanngippat imaluunniit § 449 d malillugu eqqartuussinissaq pillugu noqqaassuteqarnissani ilaginnersimappagu«, siunnersuutigineqarpoq.

Suliami, tassani akileeqqussut atulersinneqarsimalluni, aamma tassani inatsisissatut siunnersuummi § 1, nr. 8 malillugu, eqqartuussisarnermik inatsimmi § 449 d-tut aalajangersagassatut siunnersuutigineqartumut naapertuuttumik nalunaarummik akileeqqusummi tunniussisoqarsimalluni, unnerluussaasoq eqqartuussisoqarnissaanik noqqaassuteqarsimanngippat, aalajangersagaq aamma atuutissasoq, allannguutissatut siunnersuutip kingunerissavaa.

Nr. 10-mut

Eqqartuussummi inerniliussap eqqartuussinermi atuarneqarneratigut, eqqartuussivik eqqartuussisummik nalunaaruteqassasoq, § 474, imm. 3-imi takuneqarsinnaavoq.

§ 474, imm. 3-mi, oqaaseqatigiit aappaat sioqqullugu, oqaaseqatigiittut nutaatut »Suliaq § 449 d malillugu suliarineqarsimappat, eqqartuussinermik ingerlateqqaarani eqqartuussut aammattaaq eqqartuussutigineqarsinnaavoq.« ilanngunneqassasoq siunnersuutigineqarpoq.

Akiliisitsissutit pillugit suliani, inatsisissatut siunnersuummi § 1, nr. 8 malillugu, eqqartuussisarnermik inatsimmi § 449 d-mi aalajangersagassatut siunnersuutigineqartoq malillugu eqqartuussinertaqanngitsumik suliarineqartuni, aammattaaq eqqartuussivik eqqartuussinertaqanngitsumik eqqartuussummik nalunaaruteqarsinnaassasoq, allannguutissatut siunnersuutigineqartup kingunerissavaa.

Nr. 11-imut

Suliani aningaasartuutit pillugit eqqartuussutit aamma aalajangiinerit allat, Nunatsinni Eqqartuussivimmit aalajangerneqarsimasut, annerpaamik 50.000 kr.-inut aalajangersarneqartut, aalajangeqqitassanngortinneqarsinnaannginnerat, § 517 b, imm. 1-p malitsigaa. Akuusup aappaanut akuusut arlaannaataluunnit suliami aningaasartuutitut akiliinnginnissaa aalajangerneqarpat, suliami aningaasartuutit 50.000 kr.-inik amerlanerusut nalunaarutigineqarnissat apeqqutaappat, tamanna pillugu aalajangiineq taamaallaat aalajangeqqitassanngortinneqarsinnaavoq. Taamaattoq Ingerlatitseqqinnissamik aalajangiisartut, pissutsit immikkut ittut pissutissaqartippassuk, aalajangeqqitassanngortitsineq akuersissuteqarfigisinnaavaat.

Nutaamik § 517 b, imm. 2-imik ilanngussisoqarnissaa siunnersuutigineqarpoq, tamatumalu kingorna § 261, imm. 2 malillugu akissarsiat pillugit Nunatsinni Eqqartuussiviup aalajangiinerit aalajangigai, annerpaamik 50.000 kr.-inut aalajangersarneqartut, aalajangeqqitassanngortinneqarsinnaanngillat. Taamaattoq Ingerlatitseqqinnissamik aalajangiisartut, pissutsit immikkut ittut pissutissaqartippassuk, aalajangeqqitassanngortitsineq

akuersissuteqarfigninnaavaat. Imm. 2 tamatuma kingorna imm. 3-nngussaaq.

§ 261, imm. 2 malillugu, eqqartuussinermi nammineq sinnerluni pisinnaatitanut ivertinneqartunut, akissarsiat pillugit Nunatsinni Eqqartuussiviup aalajangiineri, akissarsiat annerpaamik 50.000 kr.-inut aalajangersarneqarpata, taamaallaat Ingerlatitseqqinnissamik aalajangiisartut aalajangiinerisigut aalajangeqqitassanngortinneqarsinnaassasut, siunnersuutip kingunerissavaa. Akissarsiat pillugit aalajangiinernut, eqqartuussummi ilaatinneqartunut, aamma akissarsiat pillugit aalajangiinermut immikkut ittunut tamanna atuutissaaq. Aningaasat amerlassusaannut killiliussaq, eqqartuussinermi nammineq sinnerluni pisinnaatitaasumut momsi ilanngullugu akuerineqartut, ataatsimut akissarsianut tunngassuteqarput.

Qallunaat eqqartuussisarnermik inatsisaanni § 389, imm. 3-mi tunngaviit tunngavigalugit, aalajangersagaq sananeqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.7 innersuussutigineqarpoq.

Nr. 12-imut

Eqqartuussisarnermik inatsimmi §§ 580-imiit 581 ilanngullugu aamma § 583 malillugit, taama tulleriillutik, unnerluussisussaataasunit aamma eqqartuussasumit, piumasaqaatit erseqqinnerusumik taaneqartut ataanni, pinerluttulerinermik suliap eqqartuussutigineqareersup suliareqqinneqarsinnaanera pisinnaavoq. EMD-mit eqqartuussutit malinniarlugit pinerluttulerinermik suliat suliareqqinneqarnissaat pillugit immikkut ittumik malittarisassamik inatsit imaqanngilaq.

Eqqartuussisarnermik inatsimmi § 535, imm. 1 malillugu, unnerluussaasoq 18-it inorlugit ukioqarpata, unnerluussaasumut iluaqutaasumik aalajangeqqitassanngortitsineq angajoqqaatut oqartussaassuseqartumi aallartinneqarsinnaavoq. Eqqartuussisarnermik inatsimmi § 535, imm. 2-mi oqaaseqatigiit siulliit malillugit, unnerluussaasoq pineqaatissiinerup eqqartuussutigineqarnissaa sioqqullugu toqusimappat, unnerluussaasup aappaata, angajoqqaavisa imaluunniit kinguaavisa aamma qatanngutaasa unnerluussaasoq sinnerlugu aalajangeqqitassanngortitsisinnaapput.

Inatsisitigut siunnersuummut nalinginnaasumik oqaaseqaatini imm. 2.8.1-mut malittarisassat atuuttut pillugit erseqqinnerusumik allaaserinninneq innersuussutigineqarpoq.

Eqqartuussisarnermik inatsimmi nutaamik § 583 *a-imik* ilanngussisoqarnissaa siunnersuutigineqarpoq. *Imm. 1-itut* siunnersuutigineqartoq malillugu, Rigsadvokatip imaluunniit eqqartuunneqarsimasup qinnuteqarneratigut, EMD-mit inaarutaasumik eqqartuussut, Danmarkip akuuffigisaa, malinniarlugu suliaq tamakkiisumik ilaannakortumilluunniit suliareqqinneqarsinnaavoq. *Imm. 2-tut* siunnersuutigineqartoq malillugu, § 535, imm. 1, aamma § 535, imm. 2-mi oqaaseqatigiit siulliit, taamatuttaaq atuutissapput.

Pisuni tamani, EMD-mit eqqartuussut malinniarlugu pinerluttulerinermik suliat suliareqqinneqarnissaasa naleqquttunngorsinnaaneranni, eqqartuussisarnermik inatsimmi malittarisassat suliareqqitassanngortitsisinnaanermik periarfissiisinnaanerisa qulakkeerneqarnissaat, aalajangersagassatut siunnersuutigineqartumi siunertarineqarpoq.

Apeqqutitut tamanut, suliame aalajangiiffigineqarsimasunut, tamakkiisumik ilaannakortumilluunniit suliareqqitassanngortitsisinnaaneq atuutissaaq. Ilaannakoortumik suliareqqitassanngortitsineq assersuutigalugu pissutsit eqqartuussutigineqartut pinerluttulerinermi inatsimmi aalajangersakkamut allamut nuunneqarnissaat taamaallaat siunertaralugu rigsadvokat-imit atorneqarsinnaavoq.

Suliareqqitassanngortitsisinnaanermi siunnersuutigineqartumi, suliat najukkami eqqartuussivimmi, Nunatsinni Eqqartuussivimmi, Nunatta Eqqartuussisuuneqarfiani imaluunniit Eqqartuussiviit Qullersaanni aalajangerneqarsimanera apeqqutaatinnagu, pinerluttuleringeq pillugu inatsiseqartitsinerup iluani sulianut suliaringeqarsimasunut tunngassuteqassaaq. § 582 malillugu suliareqqitassanngortitsisinnaaneq aamma sulianut, unnerluussisussaataasunit inaarutaasumik aalajangiiffigineqartunut atuutissaaq.

Suliareqqitassanngortitsisinnaaneq eqqartuussutitut killilerneqassanngilaq, kisianni aalajangiinerup ilusaa apeqqutaatinnagu atuutissalluni. Pinerluttulerinermi inatsimmi kapitali 33 malillugu immikkut ittumik pineqaatissiinerit pillugit aalajangiinerit allanngortinneqarnissaat pillugit

suliareqqitassanngortitsinermik rigsadvokati qinnuteqassagaluarpat,
tamanna naleqquttuusinnaavoq.

Aalajangiinerup malinneqarnissaanut assersuutigalugu
ingerlateqqitassanngortitsinerit, allanngortitsinerit imaluunniit assigisaasa
atorneqarsinnaanerit periarfissaanngitsoq,
suliareqqitassanngortitsisinnaaneq siunnersuutigineqartup
atorneqarnissaanut piumasaqaataassaaq. Unnerlussisussaataitaasut
inatsilerinermut tunngasumik sunniutip eqqartuussutigineqartup
allanngortinneqarnissaa pillugu noqqaassuteqarnermik tunniussineritigut
EMD-mit eqqartuussut malinneqarsinnaappat,
suliareqqitassanngortitsisinnaaneq siunnersuutigineqartoq aammattaaq
atorneqarsinnaanaviannngilaq.

Eqqartuussisarnermik inatsimmi § 537 malillugu,
naammagittaalliornissamut piffissaliussap naasimanera apeqqutaatinnagu,
unnerluussisussaataitaasut eqqartuunneqarsimasumut iluaqutaasumik
naammagittaalliorsinnaanerit periarfissaappat, taamatuttaaq
suliareqqitassanngortitsisinnaaneq siunnersuutigineqartoq
atorneqarsinnaanaviannngilaq. Ingerlateqqitassanngortitsineq
Ingerlatitseqqinnissamik aalajangiisartut akuersissuteqarnissaanik
piumasaqaateqarfiuppat, aamma § 564, imm. 2, aamma § 577, imm. 2
malillugit tamanna pillugu qinnuteqarnissamut ukioq 1 piffissaliussaq
naasimappat, periarfissaq taanna taamaattoq atorneqarsinnaanaviannngilaq.

Pisuni taakkunani EMRK-mi artikili 46 malillugu, EMD-mit eqqartuussut
malinniarlugu suliamik suliareqqitassanngortitsinissamik
noqqaassuteqarnissaq naleqquttutut nalilerneqartillugu, tamanna pillugu
rigsadvokatip noqqaassuteqarnissaa naatsorsuutigineqarpoq.
Suliareqqitassanngortitsinissamik noqqaassuteqarnissaq naleqquttuunersoq
pillugu nalilersuinermit atatillugu, missiliuinerit, EMRK-mi artikili 46
malillugu iliuuserisassat naalagaaffiit naliliiffigisassaat, eqqartuussutip
naammassineqarnissaannut aalajangerneqartussat, rigsadvokatip
eqqarsaatigisussaassavai.

Eqqartuunneqartup qinnuteqarnera malillugu suliamik
suliareqqitassanngortitsisinnaaneq siunnersuutigineqartoq malillugu suliaq
suliareqqinneqassanersoq pillugu, missiliuinerit, EMRK-mi artikili 46
malillugu iliuuserisassat naalagaaffiit naliliiffigisassaat, eqqartuussutip

naammassineqarnissaannut aalajangerneqartussat, Den Særlige Klageretip naliliinerani ilaatinneqarsinnaassammata, maluginiarneqassaaq.

EMD-mit eqqartuussutip malinneqarnissaanut suliareqqitassanngortitsineq pisariaqartinneqartumik annertussusilerlugu taamaallaat pisinnaasoq, suliareqqitassanngortitsisinnaanerup siunnersuutigineqartup aammattaaq kingunerissavaa.

EMRK-mi artikili 46, imm. 1 malillugu, EMD-mit eqqartuussutitut, Danmarkip akuuffigisaanut aamma malissallugit pisussaaffigisaanut, suliareqqitassanngortitsisinnaaneq siunnersuutigineqartoq taamaallaat atuutissaaq. Suliami ingerlasumi artikili 36 malillugu akuliunnikkut Danmarki suliami akuusunnugussanngimmat, maluginiarneqassaaq. Danmarki akuunersoq aamma eqqartuussutip malinneqarnissaanut pisussaaffeqarnersoq taamaalilluni pingaaruteqarpoq, tassami suliat taamaattut – taakkunani Danmarki akuulluni – iliuutsit taamaattut taamaallaat naammagittaalliuutinut aalajangerneqassanngillat, kisiannili aamma inunnut allanut, pissutsimi assingusumiittunut, tunngatillugu aalajangerneqassapput.

EMRK-mi artikili 44 malillugu, EMD-mit eqqartuussut inaarutaasunngorpat, suliareqqitassanngortitsisinnaaneq siunnersuutigineqartoq atuutissaaq.

Ingerlatsineq pillugu malittarisassat nalinginnaasut suliareqqitassanngortitsisarneq pillugu eqqartuussisarnermik inatsimmi kapitali 44-imi malittarisassaasut, suliareqqitassanngortitsisinnaaneq siunnersuutigineqartoq malillugu qinnuteqaatit suliarineqarnerannut atuutissapput. Suliareqqitassanngortitsisinnaanermut siunnersuutigineqartoq malillugu qinnuteqaatit suliarineqarnerannut eqqartuussisarnermik inatsimmi kapitali 44-imi ingerlatsinermut malittarisassat nalinginnaasut atuutissapput. Assersuutigalugu suliareqqitassanngortitsinermut qinnuteqaat allakkatigut Nunatsinni Eqqartuussisuuneqarfimmut imaluunniit toqqaannartumik Den Særlige Klageret-imut tunniunneqassaaq aamma inatsimmi § 585, imm. 3-imi piumasagaatit naammassineqarsimassapput. Pissutsit assigiinngitsut malillugit, eqqartuussiviup naammagittaalliorfiusup § 589 malillugu inatsisit atuuttut malillugit uppernarsaasersuinerup assinga aallartissinnaassavaa aamma taamaattoqassappat oqaatsit atorlugit isumaqatigiinniarnep aallartinneqarnissaa iliuuseqarfigissallugu aamma

illersuisumik ivertitsilluni il.il. Suliaq suliareqqinneqalerpat, nutaamik pingaarnertut isumaqatigiinniarnaq eqqartuussivimmi § 592 malillugu aalajangiinermik aalajangiisimasumi pisussaassaaq. § 587 malillugu suliareqqitassanngortitsisinnaaneq siunnersuutigineqartoq malillugu suliap suliareqqinneqarnerata aallaaviatigut aalajangiinerup naammassineqarnissaata kinguartinneqarneranik imaluunniit unitsinneqarneranik kinguneqassanngilaq.

§ 535, imm. 1-mi aalajangersagaq taamatuttaaq atuutissasoq, imm. 2-mi oqaaseqatigiittut siullertut siunnersuutigineqartumi takuneqarsinnaavoq. EMD-mit eqqartuussut inaarutaasoq malinniarlugu suliareqqitassanngortitsinnissaq pillugu noqqaassut, eqqartuussaasoq 18-it inorlugit ukioqarpat, eqqartuussaasup angajoqqaatut akisussaatitaasuanit aamma aallartinneqarsinnaasoq, innersuussinerup siunnersuutigineqartup kingunerissavaa.

Imm. 2-mi oqaaseqatigiit aappaattut siunnersuutigineqartoq malillugu, eqqartuunneqartoq toqusimappat, suliareqqitassanngortitsinissamik qinnuteqaat inunnit, § 535, imm. 2-mi oqaaseqatigiinni siullerni taaneqartunit saqqummiunneqarsinnaavoq. Eqqartuussaasoq suliap aalajangiiffigineqarnerata kingorna toqusimappat, suliareqqitassanngortitsineq pillugu qinnuteqaat § 583 a-tut siunnersuutigineqartoq malillugu pineqartup aappaanit, angajoqqaavinit, kinguaavinit imaluunniit qatanngutaanit saqqummiunneqarsinnaavoq.

Qallunaat eqqartuussisarnermik inatsisaanni § 977 a-mi tunngaviit tunngavigalugit, aalajangersagaq sananeqarpoq.

Aammattaaq inatsisissatut siunnersuummut nalinginnaasumik oqaaseqaatini imm. 2.8 innersuussutigineqarpoq.

Nr. 13-imut

§ 585, imm. 4-mi atuarneqarsinnaavoq eqqartuunneqartoq aamma inuit taakku, § 583, imm. 2 malillugu suliareqqitassanngortitsineq pillugu noqqaassuteqarsinnaasut – imaappoq eqqartuussaasoq 18-it inorlugit ukioqarpat, angajoqqaatut oqartussaassuseqartoq, aamma eqqartuussaasoq toqusimappat, eqqartuussaasup aappaa, angajoqqaavi, kinguaavi aamma qatanngutai – noqqaassuteqarnerup kingorna suliareqqitassanngortitsineq

pillugu qinnuteqaatip suliarineqarnissaanut ikiorneqarnissamik pisinnaatitaasut, § 585, imm. 4-imi takuneqarsinnaavoq.

§ 585, imm. 4-imi, »§ 583, imm. 2,«-p kingorna ilanngunneqassasoq: »aamma § 583 a, imm. 2,«, siunnersuutigineqarpoq.

Suliareqqitassanngortitsineq pillugu qinnuteqaatip suliarineqarnissaanut ikiorneqarnissamut pisinnaatitaaffik inunnut, inatsisissatut siunnersuummi § 1, nr. 12 malillugu § 583 a, imm. 2-tut siunnersuutigineqartoq malillugu noqqaassuteqarsinnaasunit – imaappoq eqqartuussaasoq 18-it inorlugit ukioqarpat, angajoqqaatut oqartussaasumut, aamma eqqartuussaasoq toqusimappat, eqqartuussaasup aappaanut, angajoqqaavinut, kinguaavinut aamma qatanngutaanut aamma atuutissasoq, allanngortitsinerup kingunerissavaa.

Nr. 14-imut

Qallunaat eqqartuussisarnermik inatsisaanni § 1 a malillugu, suliareqqitassanngortitsineq pillugu apeqqut, Den Særlige Klageret-imit aalajangerneqassasoq, eqqartuussisarnermik inatsimmi 585, imm. 1-ip malitsigaa. Suliareqqitassanngortitsineq pillugu noqqaassuteqarneq allakkatigut qinnuteqarnikkut, Nunatta Eqqartuussisuuneqarfianut, imaluunniit toqqaannartumik Den Særlige Klageret-imut qinnuteqarnikkut pissasoq, § 585, imm. 2-p aammattaaq malitsigaa. § 585, imm. 3-mi piumasagaatit aalajangersarneqarsimasut qinnuteqaammi naammassineqarsimassapput.

§ 586-imi oqaaseqatigiit siulliit malillugit, pisuni § 583, imm. 1, nr. 3-mi pineqartuni, suliareqqitassanngortitsinermik qinnuteqaat eqqartuussutip nalunaarutigineqarnerata kingorna kingusinnerpaamik ukiut 5 qaangiutsinnagit saqqummiunneqarsimassaaq. Eqqartuussut malillugu eqqartuussaq kiffaanngissusiagaasimappat, taamaattoq § 586-imi oqaaseqatigiit aappaat malillugu iperagaanerup kingorna piffissami ukiut 2 tikillugit suliareqqitassanngortitsineq pillugu qinnuteqaat tamatigut saqqummiunneqarsinnaavoq.

Nutaatut § 586-mi oqaaseqatigiit pingajuattut ilanngussisoqarnissaa siunnersuutigineqarpoq, tamatumalu kingorna inatsisissatut siunnersuummi § 1, nr. 12 malillugu, § 583 a-tut siunnersuutigineqartoq malillugu eqqartuussaasumit suliareqqitassanngortitsineq pillugu qinnuteqaat,

pissutsit immikkorluinnaq ittut atuutinngippata, EMD-mit eqqartuussutip pineqartup inaarutaasunngornerata kingorna ukioq 1 qaangiutsinnagu saqqummiunneqassaaq.

Inatsisissatut siunnersuummi § 1, nr. 12 malillugu, § 583 a-tut siunnersuutigineqartoq malillugu, eqqartuussaasumit suliareqqitassanngortitsineq pillugu noqqaassummut piffissaliussaq ukiumik 1-mik sivilisutigisoq atuutissasoq, aalajangersagassatut siunnersuutigineqartup kingunerissavaa.

Isumaqatigiisummi artikili 44 malillugu, eqqartuussutip qaqugukkut inaarutaasunngornera, EMRK malillugu aalajangerneqartussaassaaq. Nalinginnaasumik oqaaseqaatini imm. 2.8.1.4. innersuussutigineqarpoq.

Eqqartuussaasumit qinnuteqaatinut piffissaliussatut siunnersuutigineqartoq taamaallaat atuutissaaq. Taamaalilluni EMD-mit eqqartuussut malinniarlugu, piffissaliussartaqanngitsumik rigsadvokati suliareqqitassanngortitsinissamik qinnuteqarsinnaassaaq. Pissutsit immikkorluinnaq ittut assersuutigalugu tassaasinnaapput ilungersunartumik napparsimanerit.

Inatsisissatut siunnersuummi nalinginnaasumik oqaaseqaatini imm. 2.8 innersuussutigineqarpoq.

Nr. 15-imut

Den Særlige Klageretip tamanna aalajangingnippagu, eqqartuussisarnermik inatsimmi § 587, imm. 1 malillugu, suliareqqitassanngortitsinermik qinnuteqaat eqqartuussutip naammassineqarnissaata kinguartinneqarnissaanik imaluunnit unitsinneqarnissaanik kinguneqanngilaq. §§ 580 imaluunniit 581 malillugu suliareqqitassanngortitsineq pillugu aalajangiinernut aalajangerneqarsimasunut tamanna aamma atuuppoq. § 583 malillugu suliareqqitassanngortitsineq pillugu aalajangiineq aalajangerneqarpat, eqqartuunneqartup tamanna noqqaassutigippagu, naammassinninneq kinguartinneqassaaq imaluunniit unitsikkallarneqassalluni.

§ 587-imi oqaaseqatigiinni siullerni »eqqartuussutip« ima allanngortinneqarnissaa: »aalajangiinerup« siunnersuutigineqarpoq.

Allanngortitsinissatut siunnersuutigineqartoq inatsisissatut siunnersuummi § 1, nr. 12-ip malitsigaa, tamatumuunalu EMD-mit eqqartuussut malinniarlugu suliareqqitassanngortitsinissaq pillugu eqqartuussisarnermik inatsimmi nutaamik § 583 a-mik eqqussisoqarnissaa siunnersuutigineqarpoq. Aalajangersagaq taanna malillugu, EMD-mit eqqartuussutit, Danmarkip akuuffigisai, malinniarlugit assersuutigalugu Kalaallit Nunaanni eqqartuussivinnit aalajangiinerit aalajangerneqarsimasut suliareqqitassanngortinneqarsinnaanerit aamma periarfissanngussaaq.

Inatsisissatut siunnersuummut nalinginnaasumik oqaaseqaatini imm. 2.8 innersuussutigineqarpoq.

Nr. 16-imut

Eqqartuussisarnermik inatsimmi § 587, imm. 1 malillugu, Den Særlige Klageretip tamanna aalajanginngippagu, eqqartuussisarnermik inatsimmi § 587, imm. 1 malillugu, suliareqqitassanngortitsinermik qinnuteqaat eqqartuussutip naammassineqarnissaata kinguartinneqarnissaanik imaluunnit unitsinneqarnissaanik kinguneqanngilaq. §§ 580 imaluunniit 581 malillugu suliareqqitassanngortitsineq pillugu aalajangiinernut aalajangerneqarsimasunut tamanna aamma atuuppoq. § 583 malillugu suliareqqitassanngortitsineq pillugu aalajangiineq aalajangerneqarpat, eqqartuunneqartup tamanna noqqaassutigippagu, naammassinninneq kinguartinneqassaaq imaluunniit unitsikkallarneqassalluni.

§ 587-imi oqaaseqatigiit pingajuanni »§ 583«-p kingorna ilanngunneqassasoq: »imaluunniit § 583 a«, siunnersuutigineqarpoq.

Allanngortitsinissatut siunnersuut, inatsisissatut siunnersuummi § 1, nr. 12-p malitsigaa, tamatumuunalu EMD-mit eqqartuussut malinniarlugu suliareqqitassanngortitsinissaq pillugu eqqartuussisarnermik inatsimmi nutaamik § 583 a-mik eqqussisoqarnissaa siunnersuutigineqarpoq.

Den Særlige Klageretip tamanna aalajanginngippagu, eqqartuussisarnermik inatsimmi § 583 a malillugu, suliareqqitassanngortitsinermik qinnuteqaat eqqartuussutip naammassineqarnissaata kinguartinneqarnissaanik imaluunnit unitsinneqarnissaanik kinguneqanngilaq.

Nr. 17-imut aamma 18-imut

Aalajangiinikkut, tunngavilersorneqartussakkut, suliareqqitassanngortitsineq pillugu noqqaassut malinneqassanersoq pillugu Den Særlige Klageretip aalajangissagaa, eqqartuussisarnermik inatsimmi § 590, imm. 1-p malitsigaa. Noqqaassut malinneqarpat, pingaarnertut isumaqatigiinniarnernup pinissaa aalajangiinermi siunertarineqassaaq. Eqqartuussaasoq toqusimappat, nutaamik pingaarnertut isumaqatigiinniarnertalernagu suliareqqitassanngortitsinissamik noqqaassut Den Særlige Klageretip itigartitsissutigissavaa imaluunniit eqqartuussut nalunaarutigissavaa, tassuunakkullu imm. 2 malillugu eqqartuussut pineqartoq atorunnaarsinneqassaaq.

§ § 590, imm. 2, »eqqartuussuteqassaaq« ima allanngortinneqassasoq: »aalajangiinermik aalajangiissaaq«, siunnersuutigineqarpoq. Aammattaaq § 590, imm. 2, »eqqartuussummik pineqartumik« ima allanngortinneqassasoq: »aalajangiinermik pineqartumik« siunnersuutigineqarpoq.

Allannguutissatut siunnersuutigineqartut inatsisissatut siunnersuummi § 1, nr. 12-p malitsigaat, tamatumuunalu eqqartuussisarnermik inatsimmik nutaamik § 583 a-mik eqqussisoqarnissaa siunnersuutigineqarpoq. Aalajangersagaq taanna malillugu EMD-mit eqqartuussutit, Danmarkip akuuffigisai, malinniarlugit assersuutigalugu Kalaallit Nunaanni eqqartuussivinnit aalajangiinerit aalajangerneqarsimasut suliareqqitassanngortinneqarsinnaaneratt aamma periarfissanngussaaq.

Inatsisissatut siunnersuummut nalinginnaasumik oqaaseqaatini imm. 2.8 innersuussutigineqarpoq.

Nr. 19-imut aamma 20-imut

Suliami suliareqqitassanngortinneqartumi nutaamik pingaarnertut isumaqatigiinniarneq eqqartuussivimmi, siusinnerusukkut suliami eqqartuussuteqarsimasumi, pissasoq, eqqartuussisarnermik inatsimmi § 592, imm. 1-imi oqaaseqatigiinni siullerni takuneqarsinnaavoq.

§ 583 malillugu suliareqqitassanngortitsineq aalajangerneqarsimatillugu, eqqartuussut nutaaq, eqqartuunneqartumut ajoqutaasumik siusinnerusukkut eqqartuussummit allaanerussanngitsoq, aammattaaq § 592, imm. 3-imi oqaaseqatigiit siulliit malitsigaat.

§ 592, imm. 1-imi oqaaseqatigiinni siullerni, »eqqartuussuteqarsimasumi« ima allanngortinneqassasoq: »aalajangiinermik aalajangiisimasumi« siunnersuutigineqarpoq.

§ 592, imm. 3-imi oqaaseqatigiinni siullerni »eqqartuussut« ima allanngortinneqassasoq: »aalajangiineq« aammattaaq siunnersuutigineqarpoq.

Allannguutissatut siunnersuutigineqartut inatsisissatut siunnersuummi § 1, nr. 12-p malitsigaat, tamatumuunalu eqqartuussisarnermik inatsimmik nutaamik § 583 a-mik eqqussisoqarnissaa siunnersuutigineqarpoq. Aalajangersagaq taanna malillugu EMD-mit eqqartuussutit, Danmarkip akuuffigisai, malinniarlugit assersuutigalugu Kalaallit Nunaanni eqqartuussivinnit aalajangiinerit aalajangerneqarsimasut suliareqqitassanngortinneqarsinnaanerit aamma periarfissanngussaaq.

Inatsisissatut siunnersuummut nalinginnaasumik oqaaseqaatini imm. 2.8. innersuussutigineqarpoq.

Nr. 21-imut

§ 583 malillugu suliareqqitassanngortitsineq aalajangerneqarsimatillugu, eqqartuussut nutaaq (inatsisissatut siunnersuummi § 1, nr. 20 »aalajangiineq«-mut allanngortinneqarnissaa siunnersuutigineqartoq), eqqartuunneqartumut ajoqutaasumik siusinnerusukkut eqqartuussummit allaanerussanngitsoq, aammattaaq § 592, imm. 3-imi oqaaseqatigiit siulliit malitsigaat.

§ 592, imm. 3-mi »§ 583«-ip kingorna ilanngunneqassasoq: »imaluunniit § 583 a«, siunnersuutigineqarpoq.

Allannguutissatut siunnersuutigineqartut inatsisissatut siunnersuummi § 1, nr. 12-p malitsigaat, tamatumuunalu EMD-mit eqqartuussutit, malinniarlugit eqqartuussisarnermik inatsimmik nutaamik § 583 a-mik eqqussisoqarnissaa siunnersuutigineqarpoq.

§ 583 malillugu suliareqqitassanngortitsineq aalajangerneqarsimatillugu, eqqartuussut nutaaq eqqartuunneqartumut ajoqutaasumik siusinnerusukkut eqqartuussummit allaanerussanngitsoq, aalajangersagassatut siunnersuutigineqartup kingunerissavaa.

Nr. 22-imut

Pinngitsaaliisummik naammassinninnissamut suliarinnissinnaanermut pisortatigoortumik piginnaatitaaneq pillugu eqqartuussisarnermik inatsimmi § 601, imm. 1-miit 3 ilanngullugu malittarisassanik imaqarpoq. § 601, imm. 4-imi oqaaseqatigiit siulliit malillugit, pinngitsaaliisummik naammassinninnissaq pillugu noqqaassut, paasissutissat suliap suliarineqarnissaanut pisariaqartinneqartut, ilanngunneqassapput.

Akiligassarsinermi isumaqatigiissutit pillugit inatsimmi § 36, imm. 2, aamma § 45, imm. 1-imi oqaaseqatigiit sisamaat aamma tallimaat malillugit, pisinermi isumaqatigiissutit digitaliusumik atsiornikut, akiliisitsisarnermut eqqartuussivimmi atuutsinneqassappata, Kalaallit Nunaannut akiligassarsinermi isumaqatigiissutit pillugit inatsimmut pingaarnertut peqqussutip Inatsiseqarnermut ministereqarfimmit suliarinninneranut ingerlasumut atatillugu, Kalaallit Nunaanni eqqartuussisarnermik inatsimmi § 601 nutarterneqassasoq, Inatsiseqarnermut ministereqarfiup paasisimavaa.

Nutaamik § 601, imm. 5-*imik* ilanngussisoqarnissaa siunnersuutigineqarpoq, tamatumalu kingorna eqqartuussiviup avataatigut allakkatigut isumaqatigiissutitut aamma akiitsut allagartaannut, digitaliusumik atsiorneqartunut, takussutissiap allakkatigut assilillugu sanaqqinneqarnera akiliisitsisarnermut eqqartuussivimmut tunniunneqassaaq. Tamatuma kingorna imm. 5, imm. 6-inngussaaq.

Piffissami digitaliusumik atsiorfigisami, takussutissiap allakkatigut assilillugu sanaqqinneqarnerata, eqqartuussiviit avataasigut allakkatigut isumaqatigiissutit imaluunniit akiitsut allagartaasa imarisaasa eqqorluartumik saqqummiunnerissavaat. Eqqartuussummik naammassisitsiniaanissamik piumasaqaateqartup (inuup, naammassinninniaanermut sammitinneqartup) takussutissiamik taassuminnga digitaliusumik atsiornermigut, takussutissiap takussutissiisutigineqarnerata taamaalilluni takussutissiaq digitaliusoq sinniisoqartissinnaassavaa.

Eqqartuussiviup avataatigut allakkatigut isumaqatigiissummi imaluunniit akiitsut allagartaannit digitaliusumi imaluunniit eqqartuussisarnermik inatsimmi § 601, imm. 4-imi oqaaseqatigiit siulliit,

allanngortinneqartussatut siunnersuutigineqanngitsut, malillugit pinngitsaaliissummik naammassisitsinissaq pillugu noqqaassumi, pineqartumi namminermi, akiliussinermut tunngavik digitaliusumik atsiorneqarsimasoq takuneqarsinnaasariaqarpoq.

Akiliisitsiniarnerup nalaani, piffissami digitaliusumik atsiornermi takussutissiap allakkatigut assilillugu sanaqqinneqarnera, eqqartuussiviit avataasigut allakkatigut isumaqatigiissutip imaluunniit akiitsut allagartaata imarisaasa eqqorluartumik saqqummiunnerinngikkaa, eqqartuusummik naammassisitsiniaanissamik piumasaqaateqartup atuutsinniarpagu, eqqartuussisarnermik inatsimmi § 609, allanngortinneqartussatut siunnersuutigineqanngitsaq, malillugu, eqqartuusummik naammassisitsiniaanissamik piumasaqaateqartup (inuup, naammassinninniaanermut sammitinneqartup) tamanna pillugu uppersaasussaaneq pisussaaffigissavaa.

Qallunaat eqqartuussisarnermik inatsisaanni § 488, imm. 2-mi oqaaseqatigiit pingajuanni tunngaviit tunngavigalugit, aalajangersagaq sananeqarpoq.

§ 2-mut

Inatsit ulloq [ulloq] atuutilissasoq, imm. 1-imi siunnersuutigineqarpoq.

Pinerluttulerinermik suliap suliareqqitassanngortinneqartarneri pillugit malittarisassat allanngortinneqarnissaattut siunnersuutit, suliareqqitassanngortitsineq pillugu qinnuteqaatinut, inatsisip atuutilersinneqarnerata kingorna saqqummiunneqartunut, atuutissapput, taamaattoq imm. 2-tut siunnersuutigineqartoq takuuk.

Inatsisip atuutilersinneqarnera sioqqullugu Europami Inuit Pisinnaatitaaffii pillugit Eqqartuussivimmit eqqartuussutit malitsigisaannik suliareqqitassanngortitsineq pillugu noqqaassutitut § 1, nr. 12 aamma 14 atuutissanngitsut, *imm. 2-mi* siunnersuutigineqarpoq.

Europami Inuit Pisinnaatitaaffii pillugit Eqqartuussivimmit eqqartuussutitut malinninniarluni suliareqqitassanngortitsineq pillugu malittarisassat, eqqartuussutitut, piffissami inatsisip atuutilerfiata kingorna nalunaarutigineqartunut, taamaallaat sunniuteqassasut, imm. 3-tut siunnersuutigineqartup kingunerissavaa. Europami Inuit Pisinnaatitaaffii

pillugit Eqqartuussivimmit eqqartuussutip, inatsisip atuutilersinneqarnera sioqqullugu imaluunniit kingoqqullugu nalunaarutigineqarsimanera, pingaaruteqassaaq. Inatsisip atuutilersinneqarnerata kingorna eqqartuussut inaarutaasumik eqqartuussutinngornersoq immini pingaaruteqanngilaq. Inuit Pisinnaatitaaffii pillugit Eqqartuussivimmit eqqartuussut piffissami inatsisip atuutilersinneqarfia sioqqullugu nalunaarutigineqarpat, kisianni suliassanngorteqqinneqarpat, taanna atuutilersitsinermik piffissap kingorna nalunaarutigineqarpat, Storkammer-ip kingusinnerusukkut eqqartuussutaanut inatsisissatut siunnersuummi § 1, nr. 12 aamma 14 atuutissapput.

Ilanngussaq 1

Inatsisissatut siunnersuutip inatsimmut atuuttumut ataatsimoortinneqarnera

<i>Oqaasertalerneqarnera atuuttoq</i>	<i>Inatsisissatut siunnersuut</i>
	§ 1 Inatsimmik allanngorneri ilanngullugit nalunaarutiginninneq nr. 1007, 27. juni 2025-imeersoq malillugu, kingusinnerpaamik Kalaallit Nunaanni eqqartuussisarnermik inatsisip aamma Kalaallit Nunaanni pinerluttulerinermi inatsisip allanngortinneqarneri pillugit inatsisimmi (Kalaallit Nunaanni eqqartuussisarnermik inatsisip nutarterneqarnera il.il.) [X-imi, X- imeersumi § 1-ikkut allanngortinneqartumi, Kalaallit Nunaanni eqqartuussisarnermik inatsimmi tulliuttut suliarineqassapput:
§ 250. ---	1. § 250-ip kingorna ilanngunneqassaaq: »§ 250 a. Akuusumut ukiukitsumut angajoqqaatut akisussaaitaasup suliamut saqqummiussaminut imaluunniit eqqartuussisunut annerusunut ingerlateqqitassanngortitsinerminut, tamakkiisumik imaluunniit ilaannakortumik suliamut aningaasartuutit, akuusup ukiukitsup akilissallugit pisussaaffigisaraluanik, akiliissasoq, eqqartuussiviup aalajangersinnaavaa.«

§ 343. --- <i>Imm. 2. ---</i> 1-4) ---	2. § 343-imi imm. 3-tut ilanngunneqassaaq: »Imm. 3. § 392 malillugu, kapitalini 36 aamma 37 malillugit pinngitsaaliissummik akuliunneq pillugu aalajangiinerit pineqartillugit, politiit aamma suliami illersuisup ivertinneqartup najuutinngikkaluarlutik elektroniskiusumik atortut atorneqarnerisigut eqqartuussinermi peqataasinnaasut, eqqartuussiviup aalajangersinnaavaa.«
§ 391. Eqqartuussiviup aalajangiinermini taagussavai oqarasuaatit normui, sumiiffii, najukkat imaluunniit nassiussat, akuliunnermut tunngasut. Aammattaaq taaneqassapput suliaassami pissutsit aalajangersimasut akuliunnermut piumasaqaatit naammassineqarsimanerannut tapersiutaasut. Aalajangiineq sukkulluunniit allanngortinneqarsinnaavoq. <i>Imm. 2.</i> Eqqartuussiviup aalajangiinermini piffissaq akuliunnerup ingerlaffissaa aalajangissavaa. Piffissaq taanna sapinngisamik sivikitsuutinneqassaaq sapaatillu akunneri sisamat sinnissanagit. Eqqartuussivik politiinit	3. § 391, imm. 1-imi oqaaseqatigiinni siullerni »akuliunnermut tunngasut« kingorna ilanngunneqassaaq: », taamaattoq imm. 2 takuuk«. 4. § 391-imi imm. 1-ip kingorna immikkoortut nutaatut ilanngunneqassaaq: »Imm. 2. Pinerluttulerinermi inatsimmi kapitali 7-imiit 8 ilanngullugu malittarisassanik imaluunniit § 65, imm. 1-imik, § 66-imi oqaaseqatigiinnik siullernik, § 68, imm. 1-imik aamma 2-imik, § 69-imik, § 83-imik, § 86-imik, § 90, imm. 2-mik, § 88-imi oqaaseqatigiit siulliit malillugit ingasattumik nakuusernermik, § 92, imm. 1 malillugu kiffaanngissusiiaanermik, § 93-imik, § 98, imm. 2-mik, § 102-mi oqaaseqatigiit siulliit malillugit ingasattumik tillinniarnermik, § 111 a malillugu ingasattumik aningaasatigut peqquserluutininik malunnaarunnaarsaanermik, § 112-

noqqaavigineqarnermigut piffissamik sivitsuisarsinnaavoq, sivisunerpaamilli sapaatip akunneri sisamakkaarlugit. <i>Imm. 3. Akuliunnerup</i> siunertarisaa maangaannassagalarpat, eqqartuussiviup aalajangiinissaa utaqqineqassappat, politiit akuliunniarlutik aalajangersinnaapput. Taamaattoqassappat politiit sapiingisamik piaarnerpaamik kingusinnerpaamillu akuliunnerup aallarnerneqarneraniit nalunaaquttap akunneri 24-it qaangiutsinnagit suliassaq eqqartuussivimmut saqqummiutissavaat. Eqqartuussivimmit aalajangiiffigineqassaaq akuliunneq akuerineqarsinnaanersoq, kiisalu ingerlatiinnarneqarsinnaanerso q, taamaassappallu piffissami qanoq sivistutisumi ingerlanneqassanersoq, tak. imm. 1, oqaaseqatigiit aappaat pingajuilu, aamma imm. 2.	imik imaluunniit ikiaroorartut pillugit inatsimmik imaluunniit sakkut pillugit inatsimmik piaaraluni ingasattumik unioqqutitsinermik pinerluttoqarsimaneranik paasiniaaneq tunngassuteqarpat, § 385, imm. 1, imaluunniit § 386, imm. 1 malillugu, eqqartuussiviup aalajangiinerani oqarasuaatip normui aalajangersimasut saniatigut, inuk, akuliunnermut tunngassuteqartoq (pasisaq) taaneqassaaq. Taamaattoqarpat piffissap taassuma, akuliunnerup suliarineqarfissaata naanerata kingorna piaarnerpaamik, politiit oqarasuaatip normui, akuliunnermut sammitinneqartut aamma aalajangiinnermi taaneqarsimanngitsut, pillugit eqqartuussivik nalunaaruteqarfifigissavaat. Pissutsit assigiinnngitsut tamanna pissutissaqartippassuk, oqaaseqatigiit aappaat malillugit kingusinnerpaamik akuliunnerup aallartinneranit nalunaaquttat akunneri 24-it qaangiunneranni, nalunaarutiginninneq pissaaq. Oqaaseqatigiit aappaat aamma pingajuat malillugit nalunaarutiginninneq, oqarasuaatip normuinit taakkunannga pasineqartumut imaluunniit pasineqartumit nalunaarutininik tunniussisoqartarneranik, pissutaasut aalajangersimasut ilimagineqarnerisa taaneqarnerannik imaqassaaq. § 392, imm. 1 malillugu, illersuisoq ivertinneqarsimasoq eqqartuussiviup nalunaarfifigissavaa, taassumalu
--	---

Eqqartuussiviup aalajangiinera tunngavilersugaassaaq. Eqqartuussiviup isumaa malillugu akuliuttoqarsimasusaaanngikka luarpat, eqqartuussiviup Rigsadvokati tamatuminnga nalunaarfigissavaa. Akuliunnerit, eqqartuussiviup isumaa malillugu Politiets Efterretningstjeneste-mit suliarineqartussaasimanngikkaluit, Inatsiseqarnermut ministereqarfimmut nalunaarutigineqassapput.	tamatuma kingorna akuliunnerup inatsisinut naapertuunnera pillugu apeqqt eqqartuussivimmut saqqummiussinnaavaa. Eqqartuussiviup isumaa malillugu akuliunneq suliarineqartussaasimanngikkaluarpat, tamanna pillugu eqqartuussivik Rigsadvokatimut nalunaaruteqassaaq. Akuliunnerit, eqqartuussiviup isumaa malillugu Politiit Immikkut Paasiniaasartuinit suliarineqarsimasusaaanngikkaluit, Inatsiseqarnermut ministereqarfimmut nalunaarutigineqassapput.« Tamatuma kingorna imm. 2-miit 3 ilanngullugu imm. 3-miit 4-nngussapput.
§ 422. --- <i>Imm. 2-9. ---</i>	5. § 422 imm. 9-p kingorna immikkoortut nutaatut ilanngunneqassaaq: »Imm. <i>10.</i> Pinerluttoqarsimaneranik paasiniaasoqarneranut pasineqartoq imaluunniit allat tamanna pillugu ilisimasaqartinnagit, arsaarinnittoqarnissaa pingaaruteqarpat, aamma § 423, imm. 1-imi oqaaseqatigiit aappaat aamma pingajuat avaqqunneqarsinnaanerit pillugit, eqqartuussivik aalajangiisinnaavoq. § 391, imm. 2-mi aamma 3-mi, § 392-imi aamma § 396-imi malittarisassat taamatuttaaq atuutissapput.«
§ 448. --- <i>Imm. 2. ---</i>	6. § 448-p kingorna ilanngunneqassaaq:

	»§ 448 a. Unnerluussisussaataasut unnerluussummik tunniussinissaat sioqqullugu, tamanna naleqquttutut isigineqarpat, noqqaassuteqarnerup kingorna eqqartuussiviup suliami pingaarnertut isumaqatigiissitsiniarneq sioqqutsisumik piffissalersinnaavaa.«
§ 449. Eqqartuussisut politiinik, unnerluutigisamik illersuisumillu aggersaasassapput piffissaq sumiiffissarlu eqqartuussutissamik isumaqatigiinniuteqarfissaq taallugit. <i>Imm. 2. ---</i>	7. § 449, <i>imm. 1-imi,</i> »Eqqartuussisut« sioqqullugit ilanngunneqassaaq: »Suliaq § 449 d malillugu eqqartuussinertaqanngitsumik suliarineqanngippat,«.
§ 449 c. --- <i>Imm. 2-4. ---</i>	8. § 449 c-p kingorna ilanngunneqassaaq: »§ 449 d. Eqqartuussivik eqqartuussinertaqanngitsunik sulianik suliarinnissinnaavoq, taakkunani unioqqutitsineq pillugu suliami, eqqartuussivikkoorteqqaarnagu akiliisitsissummik akiliinikkut suliap naammassineqarnissaanik neqeroorut atulersinneqarsimalluni aamma taamaaliortoqassappat aqqusinertigut angallannermut inatsit malillugu arsaarinninneq imaluunniit piiaaffiginninneq atulersinneqarluni, tulliuttut pippata 1) § 449 c, <i>imm. 2</i> malillugu akileeqqussut akuerineqanngippat, imaluunniit akuersissut

	utertinneqarpat, pineqartup piffissaliussap akileeqqussummi aalajangerneqartup iluani suliap eqqartuussinikkut suliarineqarnissaa noqqaassutigisimanngippagu, pineqartoq ilimasaareqqeqqaarani pissutsinut akileeqqusisummut tunnqassuteqartunut eqqartuunneqarsinnaasoq, akileeqqussummi taaneqassasoq, aamma 2) nr. 1-imi piffissaq eqqorlugu noqqaassummik pineqartoq saqqummiussisimanngippat.«
§ 452. --- <i>Imm.</i> 2. Unnerluutigineqartoq takkutinngitsoorpat pissutissaqavilluni takkutinngitsoornissaq nalunaarutiginagu imaluunniit unnerluutigineqartoq nassuiaateqarumanngippat tamatumunnga taarsiullugu eqqartuussisut suliassaq suliarisinnaavaat unnerluutigineqartoq nassuersimasutut naatsorsuutigalugu, suliassarlu uppernarsaasiisoqanngikkalu artoq aalajangiiffigalugu. Aatsaalli taamaattoqassaaq suliassaq suliarineqartillugu	9. § 452, imm. 2-mi, »imaluunniit unnerluutigineqartoq nassuiaateqarumanngippat« ima allanngortinneqassaaq: »unnerluunneqartoq nassuiaateqarumanngippat imaluunniit § 449 d malillugu eqqartuussinissaq pillugu noqqaassuteqarnissani ilaginnarsimappagu«.

akiliisitsinissamiit, arsaarinnissuteqarnissamiit, biilersinnaanermut allagartaajarneqarnissamiit taarsiissuteqarnissamiillu allaanerusunik pineqaatissiissuteqarnissaq imaluunniit inatsisitigut kinguneqartitsineq pillugu apeqqut pineqanngikkaangat, aamma suliassaq unnerluutigineqartumut immikkut sunniuteqartumik pingaaruteqanngikkaangat. Eqqartuussut unnerluussissummi maluginiaqqusissuteqarnikku t sananeqassaaq. <i>Imm. 3. ---</i> <i>Imm. 4. ---</i>	
§ 474. --- <i>Imm. 2. ---</i> <i>Imm. 3.</i> Eqqartuussut nalunaarutigineqartassa aq eqqartuussutip inerneranik eqqartuussinermi atuaanikkut. Eqqartuussutip allassimaffiata assilineqarneranik unnerluutigineqartu mut Politiit nassiutissavaat. Suliassaq § 453, imm. 3 naapertorlugu unnerluutigineqartumit najuuffigineqarani suliarineqarlunilu aalajangiiffigineqassap	10. § 474, imm. 3-mi, oqaaseqatigiit aappaat sioqqullugu oqaaseqatigiittut nutaatut ilanngunneqassaaq: »Suliaq § 449 d malillugu suliarineqarsimappat, eqqartuussinermik ingerlateqqaarani eqqartuussut aammattaaq eqqartuussutigineqarsinnaavoq.«

pat, aalajangiinerup assilineqarnera unnerluutigineqartumut nalunaarutigineqassaaq.	
§ 517 b. Eqqartuussutini aalajangersakkani aamma suliamut aningaasartuutit pillugit aalajangiinerni Nunatsinni Eqqartuussivimmit aalajangiiffigineqartuni, qaffasinnerpaamik 50.000 kr.- inut aalajangerneqartut, aalajangeqqitassanngortinneqars innaanngillat. Akuusut arlaannaalluunniit suliamut aningaasartuutunik akuusup aappaanut akiliissannginnera aalajangerneqarpat, suliamut aningaasartuutit 50.000 kr.-inik annertunerusut eqqartuussutigineqarnerat pillugu apeqqt pillugu aalajangiineq, pissutsit immikkut ittut tamanna pissutissaqartippassuk, tamanna pillugu aalajangiineq taamaallaat aalajangeqqitassanngortitsinneq arsinnaavoq. Taamaattoq immikkut ittumik pissutsit pissutissaqalersitsippata, aalajangeqqitassanngortitsinissa mut akuersissummik Suliareqqitassanngortitsinissami k Aalajangiisartut tunniussisinnaapput. <i>Imm. 2.</i> Imm. 1 malillugu aalajangeqqitassanngortitsinissa mut akuersissummik qinnuteqaat aalajangiinerup	11. I § 517 b-mi imm. 1-ip kingorna immikkoortut nutaatut ilanngunneqassaaq: »Imm. 2. § 261, imm. 2 malillugu akissarsiat pillugit Nunatsinni Eqqartuussiviup aalajangiinerit aalajangersimasai, annerpaamik 50.000 kr.-inut aalajangersarneqarsimasut, aalajangeqqitassanngortinneqarsinna anngillat. Pissutsit immikkut ittut tamanna pissutissaqartippassuk, Ingerlatitseqqinnissamik aalajangiisartut taamaattoq aalajangeqqitassanngortitsinissamik akuersissuteqarsinnaapput.« Tamatuma kingorna imm. 2 imm. 3- nngussaaq.

aalajangerneqarnerata kingorna sapaatit akunneri 4 qaangiutsinnagit Suliareqqitassanngortitsinissami k Aalajangiisartunut tunniunneqassaaq, taamaattoq § 518, imm. 2 takuuk. Taamaattoq qinnuteqaat kingusinnerusukkut tunniunneqarpat, kisianni eqqartuussinerup kingorna qaammatit 6 iluanni, Aalajangiisartut qaqutiguinnaq akuersissummik nalunaaruteqarsinnaapput.«	
§ 583. --- <i>Imm. 2.</i> ---	12. § 583-p kingorna ilanngunneqassaaq: »§ 583 a. Rigsadvokatip imaluunniit eqqartuunneqarsimasup piumasaqaateqarneratigut, Inuit Pisinnaatitaaffii pillugit Europami Eqqartuussivimmit inaarutaasumik eqqartuussut, Danmarkip akuuffigisaa, eqqartuussutigineqarsimasoq malinniarlugu, Kalaallit Nunaanni suliaq aalajangerneqarsimasoq tamakkiisumik imaluunniit ilaannakoortumik suliareqqitassanngortinneqarnera pisinnaavoq. <i>Imm. 2.</i> § 535, imm. 1, taamatuttaaq atuutissaaq. Eqqartuunneqartoq toqusimappat, inunnit, § 535, imm. 2-mi oqaaseqatigiinni siullerni taaneqartunit, suliareqqitassanngortitsineq pillugu piumasaqaat saqqummiunneqarsinnaavoq.«

	Tamatuma kingorna imm. 2 imm. 3-nngussaaq.
§ 585. --- <i>Imm. 2-3. ---</i> <i>Imm. 4.</i> Eqqartuussaasimasooq inuillu, § 583, imm. 2 malillugu nangititsinissamik noqqaassuteqarsinnaasut, qinnuteqaatip sananeqarnerani nunami maani eqqartuussivimmit sumiluunniit imaluunniit politiinit kommuneqararulluunniit noqqaassuteqarneq naapertorlugu ikiorserneqarsinnaatitaapput.	13. § 585, <i>imm. 4-imi</i>, »§ 583, imm. 2,«-p kingorna ilanngunneqassaaq: »aamma § 583 a, imm. 2,«.
§ 586. Pissutsini, § 583, imm. 1, nr. 3-mi pineqartuni, nangititsinissamik qinnuteqaat saqqummiunneqareersimassaaq eqqartuussuteqartoqarneraniit kingusinnerpaamik ukiut tallimat qaangiutsinnagit. Eqqartuussaasimasooq eqqartuussutip nassatarisaatut kiffaanngissusiagaasimappat, nangititsinissamik qinnuteqaat tamatigut saqqummiunneqarsinnaavoq iperagaanermiit ukiut marluk tikillugit.	14. § 586-imi oqaaseqatigiit pingajuattut ilanngunneqassaaq: »Pissutsit immikkorluinnaq ittut atuutinngippata, pisuni § 583 a-imi pineqartuni, eqqartuunneqarsimasumit suliareqqitassanngortitsineq, Inuit Pisinnaatitaaffii pillugit Europami Eqqartuussivimmit inaarutaasumik eqqartuussutip pineqartup inaarutaasunngortinneqarnerata kingorna ukiup 1-p kingorna piumasaqaat saqqummiunneqassaaq.«
§ 587. Nangititsinissamik qinnuteqaateqarneq eqqartuussutip naammassinninniarneqarnerata kinguartinneqarneranik imaluunniit kipitinneqarneranik nassataqassanngilaq, Immikkut	15. § 587-imi oqaaseqatigiinni <i>siullerni</i>, »eqqartuussutip« ima allanngortinneqassaaq: »aalajangiinerup«. 16. § 587-imi oqaaseqatigiit <i>pingajuanni</i> »§ 583«-p kingorna

Ittumik EqqartuussiviupMaalaaruteqarfi gineqarsinnaasup tamanna aalajanginngippagu. Taamaattoqassaartaaq §§ 580-581 malillugit nangititsinissamik aalajangiisoqaraangat. § 583 malillugu nangititsinissamik aalajangiisoqarpat naammassisitsiniaaneq kinguartinneqassaaq imaluunniit kipineqassaaq, eqqartuussaasimasoq tamatuminnga noqqaassuteqarpat.	ilanngunneqassaaq: »imaluunniit § 583 a«.
§ 590. --- <i>Imm. 2.</i> Eqqartuussaasimasoq toqusimappat Immikkut Ittumik Eqqartuussiviup Maalaaruteqarfigineqarsinnaasup eqqartuussutissamik isumaqatigiinniuteqartoqaqqitsin nagu nangititsinissamik noqqaassut tunuartissavaa imaluunniit eqqartuussuteqassaaq, eqqartuussummik pineqartumik atorunnaarsitsisumik.	17. § 590, <i>imm. 2</i>, »eqqartuussuteqassaaq« ima allanngortinneqassaaq: »aalajangiinermik aalajangiissaaq«. 18. § 590, <i>imm. 2</i>, »eqqartuussummik pineqartumik« ima allanngortinneqassaaq: »aalajangiinermik pineqartumik«.
§ 592. Eqqartuussutissamik isumaqatigiinniuteqaqqinneq pissaaq eqqartuussivimmi, suliassami siornatigut	19. § 592, <i>imm. 1-imi</i> <i>oqaaseqatigiinni siullerni</i>, »eqqartuussuteqarsimasumi« ima allanngortinneqassaaq:

eqqartuussuteqarsimasumi. Suliarinninnermi atuutissapput eqqartuussivimmi pineqartumi suliassamik suliarinnittarneq pillugu malittarisassat nalinginnaasut. <i>Imm. 2. ---</i> <i>Imm. 3.</i> Nangititsinissaq § 583 naapertorlugu aalajangiunneqarpat eqqartuussut nutaaq eqqartuussummiit siullermiit allaanerussuteqassanngila q eqqartuussaasimasumut ajoqutaasussamik. Nangititsinissaq § 580 imaluunniit § 581 naapertorlugu aalajangiunneqarsimappa t immikkoortunut, nangititsinissamut tunngavilersuutitut ilaasunut, taamaallaat tunngatillugu unnerluutigineqartumut imaluunniit eqqartuussaasimasumut ajoqutaasinnaasumik allaanerussuteqartitsisoqa rsinnaavoq.	»aalajangiinermik aalajangiisimasumi«. 20. § 592, <i>imm. 3-imi</i> <i>oqaaseqatigiinni</i> <i>siullerni</i> »eqqartuussut« ima allanngortinneqassaaq: »aalajangiineq«. 21. § 592, <i>imm. 3-mi</i> »§ 583«-ip kingorna ilanngunneqassaaq: »imaluunniit § 583 a«.
---	--

§ 601. --- <i>Imm. 2-4. ---</i> <i>Imm. 5.</i> Eqqartuussutini naammassinninniaasartoq pinngitsaaliinikkut naammassinninniaasinnaavoq eqqartuussisoqarfiup avataani, taamaasiornissamut immikkut ittunik pissutissaqarsorinarpat.	22. § 601-imi imm. 4-p kingorna immikkoortutut nutaatut ilanngunneqassaaq: »<i>Imm. 5.</i> Eqqartuussivikkoortinnagu allakkatigut isumaqatigiissuteqarnermi aamma akiitsut allagartaanni, digitaliusumik atsiorneqartuni, takussutissiap allakkatigut assinga akiliisitsisarnermut eqqartuussivimmut tunniunneqassaaq.« Tamatuma kingorna imm. 5 imm. 6- inngussaaq.
---	--